

JOÃO

Unâ Koendonro Jesus Cristo

Wâgâ João Inweniby

Xirâ livru wâgâ inwenily João nhangahu odaji iemâmy Deus. Awylygue Deus itaumbryrlâ xirâ João nhegatyby. Jesus induakeyby myakâwândy mâkâ João. Jesus toenzepa inwynegyly myakâwândy mâkâ. Mâkâ lelâlâ tientybylâ xirâ livru wâgâ nhegatyly.

Kâmakerim Jesus Cristo wâgâ kiuntuhoem myakâwândy Deus xirâ livru inwenien-honly. Xirâ iweniby wâgâ tytainze kurâ, Deus kiuntuho mâkâ awyly. Idânârâ xugudyly iraynâlâ tâlâ myakâwândy mâkâ, tutuze kurâ; xirâ onro anaxi tâetoem olâ myakâwândy kurâem idyly. Kâmakeze iguein-em myakâwândy âewyly, judeu domodo kaneru nhâlymo inakanhe adâitomobyry xygakehoem myara.

Jesus adyesenry modo kehoem anhetobyry, pekodo Samaria donro agâ aguehobyry, Lázaro igueduo kurâem nhetondobyry wâgâ warâ adâkeze xirâ livru.

Xirâ livru xypyrydâ, capítulo 14dâ Jesus, tyiguely iraynâ, tynynonro modoram aguehobyry, Deus Ispiritury tingonodyly wâgâ enomedânimoem, eon-hondânimoem warâ kehobyry tytainze kurâ. Capítulo 17dâ, Jesus Tunwym agâ xunâgobyry tutuze lâpylâ kurâ. Iguehobyry wâgâ, igueypyem kurâem tâitom-bygueduo turâ modoram âepanâguehobyry warâ tytainze kurâ.

Âdaituo xirâ iwenily awyly xutuhobe xirâ livru wâgâ: Jesus Deus imeryem awyly, kâmakeinhe Deus ingonotyby awyly warâ kieinwântoem.

Jesus wâgâ mawânkâ Kunwym Deus kiuntuly

1 ¹Idânârâ âtugudyly iraynâ, âdy peba awyly ume, tâlâ myakâwândy kyam Deus Xutuen-hoim. Tunwym Deus agâlâ myakâwândy mâkâ. ²Idânârâ nhugudyly iraynâ, Deus Xutuen-hoim Deus agâlâ myakâwândy. ³Deus Xutuen-hoinlâ, idânârâ tâlânro modo adâkelygue kulâ xugunehonri. Mâkâ aguepa watay, âdy peba, ânguy peba warâ tâise. ⁴Deus Xutuen-hoim mawânkâ xirâ anaym tâlâ kyenehonri. Mâkâ wâgâlâ ise

Deus eydâ atoam kytâly, kieinwândylygue. Iajinu wâne kytâho kientoem ânwa tâsagonze, myara lâpylâ Deus wâgâ kiuntuhoem anhenhonly. ⁵Iajinu emyenro mâkâ, inakanhe aguitobyry xutuen-hoim. Iamu, iajinu tohoreba nietaymba, arâ lâpylâ inakanhe tadawyly Deus wâgâ kiuntuly nianlâpyra awyly.

⁶Jesus Deus wâgâ aguely adaguly iraynâ, Deus eagonro uguondo unâ egatuim igonomâmy, João Batistalâ. ⁷Iajinu oze kytâduo, âdyam kytâly awyly tutuze kurâ, arâ lâpylâ Jesus âdara Deusram kaintyly awyly

nhutuen-honly. Jesus wâgâ agueze myani João âewyly. Idânârâ adâkely indatomoem, Jesus nheinwânto-moem warâ myani João aguely. ⁸Deus Xutuen-hoim kuru mâkeba myani João. Jesus mawânkâ kyam Deus Xutuen-hoim kuru; mâkâ wâgâ ani João aguely. ⁹Jesus xirâ onro anaxi âewyly myakâwâm, Deus kyam xutuen-honze. Mâkâ wâgâ mawânâ âdara mâkâ xurâem kydawyly xutuly.

¹⁰Mâkâ kyam Deus Xutuen-hoim onro anaxi âemâ; tarâ kuduaylâ akâwâm. Mâkâ lelâlâ idânârâ onro anano modo tytanruegê kulâ xuguni-pyry, Deus xurâ keba modo olâ Messiaslâ mâkâ awyly nutubamo, Deus Ingonotyby. ¹¹Typemugudo judeu domodo duaxilâ wâne myani âewyly. Ipemugudo judeu domodo ewy olâ myani, eynynonroem tâidysebamo. ¹²Tâlâ olâ myani einwânni lâpylâ, awylygue akaemo Deus xurâem nhenehonly. ¹³Tâjimery tyze odaypalâ iazely, nhunwynlâ xuguni warâ. Arâpa olâ Deus tymeryem kyedyly. Eynynonroem kydawylygue tymeryem kyedyly.

¹⁴Deus kyam Xutuen-hoim Jesus Cristo karalâ akâwâm kurâem awyly. Kuduaylâ akâwâm xirâ onro anaym awyly. Kagâ koendonro lelâlâ mâkâ. Mâkâlâ mawânkâ âkealâ kuru âdaunlo Deus awyly xutuen-hoim. Deus imery tokaleom tawylygue, koendâ, ton-honre warâ mâkâ. Tâense kurâ koendonro kehoem awyly, ton-honre awyly warâ.

¹⁵Mâkâ Deus kyam Xutuen-honri wâgâ myakâwâm João Batista aguely: —Saguhoem iwâgâ auguehobrylâ merâ. Auguehobry enanâguewâdaungâ, “Inepa ise mâkâ yakadâ kuru xuturim âewyly. Urâ lelâlâ wâne ani waunroem iazeim, tâlâ

olâ myakâwândy merâ yazely iraylâ” uguehobry —kely.

¹⁶Koendonro lelâlâ mâkâ, koendâ lelâ inanry, idânârâ kagâ awyly. Aunlolâ inanry kurâem koendonro anhesedyly. ¹⁷Saguhoem kuru Moisésram myakâwândy Deus kâzewenry nhegatuem-honly, kydamudo judeu domodo ezewenry. Jesus Cristo wâgâ olâ iwerâ Deus koendonroem tawyly, ton-honre tawyly warâ nhenehonly. Jesus Cristo wâgâ mawânâ âdaunlo Deus awyly kiuntuly. ¹⁸Ânguy Deus netaymba. Mâkâ imery tokaleom olâ tâense, Deus agâ âzekibalâ tawylygue. Tunwym agâlâ mâkâ. Mâkâlâ ani koendâ kuru âdaunlo Deus awyly xutuen-honri.

João Batista aguehobry

¹⁹Judeu domodo iwymârydo Jerusalém donro, kurâdo eynynâ Deus agâ aguewâni modoram, emary modoram warâ aguelymo myakâwâm: —Joâoram idâwâtaungâ. Sapâiguewâdaunda: “Âmâ-ro? Ânguyka âmâ? Âwâgâlâ amyguely? Messiaslâ âmâ, Deus ingonokyly tynwânwânseinlâ?” kewâtaunda —kelymo.

²⁰Aituo idâlymo; João nhapâiguelymo. Tapâiguehobry koendâ kehoem in-hoguly:

—Messias mâkeba urâ, mâkâ Deus ingonokyly kurâdo inwânwânkyly mâkeba —kely.

²¹Aituo nhapâigueondylymo:

—Messias keba matay, Elias kurâem itondyby âmâ? —kelymo.

Aituo João in-hoguly:

—Elias mâkeba urâ —kely.

—Moisés ara Deus itaumbry egatuim tynwânwânseinlâ âmâ? —kelymo.

—Mâkâ keba aze —kely.

²²Aituo agueondylymo Joãooram:

—Arâ atay, ânguy pylâka âmâ? Tugononibyryam mâin-hoguhobyry tiandyse xina. Âdara tâkezeka âmâ âwâgâlâ? —kelymo.

²³Aituo João in-hoguly, saguhoem lelâlâ Isaiâs inweniby aralâ:

—Âdy peba atodâ Messias wâgâ agueinlâ urâ. “Ohondaungâ Kywymâry Deus Ingonotyby sain-todâ, taseray tuonse wâne pymâ ton-honreim saintoem myara. Inakanhe amidylimo imowâdaungâ” keim urâ —kely João.

²⁴⁻²⁵Aituo, sapâigueze igonotyby modo duano, fariseu domodo, Joãoram aguelymo:

—Messias keba, Elias kurâem itondyby keba, unâ egatuim Deus ingonokyly tynwânwânseim keba warâ âmâ-ro watayma kurâ domodo batiza iese ton-honruneba âmâ-ro —kelymo.

²⁶Aituo João aguely eyanmo:

—Urâ parugue batiza âenimo. Âduaymolâ olâ awâkâ, eon-honru mâuntudânrymo. ²⁷Urâ pygueduo lelâlâ wâne Deus xurâem tâwanu nhaguly, awâkâ olâ yakadâ kuru tynrenseim. Mâkâ mawânkâ Deus wâgâ agueim kuru. Mâkâ ara iedylymo watay, âdy mâkeba urâ. Ihuru kâingokehoem ihuru etary etyrinhe witoenlâ nudupa lâgâlâ —kely.

²⁸Betaniadâ myakâwâm awârâ aidily, âtunâguedylimo, paru Jordão kuynâ, João, Deus eynonroem tâidysedo modo batiza nhetonâ.

João Jesus wâgâ aguehobyry

²⁹Kopaelâgâem João, Jesus nhedyly. Tyam idâly tientuo tonlo modoram aguely:

—Etaungâ Deus Ingonotyby. Awâkâ wâgâ ise Deus inakanhe aguitobyry nhygakely. Saguhoem, kordeiru tyâze, tyaduânse warâ mykâinane

kurâdo eynynâ Deus agâ aguewâni modo. Awârâ tientuo mykâinane Deus, inakanhe aguitobyry nhygakely. Arâ lâpylâ ise awâkâ âeni kâtaybyay iguely. Awâkâ iguehobyry wâgâ ise, inakanhe aguitobyry Deus nhygakely. ³⁰Auguehobyry enanâguedaungâ: “Inepa ise mâkâ yakadâ kuru xuturim âewyly. Urâ lelâlâ wâne ani waunroem iazeim, tâlâ olâ myakâwândy awâkâ yazely yraynâlâ” uguehobyry —kely.

³¹⁻³⁴Aituo João nhegatuly ânguy Deus Ingonotyby awyly.

—Âdaunlo uguondo wâgâ inakanhe aguitobyry xygakely awyly kâuntuwâbyra wakynre, kordeiru ara inakanhe aguitobyry epywaze tyâzeim. “Kurâdo parugue batiza iekâ” nyguelâ Deus. “Yspiritury uguondo onwa âewyly ese âmâ. Mâkâ ise Yspiritury xuduim, ânguy nynonro awyly tienehon-hoem, iwerâ wâne enra kurâdo batiza mânhedily, ânguy nynonro awyly âzehoem myara” nygue Deus, ânguy Ingonotyby awyly kâuntuhoem. Deus aguehobyry ara, Deus Ispiritury kaynâpa xytâguely kâendily papaem Jesus onwa. Aituo lelâlâ ânguy Messias, Deus Ingonotyby awyly kâuntuly. Messias âewyly iray on-honi modo parugue batiza iedyly mawânâ iewanu, ânguy mâkâ awyly israelita domodo nhutuhoem. Awylygue “Deus imery awâkâ Jesus” uguely —kely João.

Jesus tynnonroem André, Simão Pedro warâ iduakehobyry

³⁵Kopaelâgâem târâlâ João azagâ tynnonro modo agâ. ³⁶Jesus sakyly tientuo, João aguely:

—“Kordeiru Deus Ingonotyby” keholâ awâkâ, mâkâ iwâgâ auguehobyrylâ —kely.

³⁷Agueduo, akaemo azagâ Jesus nhapygue idâlymo âgânâ. ³⁸Aituo

Jesus MYK idyly tykayam. Tyampygue idâlymo awyly tientuo, aguely:

—Âdaituoka yampyguedylymo? —kely.

—Konomedâni, âdykâka mâxidâ-dyly? —kelymo.

³⁹Jesus in-hoguly:

—Âetaungâ. Inoro eydâ watoam —kely.

Kogoneyam, quatro horas awârâem, Jesus agâ idâlymo. Nhedylymo âdykâ Jesus âxidâdybyem awyly. Eagâlâ iguandylymo.

⁴⁰João Batista eynnonrolâ akaemo azagâ uguondo modo. Jesus aguely tindapygueduo olâ eagâ idâlymo lelâ, iwâgâ tâsenomedâdomoem. Akaemo azagâ uguondo modo ewy André, Simão Pedro iukono, myani mâkâ.

⁴¹Jesus agâ adâkebygueduo myani André tywaigoru nhuinly, aguely:

—Paigo, Deus Ingonotyby Messias xina netai —kely.

(“Cristo” keze “Messias” kely gregüem.)

⁴²Aituo tywaigoru nhadyly Jesusram. Jesus Simão enipyryem, aguely:

—Simão izedy, João imery. Iwerâ olâ ise izedy iwelo Cefas —kely.

(Pedro kezela gregüem Cefas kely, “tuhu imâsedo” kezela.)

Jesus tynnonroem Filipe

Natanael warâ induakehobyry

⁴³Kopaelâgâem Jesus Galiléia yan-yam tâtâdyze idyly. Tâtâly iraynâ, Filipe agâ oxiodyly; eyam aguely:

—Yagâ âekâ, ynnonroem mitoem —kely.

⁴⁴Betsaida donro myani mâkâ Filipe, André, Pedro warâ ety anano.

⁴⁵Filipe, Natanael agâ agueze idâly. —Saguhoenlâ Moisés pape kâzewenry awo wâgâ inweniby Deus Ingonokyly wâgâ aguehobyry xina netai. Deus itaumbry egatuimbyry

modo tywenizemo lâpylâ mâkâ âeni wâgâ. Jesuslâ, Deus Ingonotyby, José imery, xidâdâ Nazaré donro —kely.

⁴⁶Awârâ tindatuo, Natanael aguely:

—Âdy koendonro lâpeba târâ Nazarédâ! Nazaré donro ewy Messias awyly kâinwântaymba urâ —kely.

—Âekâ. Egârâ —kely Filipe.

⁴⁷Natanael saindyly tientuo, Jesus aguely tagonro modoram:

—Israelita lelâlâ awâkâ saini. Ânguy enokuni mâkeba awâkâ —kely.

⁴⁸Jesus aguely tindatuo, Natanael, Jesus nhapâiguely:

—Âdaraka utuly? Waunroem kydoxiodylylâma xirâ! —kely.

Aituo Jesus in-hoguly:

—Kâenkylyemba lelâlâ wâne enra iwague mawyly, Filipe. Âgâsedyly iraylâ olâ enra se figueira iay eadybyem mawyly kâendyly —kely.

⁴⁹Natanael inwauntudyly, aguely:

—Konomedâni, Deus imery âmâ! Israelita domodo iwymâry kehobyry! —kely.

⁵⁰Jesus aguely:

—“Figueira iay enra nhedyly” uguehobyry wâgâ kulâ yeinwândyly! Ago kuru yeinwânse olâ âmâ, awârâ modo takazeno agânhedyly mâentuo —kely.

⁵¹Aituo idânârâam aguely:

—Kau âzenahunguely-ro waunlo ara ise mâendylymo. Anju domodo yagâ xytâguely, âkuly warâ ese âmaemo, urâ Uguondo Kaynâpa Âetyby agâ. Xirâ mâuntudzemo kuru wato —kely.

Jesus Canadâ todohogüinday,

adyesenry anhetobyry

2 ¹Azagâ iguandyly ipygueduo, Canadâ todohogüinlybe akâwâm, Galiléia eynynâ. Târâlâ akâwâm Jesus ise, todohogüin-hodâlâ. ²Jesus agâ xina idâwâm lâpylâ, igâsedybyem tawylygue. ³Aituo vinhu adainly, âty

nadaimpalâ. Awârâ tiuntuduo Jesus ise eyam aguely:

—Mery, igâsedyby modo sakuihoem vinhu lâpeba —kely.

⁴Jesus aguely:

—Âdaituoka yam amyguely? Iewanu kanguhu oday inkâba awârâ —kely.

⁵Arâ aguepygueduolâ Jesus ise âty sodo emary modoram aguely:

—Ymery aguehobyry arane aitaungâ —kely.

⁶Tâlâ ani âtadâ seis poty tuhugue xygatyby modo, paru ekanâdo. Oitenta, cem litros warâ mârâ modo nhawâdyly. Tâzewenry ara, tâzemaunguehomoem, tywykeba tâitomoem warâ judeu domodo parugue nhumytâguylymo myani mârâ. ⁷Jesus aguely vinhu epâni modoram:

—Xirâ poty modo parugue xumytâdaungâ —kely.

Aituo parugue poty nhumytâdylymo. ⁸Ilâpyryem aguely:

—Xirâ poty odano ewy paru âentywâdaungâ. Sataungâ âty iwymâryam —kely.

Aguehobyry ara aidylymo. Paru nhetylymo, nhadylymo. ⁹Jesus olâ mârâ paru vinhuem ienehonrimbyryem. Aituo âty iwymâry mârâ xuduypy nhekudyly. Ipa, mârâ paru, vinhuem itybyem lelâ. Âdykâ mârâ vinhu nhetylymo awyly nutuba mâkâ. Emary modo olâ mârâ paru poty odano modo vinhuem ietybyem awyly tutuze. Akaemolâ mawânkâ mârâ tânyzeim poty odayba etyim. Aituo âty iwymâry uguondo ohogüinrim ingâsedyly, aguely:

¹⁰—Kâzewenryem vinhu tâkubâgueim mawânâ waunroem tâpâzeim igâsedyby modoram. Ize tato ara nhenybygueduomo pylâ eagonro vinhu ewy epâdyly-ro warâ. Âmâ olâ vinhu tâkubâgueim meka-

nâdai; âty adainze idâly ume kulâ pylâ mâempâdyly-ro! —kely.

¹¹Târâ Canadâ, Galiléia eynynâ, saguhoem kuru adyesenry anhedylâ ani Jesus Deus eon-honru tienehon-hoem. Xina Jesus eynonro modo Jesus anhetyby tientuo, einwânâ.

¹²Awârâpygueduo xidadâ Cafarnaumram Jesus idâly. Ise, iukonodo warâ eagâ idâwânmo, xina lâpylâ warâ. Iweâpa xina nipyra ani târâ.



(João 2.1-12)

Jesus ânguydo imeom vende ieni modo Deus ety odayba nhégaseândobyry

(Mt 21.12-17; Mc 11.15-19; Lc 19.45-48)

¹³Âty Páscoa etyguedo saindyly iray Jesus idâly xidadâ Jerusalémram, mârâ âty aitoam, kydamudo Egitodâpa âsemaguehomobyry enanâgueho. Eagâ xina idâwâm. ¹⁴Deus ety idase-raji egawântybyem kurâ domodo nhedyly. Uguondo modo tapirâ, ovelha, papa, awâkâ modo vende nhedylymo. Tanâseim ani mâkâ modo, xyâhoem, iaduântoem warâ, Deusram egamehoem. Mesa wâgâ ekadyby modo kurâdo idinheruru troca nhedyly, nhedyly lâpylâ. Târâ adyeseim keba

anhelymo. ¹⁵Aituo kordague xikoty anhedily. Vende ieni modo Deus etydâba inwenkewâdyly, ovelha, tapirâdo warâ agâlâ. Dinheru troca ieni modo iwenzary nhamunedily. Aituo idinherurumo adapæguyly onro wâgâ.

¹⁶—Tarâpa merâ modo etywâdaungâ —kely papa vende ieni modoram.

—Pabai xyrento xirâ âtâ, âdydo imeom vende ieto, sanâto warâ mâkeba —kely.

¹⁷Xina Jesus eynonro modo nhenanâguely saguhoem Deus itaumbry awo Salmos wâgâ iweniby: “Deus, toenzepa âtâ âyrento ize wawily. Woday peto yaduândily-ro waunlo ara kehoem ity kâinwynedily. Awârâ ise yiguehoem aienhonrim” warâ iwenibyem awily.

¹⁸Jesus anhetyby tientuo myani, pymâdo aguely:

—Âdylâ Deus eon-honrugue amânhedily tiendyse xina, Deuslâ, Deus keba tarâ amitoem aguenri mawily tiuntuhoem —kelymo.

¹⁹—Xirâ âtâ mankalagueduomo, azagâ^a emedyly idily ara, saunâtonze urâ —kely Jesus.

²⁰—Nuduwâpyra! Quarenta e seis anu samâ xirâ âtâ itâdoem. “Azagâ^b emedyly ara saunâtonze urâ” myguely. Myguewâdyly kulâ! —kelymo.

²¹Deus ety wâgâ wâne Jesus aguely, tywâgâlâ olâ aguely lâpylâ. ²²Igueypyem, kurâem itonduo, Deus ety azagâ emedyly ara tiaunâdyly wâgâ aguehobyry xina enanâguewâm. Tienanâgueduo, âkealâ Jesus aguehobyry awily xina nhutuly, Deus itaumbry awo wâgâ iweniby âkealâ awily lâpylâ warâ.

Idânârâ kyangahu oday kunâry tutuze lelâ Jesus

²³Páscoa etygueday Jesus Jerusalémdâ awily ume, toenzepa

kurâdo Jesus nheinwândily, Deus Ingonotyby Messiaslâ awily, adyesenry modo kehoem anhedily tientuomo.

²⁴Jesus olâ kurâdo neinwâmpyra, koendâ kehoem akaemo âdaunloem awily tutuze tawylygue; tutuze agui akaemo ewy tyizepa awily. ²⁵Idânârâ kurâdo tutuze lelâ Jesus ânguy eyam negatubalâ. Idânârâ tyangahu oday xunâgomo tutuze, ânguy eyam aguepalâ.

Nicodemos Jesus agâ agueze idâhobyry

3 ¹Tâlâ myakâwâm uguondo Nicodemosgue tâzekeim. Fariseu myakâwâm mâkâ, judeu domodo iwymâry. ²Kopae idâly Jesus agâ agueze.

—Tutuze xina, konomedâni mawily, Deus ingonotyby. Agâpa Deus watay, adyesenry kehoem amânhetaymba tâise âmâ —kely.

³Jesus aguely:

—Azeompyra kulâ, Deusgue tywymâguneba âmâ. Arâ lelâ mawânâ Deus xurâem tâjidyly. Xirâ mâuntu-dyze kuru wato —kely.

⁴—Âwâ! Ânguy xutybyem itybyem niazeontaymba! Nuduwâpyra kyze idâhu odaxi kydodopâdoem, kyzeontem —kely Nicodemos.

⁵Jesus aguely:

—Deus Ispirituryam iweloem kydâiehoba, parugue kyzeontaymba kurâ warâ watay, Deusgue tywymâguneba. Xirâ mâuntudyze kuru wato. ⁶Kyze idâhu odayba kâgaseduo, kurâenlâ kyazely. Awârâ keba olâ Deus einwânni modo Deus xurâem ienehoim, Deus Ispiriturylâ iweloem kyenehoim.

⁷Awylygue tâseguâdâzeba ikâ, “Azeontaungâ” uguelygue. ⁸Sapezenru igâky tydase, ponwary, se iwatary warâ

^a2.19 Nota de pé Mateus 12.40dâ egâ. ^b2.20 Nota de pé Mateus 12.40dâ egâ.

nhekânily tâense warâ âmaemo, sapezenru kuru olâ mâempyra âmaemo. Arâ lâpylâ Deus Ispiritury, Deus einwântaynrim modo wâgâ aidyly mâempyra mawylymo; aitobryr modo lelâ mâenkylymo —kely.

⁹Nicodemos aguely:

—Kâuntuba lelâ aze. Âdara kuruka amyguehobryr aidyly, Deus Ispiriturygue xina iazeondyly? —kely.

¹⁰Jesus in-hoguly:

—Kâzewenry enomedâni âmâ, awârâ olâ mâuntuba âmâ! ¹¹Idakâ. Tiuntuybylâ xina Deus eynynonro âyanmo agueho, tientybylâ xina âyanmo nhगतuly warâ. Arâlâ olâ xina agueho mâinwâmpyra mawylymo. ¹²Xirâ onro anano wâgâ augueduo mâinwâmpyra âmaemo, Deus wâgâ augueduo lakuru ise mâinwâmpyra kuru mawylymo. ¹³Ânguy xirâ anano kulâ Deus ezaxi nâkuwâbyra, iwâgâ egatuze nodopâbyra warâ. Urâ, Uguondo Kaynâpa Âetyby lelâ târâpa xytâguyby. Urâ lelâ Deus wâgâ aguenriem xurutyby —kely Jesus.

¹⁴Aituo aguely:

—Enanâguegâ, saguhoem kydamudo Deus einwântânry modo âji âdy peba ato einkâ adakobâday, âgâuram sâtobryr. Deus, Moisés âgâu bronzegueto anhetoem, se wâgâ nhaunâtoem warâ aguewâm, mâkâ âgâuram MYK ityby modo kua itoem. Mâkâ âgâu bronzegueto saunâtoeryr ara, arâ lâpylâ ise urâ, Uguondo Kaynâpa Âetyby keho, se wâgâ kadaunâhonly, ¹⁵idânârâ yeinwântaynrim modo, aunloenlâ Deus agâ itomoem. ¹⁶Idânârâ Deus kywyne-dyly. Awylygue urâ tymery tokaleom ugonodyly. Idânârâ yeinwântaynrim modo eyam âzmakeoze. Deus agâpa tyetunebamo ise, aunlolâ ise eagâ awylymo. ¹⁷Deus ugonodyly, xirâ

anano modo igueduo tienagazedoem inkâba, idânârâ yeinwântaynrim modo tienmakehoem.

¹⁸—Urâ Deus imery yeinwântaynrim modo âji tâdâsenagazedoam nâtâwâbyramo ise. Yeinwântânry modo olâ idâze mârâ âji tâdâsenagazedoam, urâ Deus imery tokaleom yeinwâmpyra atomobryr wâgâ, aunloenlâ Deus agâpa ietomoem. ¹⁹Iajinu MAH nheto ara xirâ anaym Deus wâgâ koendonro segatu, urâ Deus imery; Deus xurâ keba modo olâ Deus izepa ato adiyndylylâ ize atomo, awylygue yizepa awylymo. Iamu duay adakobâni aramo kulâ, iajinu oday adakobâni ara inkâba. Awârâ mawân-râ yeinwântânry modo aunloenlâ âsenagazedoem egamehonrimo. ²⁰Inakai aieni modo yizemo inkâba; ydâpa tâwien-sembemo lelâ. Yam idâlymo-ro watay, inakai anhekylymo tâdutuoze tâise. Inakanhe adâidyly timodyzebamo tawylygue, adienkyly nhoendylymo, ânguy nutuba itoem. ²¹Deus ize ato aieni modo olâ wopaji tainsemo. Iajinu aguienkyly nhesagon-ho ara, idânârâam koendâ anhekylymo âzeholy, Deuslâ anhetomoem eon-honrumo xuduim awyly nhutulymo warâ —kely.

Jesus wâgâ João Batista aguehobryr

²²Awârâpygueduo, Judéia einkâ Jesus adakobâdyly. Eagâlâ xina idâly. Iweâpadobe târâ xina awyly, inakanhe adâitobryr wâgâ âjityeni modo, adâidyly timodyzedo modo warâ parugue batiza âiehoday. ²³João lâpylâ Enomdâ parugue batiza nhetaynlymo, Salim iwaguepa, târâ toenzepa paru awylygue. Toenzepa myani kurâdo idâly eyam batiza âiehoze. ²⁴(Tâtadâzeba João ilâem.)

²⁵Judeu agâ João eynynonro modo ewy âjihoguly. Deus enanaym âdara tywykeba tâjidyly wâgâ aguelymo. ²⁶João eynynonro modo eyam agueze idâly.

—Tânanâgueze âmâ mâkâ uguondo paru Jordão kurnâ agonropyry, iwâgâ amyguehobyry. Toenzepa kurâdo eyam idâly batiza âiehoze, âyam âeni modo takaze —kelymo.

²⁷João aguely:

—Tuomare urâ, kurâdo eyam idâlygue. Deuslâ awârâ aienehonrim. ²⁸Auguely midadâmolâ: “Messias mâkeba urâ” ugue. Iraynâlâ olâ kâjigonoholy, sainto koendâ konhontoem. ²⁹Todohogüünday, uguondo ohogüinrim xurâ mawânkâ pekodo. Eataen-ho tuomazeze lâpylâ olâ, ohogüinrim oho-maenduo. Arâ lâpylâ kohomaendyly, toenzepa kurâ domodo Jesus nheinwândyly kâuntuduo. Mâkâ mawânkâ Messias, urâ keba. ³⁰Agui Jesus aguely idase idâlymo ize wato, auguely idase âewylymo mâkeba —kely João.

Deus eydâpa âetyby awâkâ Jesus

³¹Deus eydâ atodâlâ Messias âewyly. Idânârâ duay tynrenseim awâkâ Messias. Xirâ onro anano kulâ kurâ, xirâ ananolâ kiuntuly. Kydâ iwaguepa aityby kulâ kiuntuly. Tarâ kientyby, kindatyby warâ kulâ aguykeho. Messias olâ idânârâ duay tynrenseim kuru. ³²Deus eydâ atodâ tientyby wâgâ, tindatyby wâgâ warâ aguely. Arâlâ olâ, agui aguely einwântânrybe awyly. ³³Warâ einwânni modo aguely: “Âkeâ lelâlâ ‘Jesus, Deus imery awyly’ Deuslâ mawânkâ agueim” kelymo. ³⁴Deus aguedyse ato, mâkâ Deus ingonotyby agueho, Deus Ispiritury eagâpa nitaymba. ³⁵Kunwym Deus toenzepa lelâlâ tymery inwynedyly. Awylygue emaxilâ idânârâ nhuduly.

Deuslâ idânârâ aitaynrim modo iwymâryem itoem agueim. ³⁶Awylygue ise, Deus imery einwântaynrim modo Deus agâpa tyeseba awylymo. Tyigueduo, Deusram idâzemo, aunloenlâ eagâ tâitomoem. Deus imery einwântânry modo olâ ise, Deus agâ nipyramo. Tyigueduo, âji tâdâsenagazedoam idâzemo, aunloenlâ Deusdâ iwague itomoem.

Jesus pekodo Samaria eynynonro agâ aguehobyry

4 ¹Jesus nhenomedâdo idani modo modo takaze, Jesus agui kurâdo batiza nhenehonly, João batiza nhetyby takaze, kely tydase myani fariseu domodo. ²(Jesus keba olâ tâinwânni modo batiza ieni, xina eynynonro modo.) ³Unâ tywâgâ, João wâgâ warâ tiuntuduo, Jesus Judéia eynynâba idyly, Galileiaranlâ odopâdyly. Eagâlâ xina idâly. ⁴Samaria einkâ takadyze Jesus. Awylygue tâinkâ xina sakadyly.

⁵Samaria donro xidadâ Sicar kehoam iwaguepa xina saindyly. Mârâ xidadâ iwaguepa, onro saguhoem lelâlâ kydamu Jacó tymery Joséram nhuduy-pybe târâ. ⁶Mârâ onrodâ paru etyho Jacó nhesaguehoymbybe. Kuotatay awârâem paru etyhoram xina saindyly. Toenzepa adakobâdybyem tawylygue, Jesus ekozeybyem. Aituo paru etyhodâ ekadyly tokobyzeguehoem.

⁷Târâ awyly ume, pekodo Samaria donro paru etyze idâly; Jesus eyam aguely:

—Parugue yakuigâ wao —kely.

⁸(Târâpa ani xina Jesus eynynonro modo, pyni sanâse xidadâam idâypyem.)

⁹Pekodo aguely:

—Judeu âmâ, samaritana urâ warâ. Ypemugudo, âpemugudo agâ

âjizetonro mâkeba; koendâ oxioni keba warâ. Xina adakuihobyry oday, madakuidyzedo mâkeba âmaemo. Awylygue ywalu etary odano ewy mâenyhoem mâenkaduo, kâseguâdâdily —kely pekodo.

Mâkâ pekodo arâ aguely, judeu domodo, samaritano domodo warâ âjizetonro keba awylymogue. Samaria donro modo adakuihobyry oday nada-kuiwâbyra judeu domodo.

¹⁰Aituo Jesus aguely:

—Deus âmâm nhuduly mâuntuly ânguy paru ekani awyly warâ mâuntuly watay, yam paru tâkaze tâise âmâ mâenyhoem. Yam mâenkaduo, âyam tuduze tâise urâ. Mâenyly-ro watay, iweloem tâiehoze tâise âmâ; âigueduo, aunloenlâ Deus agâ mitoem eyam tâtâze tâise âmâ —kely Jesus.

¹¹—Tâsanigue xirâ paru etary, etyho peba âmâ-ro warâ. Nuduwâpyra paru iweloem yetoni yam mâunduhom, mârâ aunloenlâ Deus agâ witoem ayenehoim. ¹²Saguhoenlâ myakâwândy kydamu Jacó xirâ paru etyho nhesaguehonly. Mâkâ, imeom, eguy modo warâ taunlolâ myakâwândy paru nhenylymo, tâigewâsemo olâ. “Mâenyly-ro watay, iweloem tâiehoze tâise âmâ” mygueduo, “Jacó takaze ton-honreim urâ” myguelylâ awârâ —kely pekodo.

¹³Aituo Jesus aguely:

—Tâwâlâ lelâlâ wâne tatuanzeim modo xirâ paru ewy nhenylymo, inepa lâpylâ olâ ise satuandondylymo. ¹⁴Paru kâunduppy enywânibyry modo olâ ise natuandombyra. Inatagâdo oze aunlolâ paru egasely myara xirâ paru iwâgâ augueho. Deus agâpa nipyra tyenehonzemo mawânâ kâunduppy. Iguelymo-ro watay, Deusram idâzemo, aunloenlâ eagâ tâitomoem —kely.

¹⁵Aituo pekodo aguely:

—Awârâ paru ewy yam âundugâ wao. Arâ ise yatuambyra wawyly. Xirâ paru ese kâetombyra wawyly —kely.

¹⁶—Oso igâseda. Xarâlâ eagâ odopâgâ-ro warâ —kely Jesus.

¹⁷—Tusonuneba urâ —kely pekodo. Jesus aguely:

—Âkealâ, “Tusonuneba urâ” myguely. ¹⁸Cinco lelâ tusoneimbyry mawyly, tutuze urâ. Iwerâ ohogüimbyem inkâba âmâ uguondo eagâ mato agâ. Âkealâ amyguely —kely Jesus.

¹⁹Âdaunloem tawyly Jesus agueduo, pekodo âseguâdâdily. Eyam aguely:

—Iweâma tutuze urâ, Deus wâgâ agueim mawyly. ²⁰Xina idamudo Deus nhehoguedyly mykâinane xirâ iwy wâgâ. Âmaemo, judeu domodo olâ “Jerusalêmdâ lelâ ehoguedo” tâkeze. Âdaunlo unâka iozeno kuru? —kely.

²¹Aituo Jesus in-hoguly:

—Sainse mârâ Deus einwânni modo kuru âdykâingâlâ nhehoguedo, tarâ xirâ iwy Samaria donro wâgâ kulelâba, Deus ety Jerusalém donrodâ kulelâba warâ ise Deus ehoguedyly. ²²Âmaemo, Samaria donro modo, Deus ehogueze tâkewâze wâne âmaemo, mâuntuba olâ âmaemo mâkâ kuru. Xina judeu domodo olâ tutuze, tâinwânse warâ. Judeu ewylâ mawânkâ Deus Ingonotyby imakerinmoem. ²³Sainse mârâ Deus eynonro modo, Deus ize ato ara kehoem nhehoguedo. Anri awârâ aidyly adaguly-ro warâ. Âdara ioze ehoguedyly awyly xutuen-honze eagâmolâ ise Deus Ispiritury. Deus wâgâ enomedâzemo mâkâ. Awâkâ ioze lelâ ehogueni modo mawânkâ Deus ize ato tohogueniem. ²⁴Tâentuneim mâkeba Deus. Tyispirituryenlâ mâkâ ekaduo nhuduly. Deus Ispiriturygue lelâ Deus nhehoguedyly, ize ato ara kehoem, âkealâ adâkehobyry nhenehon-ho ara —kely.

²⁵Pekodo aguely:

—Tutuzelâ urâ, âdaralâ Messias, Deus Ingonotyby, saindyly awyly. Âewyly-ro watay, idânârâ kehoem ise Deus wâgâ kiuntudyze ato aguely —kely.

²⁶—Urâ agâ tunâgueim, Messiaslâ urâ —kely Jesus.

²⁷Mârâ ume kehoem xina odopâdyly, pyni sanânibyryem. Jesus pekodo agâ xunâgu tientuo, tâseguâdâze ani xina. Xina ezewenry keba mawânârâ pekodo tiuntudânry agâ tâdunâgu.

—Âdyka merâ agâ ize mato? —xina kepa olâ ani pekodoam.

—Âdaituoka awâkâ pekodo agâ ânâgu? —xina kepa gâlâ Jesusram warâ.

²⁸Aituo pekodo idâly, tywalu etary târâlâ nhânly. Xidadâam odopâdyly. Tonlo modoram aguely:

²⁹—Paru ese watay, uguondo âdykâ kâentyby keba xiotai. Idânârâ agânhetaymby modo wâgâ agueanry olâ. Etaungârâ. Messiaslâ keanra mâkâ —kely.

³⁰Aituo agui kurâdo xidadâ odaypa egaselymo. Idâlymo Jesus eydâ atoam.

³¹Pekodo idâpygueduo, xidadâ odano modo saindyly ume, xina aguely Jesusram:

—Anra xina nhanâtyby pyni. Kydâ-winduane, Konomedâni —xina kely.

³²Jesus olâ aguely xinaram:

—Mâenetybymo kâinwâpyra ise urâ. Tâlâ urâ mâenetybymo takaze kehoem, pyni koendonro. Âdy augueho awyly mâuntuba lelâ olâ âmaemo —kely.

³³Aituo xina aguely:

—Ânguylâ keanra ipyniry nenetai —xina kely.

³⁴—Ânguy ypyriry nenetaymba. Mâkâ ugononibyry agânhetoem aguehobyry aiedylylâ ypyriry. Idânârâ ize ato agânhetuo, âdy izetonze inkâba urâ, tuomare lelâ, âwinduatybyen-ro waunlo ara lelâ. ³⁵Wamyguelymo

inanry: “Quatro nunâ pygueduo kientâdyby kienkaunâdyly lelâ ise” myguelymo. Etaungâ akaemo âeni modo. Trigu ekaunâdo odaxi ityby emyenro akaemo. Iwerâ koendâlâ Deus itaumbryry eyanmo egatuhoem; iweâpa tâiseba itaungâ.

³⁶—Etânibyry, ekaunânibyry warâ tâzeywaozemo. Koendâ lelâ âze-kaunâdyly watay, tohomaenzemo. Arâ lâpylâ, waunroem ywâgâ egatuwâni-byry modo, ilâpyryem ywâgâ imâem kuru enomedânibyry modo warâ oho-maendyly ise, aguelymo idani modo yeinwândylygue. ³⁷Âkealâ wakehonly: “Mâkâ etâni, eagonro pylâ ekau-nâni-ro” kehonly. ³⁸Ogonodylymo, ywâgâ mâengatuhomoem. Eagonro ewanugue kulâ âgâmylymo, eagonro nhetâdyby kulâ mâenkaunâgylymo waunlo ara. Saguhoenlâ mawânkâ Messias saindyly wâgâ eagonro modo aguewâm. Unâ mâengatulylymo idani modo yeinwânsemo, amyguelymo tindadylygue kulâba olâ, saguhoem ywâgâ aguely tindatybymo tienâ-nâgueduomo —kely Jesus.

³⁹Samaria eynynonro, âtâ anary Sicar donro modo ewy agui myani Jesus Messiaslâ awyly einwânni modo, “Uguondo âdykâ kâentânry xiotai. Idânârâ agânhetaymby modo wâgâ agueanry olâ” pekodo keduo. ⁴⁰Imâem myani Jesus wâgâ tiuntudyze awylymo. Awylygue Jesusram taintuomo, tagâlâ itoem nhekadylymo. Aituo azagâ iguandyly Sicardâ nhakadyly.

⁴¹Mâkâ lelâlâ aguely tindatuomo, kurâ domodo nheinwândylymo Messiaslâ mâkâ awyly. ⁴²Pekodoam aguelymo:

—Mâkâ tâinwânse xina iwerâ, mâengatuyby wâgâ kulelâba olâ, xina lelâlâ nhenomedâdo tindatobyry wâgâ.

Tutuze xina, idânârâ tâinwânni modo emakeze âetyby awyly —kelymo.

Jesus pymâ emaryem tâwaneim imery kua nhetobyry

⁴³Târâ azagâ iguandyly sakani-byryem, Jesus agâ Samaria eynynâba xina egasely. Galiléia yan-yam eagâlâ xina idâly. ⁴⁴“Deus itaumbry egatuim tâinwântuneba ety anano modoram kuru” kely ani Jesus. ⁴⁵Galileiaram xina saintuo olâ ani tonlo modo koendâ kehoem xina nhedaenkulymo. Jerusalémram tâtâzemo myani, Páscoa etygueze. Tâensemo myani târâ Jesus anhetaymby modo. Awylygue koendâ nhedaenkulymo.

⁴⁶Aituo mârâ âjidâpa Jesus âxi-guely, xidadâ Canánra odopâdondyly, Galiléia eynynonroam, paru vinhuem tienehon-hombyryam. Tâlâ ani Cafarnaumdâ tâjikeim pymâ emary. Toenzepa myani imery ewânu.

⁴⁷“Judeiadâpa Jesus naindâ; Galileiadâ iwerâ” kely tindatuo myani pymâ emary Canánra idâly Jesus agâ agueze:

—Toenzepa ymery ewânu târâ Cafarnaumdâ. Yagâ wao inoro, kua mânhetoem —kely.

⁴⁸Jesus aguely eyam:

—Adyesenry agânhedyly mâen-tuomo lelâ yeinwândylymo —kely.

⁴⁹Tâwâneim nhunwym aguely:

—Iguezesesaji enra iegaseday. Iokobagâ inoro, iguely iraynâlâ! —kely.

⁵⁰—Tadahulizeba ikâ. Ityam odopâgâ lelâ. Ipa, âmery kua nitai, niguwâpyra ise —kely Jesus.

Tâwâneim nhunwym Jesus tymery kua ienipyryem awyly nheinwândyly, eydâ iwague awyly umelâ. Aituo odopâdyly tâtyam. ⁵¹Ânwa oze

tâmary modo agâ oxiodyly. Aituo aguehonly:

—Âmery niguwâpyra! —kelymo.

⁵²Aituo adapâigueolyo:

—Âdara hora awyly umeka keankâ ymery koendâ idyly? —kely.

Aituo in-hogulymo:

—Kopaelâgâ, kogoneyam tokalâ hora awyly umelâ keankâ iaturu in-moly —kelymo.

⁵³Aituo iamudo nhunwym mârâ kogonekâlâ Jesus “Âmery kua nitai. Niguwâpyra ise” kehobyry nhenânguely. Aituo Jesus einwânniem idyly, idânârâ ety odano modo lâpylâ warâ.

⁵⁴Judéia yan-yam tâtâly iraynâ adyesenry aiemâlâ Jesus Canádâ paru vinhuem tyenehonze. Galiléia yan-yam odopâdondybyem, azagâ adyesenry anhedily idyly ani Canádâ, pymâ emary imery kua nhedyly.

Jesus uguondo adakobâdânry kua nhetobyry

5 ¹Pymâ emary imery kua ienipyryem Jesus idâly Jerusalémram, âtyam. ²Jerusalémdâ, Ovelha Modo Iwyantary keho iwaguepa tâlá mawânâ paru etary. Hebraiku-em, “Betezata” mârâ paru etary ezedy. Cinco lelâ varanda modo, târâ mawânkâ tâwânuneim modo emynru eguetunu warâ. ³Mârâ âjiam Jesus idâday, toenzepa tâwânuneim modo onwâgâ awyly: epy modo, nadakobâbyra ityby modo, tywykelâ iazepy modo warâ. [Paru sahugânyly inwânwândylymo. ⁴Anju Deus ingonotyby mawânkâ mykâinane tytâguyze mârâ paru sahugânize. Anju anhepygueduo mawânkâ tâwânuneim modo ihuguely; paikaji waunroem ihuguebylâ olâ kua ini.]^c ⁵Tâlâ ani iduaymo uguondo iweâpa tâwâneim; trinta e oito

^c 5.4 Idânârâ livru saguho modo wâgâ iwenibyemba xirâ.

anu myani mâkâ ewânu; nadakobâbyra awyly. ⁶Eguetudybyem awyly ume Jesus nhedyly. Iewêpa arâ ewânu awyly nhutuly. Aituo eyam aguely:

—Kua midyze âmâ? —kely.

⁷Uguondo in-hoguly:

—Ânguy paikaji yeni peba adahugânioduo. Iegawândyze wâne urâ, eagonro tâwâneim olâ inanry uwakadâ lelâ —kely.

⁸Jesus aguely eyam:

—Aukâ. XYDYK ikâ. Iguetudobyry sanâkâ. Idâ ityam tadakobâze —kely.

⁹Ilâ umelâ kehoem, uguondo kua idyly Jesus eon-honrugue. Tôguetudobyry nhanâdyly, adakobâdyly. Sábado oday ani awârâ aidyly, kokobyzegueho âdaunloenlâ kydâsewaniho keba ume. ¹⁰Judeu domodo iwymâry ewy mâkâ uguondo tâguetudobyry nhanâdyly nhedylymo. Awylygue eyam aguelymo:

—Kokobyzegueho iwerâ. Kâzewenry ara inkâba awârâ amidyly, âdy aieto mâkeba iwerâ awârâ iguetudobyry kadadâ —kelymo.

¹¹Aituo aguely:

—Uguondo kua yenipyry agueanry: “Iguetudobyry sanâkâ. Idâ ityam tadakobâze” keanry —kely.

¹²—Ânguyka enra arâ amitoem agueim? —kelymo eyam.

¹³Kua tyenipyry ezedy nutuba olâ mâkâ uguondo, tonlo modo duaylâ Jesus idâppyem awylygue.

¹⁴Ilâpygueduo Jesus kua tientyby nhedyly Deus etydâ. Aguely eyam:

—Aguely wao idakâ. Kua itybyem âmâ. Deus izepa ato kulâne akâiedâ, arâ matobyry takaze kehoem amipyra mitoem —kely.

¹⁵Jesus aguepygueduolâ mâkâ uguondo târâpa âxiguely. Kua tyenipyry wâgâ agueze idâly judeu domodo iwymâryam. ¹⁶Jesus nhewiâsedylymo

nhenuagaendylymo warâmo myani, tâzekobyzegueho oday kua nhedyly awylygue. Awylygue eynynâ inakanhe aguelymo:

¹⁷Jesus aguely eyanmo:

—Kopa elâgâembaba Pabai âsewanily; ara lâpylâ iewanu kâempagunâbyra wawyly —kely.

¹⁸“Pabai ugueho” Jesus keduo, Deuslâ agueho awyly tutuzemo ani. Awylygue toenzepa iewiâpadylymo, âdara tyânly awyly wâgâ âseinwândylymo, tâzekobyzegueho oday kua nhetobyry wâgâ kulelâba, Deus “Pabai ugueho” kehobyry wâgâ lâpylâ. Arâ adâkeduo, Deus agâ âzekiba tawyly mawânkâ Jesus agueho.

**Deus imery idânârâ
anhedyly, Deuslâ anhetoem
agueim awylygue**

¹⁹Jesus aguely:

—Deus imery lelâlâ wâne urâ, won-honrugueba olâ âdydo imeom agânhedyly. Pabailâ agânhetoem agueim. Pabai anhedyly kâenkyly lelâ agânhedyly. Mâkâ anhekyly, adyese urâ, imery wawylygue. Xirâ mâuntudyzemo kuru wato. ²⁰Imery wawylygue, toenzepa Pabai ywyndyly. Awylygue idânârâ adienkyly modo nhenehonly. Agânhetyby modo tâense âmaemo. Pabai yam nhenehonly aiese olâ urâ, mârâ iwâkuru kuru. Mârâ agânhetuo, âsewânize lelâlâ âmaemo. ²¹Iguewâtyby modo, kurâem tyetonze Pabai. Turâ xurâ modo aunloenlâ tagâ tyenehonze mâkâ. Pabai anheto aralâ agânhedyly. Aituo ise aunloenlâ Deus agâ kânhenehonly, mâkâ eagâ kânehonzyze wato lelâ. ²²Xyry etay Pabai mâkeba ise ânguy tâmakezem, tâmakezenry warâ awyly agueim. Aunloenlâ eagâ ini modo

kâinduakehoem, âji tâdâsenagazedoam idâwâni modo kâinduakehoem warâ agueypyenlâ mâkâ. ²³Arâ Pabai agânhehoem aguely, idânârâ yrendylo mawânkâ ize ato, mâkâ mâynrentomo ara lâpylâ. Yrempyra âmaemo-ro watay, Pabai ugononibyry mâynrentaymba lâpylâ âmaemo —kely.

²⁴Jesus aguely:

—Aguely indadyly, ugononibyry nheinwândyly waunlo âdaunloenlâ Deus agâpa tyetuneba ise. Iguely-ro watay, aunloenlâ ise Deus agâ awylymo. Âdalâ âji tâdâsenagazedoam nâtâwâbyramo ise. Xirâ mâuntudyzemo kuru wato. ²⁵Idataungâ aguely. Anri adaguly, Deus eynynâbaom modo augueho indato. Deus xurâempa awylymogue, igueypy aramo kulâ. Aguely indadylymo, yeinwândylymo warâ watay olâ, igueypyem, kurâem itondyby aramo ise. ²⁶Âdaunloenlâ Deus agâpa tyetunebamo ise, iguely iraynâ, igueduo alelâ, ton-honre mawânkâ Pabai awârâ adientoem. Ynynonro modo Deus agâpa kânhenhomba witoem aguewâm lâpylâ. ²⁷“Uguondo Kaynâpa Âetyby mawylygue, aguely âyam, âynynonro modo xurâem koendonro lelâ mâunduhomem; âynynonro keba modo pylâ ise mâenagazenehonly-ro” kewâm.

²⁸—Xirâ âyanmo augueho wâgâ tâseguâdâzeba itaungâ. Anri saindyly, idânârâ iguewâtyby modo ytaumbyry indato. ²⁹Kurâem itonzemo. Âji tâpyâdomobyrydâpa âzepyâguezemo, egasezemo-ro warâ. Deus ize ato aienibyry modo aunloenlâ ise Deus agâ awylymo, âdaunloenlâ eagâpa tyeseba itomoem. Deus izepa ato aienibyry modo olâ âzewentâozemo. Âjigonohonzemo âji tâdâsenagazedoam, aunloenlâ târâ itomoem —kely Jesus.

Deus Ingonotyby tawyly wâgâ Jesus aguehobyry

³⁰Jesus aguely:

—Unâry wâgâ kulâ inkâba idânârâ agânhekyly modo agânhedily. Deus aguehobyrylâ agânhekyly. Yeinwântaynrim modoram koendonro lelâ ise kâunduly; yeinwântânry modo pylâ kâenagazenehonly-ro warâ. Pabai aguehobyry lelâ mawânârâ agânhekyly. Ize wato kulâ mâkeba agânhekyly, mâkâ ugononibyry ize atolâ.

³¹—Ywâgâlâ aguely-ro watay, “Deus ingonotyby urâ” ugeduo, auguehobyry âdyem nitaymba, âkealâ keim kepa watay. ³²Tâlâ yynnâ agueim, Deus, Pabai ugueho. Ânguy wawyly tutuze mâkâ. Ywâgâ agueho âkealâ awyly tutuze urâ-ro warâ. ³³Ânguy wawyly mâuntuhoem, João Batista tapâiguen-honze ani âmaemo. Âkealâ ani mâkâ ywâgâ aguely. ³⁴Ywâgâ aguenriem ânguygue kâtuiwâbyra urâ, ânguyem wawyly mâuntuhoem. Arâlâ olâ yynnâ João aguehobyry âyanmo kâenanâguehonly. Aguehobyry mâinwândylymo, yeinwândylymo-ro warâ watay, âzmakeoze lelâ âmaemo.

³⁵—Lamparina koendâ kehoem tyatygueim wâne, kytâho nhesagonly, myara ani João aguehobyry mâuntu-lymo âdara Deus ezaxi tâdâtâly wâgâ. Mâkâ aguehobyry mâindatuomo omazemo. ³⁶Âdiempa mutumo ywâgâ. Iwerâma adyesenry kehoem agânhedily tâense âmaemo, âkealâ kuru Deus Ingonotyby wawyly mâuntuhoem. Pabai Deus adyesenry modo kehoem agânhehoem anygue. Mâentuomo, xutuze âmaemo, Ingonotybylâ wawyly. ³⁷Pabai ywâgâ adâkeze lâpylâ, mâkâlâ ugononi awylygue. Agueho mâindadyseba olâ âmaemo,

nhutuen-honly mâuntudyzebamo warâ. Âdykâ mâkâ itanru mâindapyra, emydy mâempyra warâ olâ âmaemo. ³⁸Ywâgâ Pabai aguehobryr mâinwândylymo-ro watay, yeinwântâ tâise âmaemo. Yeinwâmpyra, ywâgâ Pabai agueho mâinwâmpyra warâ olâ âmaemo. ³⁹Âdara mâsemaguelymo awyly mâuntudyze mawlymogue, Deus itaumbryr awo wâgâ iweniby mâintainlymo. Mâsenomedâdylymo, âdara aunloenlâ Deus agâ tâjidyly kyigueduo awyly mâuntuhomoe wâne. Iweniby modolâ ywâgâ âkealâ agueim, ywâgâ lelâ mawânâ Deus eydâ atoam tâdâtâly. ⁴⁰Aralâ olâ, yeinwândyseba mawlylymo, aunloenlâ Deus agâ mitomoem.

⁴¹—Koendâ wawyly wâgâ, won-honru wâgâ warâ kurâdo aguepa awylygue kâseguâdâdaymba urâ. ⁴²Koendâ âtudâmo urâ, angahumo oday âunârymo alelâ. Deus izetonro ara midylymo kulâ awyly, tutuze urâ. ⁴³Pabai ugueho ingonotybyenlâ xirâ kâewyly, yizepa, yeinwândyseba warâ olâ âmaemo. Pabai ingonotybyemba âeni watay olâ âmaemo tâinwânse. ⁴⁴Ataen-homo âwâgâmo koendâ aguely ize matomo. Deus toka leom âwâgâmo koendâ aguehoem, koendâ lelâ amidylymo mipyra olâ âmaemo. Awylygue mawânâ nudupa awyly yeinwântomoem. ⁴⁵Kâzewenry Moisés inwenihoem Deus aguehobryr mâinwânkylymo. Awylygue, “Aunloenlâ Deus agâ tâitoem idâze xina” myguelymo. Xypyry etay, idânâ kurâ domodo Pabai enado âpanâgueduo, urâ keba ise agueim, Moiséslâ ise agueim: “Deus neinwâmpyra atomobryr wâgâ asaemo ise tâwentâzeim” kerim. ⁴⁶Ywâgâlâ myakâwândy Moisés inwenily urâ Deus Ingonotyby wâgâ. Moisés inwe-

niby tâinwânse lelâlâ âmaemo-ro watay, yeinwântâ lâpylâ tâise âmaemo. ⁴⁷Inweniby mâinwâmpyra mawlymogue, augueho mâinwâmpyra mawlylymo —kely Jesus.

Jesus cinco mil uguondo modo cinco pão, azagâ kanra âjihuyby warâgue nhuantobryr

(Mt 14.13-21; Mc 6.30-44; Lc 9.10-17)

6 ¹Arâ agueppyem, Jesus Galiléia iwalu nhekuâdyly pepi oday; Tiberíades kelygue tâzekeim lâpylâ mârâ paru. Eagâlâ ani xina. ²Târâ Jesus awyly tiuntuuomo, agui kurâ domodo myarâ idâly, toenzepa tâwânuneim modo kua nhedyly tientomobryr wâgâ. Adyesenry anhedyly tientondyze tawlymogue, nhapygue idâlymo. ³Jesus âkuly iwy onwa xina agâ. Târâ xina ekadyly. ⁴Páscoa etyguedo iwaguepa idyly ani. ⁵Jesus wayam wayam warâ MYK idyly. Tyampygue toenzepa kurâ domodo iwy onwa âkuly nhedyly. Aituo Filiperam aguely:

—Âdykâ kaise pyini kianâdyly merâ kurâ domodo ipyniryem? —kely.

⁶Kurâdo tuantoem âdy adienkyly awyly tutuzelâ olâ myani Jesus-ro warâ. Âdara Filipe in-hoguly awyly tiuntuhoem kulâ arâ aguely.

⁷Aituo Filipe in-hoguly:

—Duzentas moedas pratagueto tainze tâise kurâ, pyini sanâtoem, mâkâem, mâkâem warâ pão epajiwâdoem, tydinheruguepa kurâ —kely.

(Tokalâ iguandyly âwanopyry epywado mawânâ tokalâ moeda pratagueto.)

⁸Aituo Simão Pedro iukono André idâly Jesus agâ agueze.

⁹—Tâlâ tarâ iamudo cinco pão cevadagueto, azagâ kanra âjihuyby

warâpeom. Nudupa olâ ise toenzepa kurâ domodo xuatoem —kely.

¹⁰Aituo aguely Jesus xinaram:

—Âji iwâkurudâ ekadomoem agewâtaungâ —kely.

Poji wâgâ ekadomoem âji iwâkurube ani târâ. Aituo idânârâ ekadaynlymo. Toenzepa târâ kurâdo awyly, uguondo modo kulelâ cinco mil lelâ. ¹¹Aituo Jesus cinco pão sanâni-byryem, Deus agâ aguely:

—Koendonro lelâlâ âmâ, Pabai; awylygue xinaem xirâ pão mâunduly —kely.

Arâ agueypyem, pão nhepajiwâdyly; xina nhepâdoem nhuduly. Xina nhepâdaynly umelâ kehoem Jesus pão epajiwâdyby agui nhenehonly. Ilâpygueduo, Jesus azagâ kanra âjihuyby nhanâdyly, Deus agâ aguely:

—Koendonro lelâlâ âmâ, Pabai; awylygue xinaem merâ kanra mâunduly —kely.

Arâ agueypyem, kanra nhepajiwâdyly, xina nhepâdoem nhuduly. Xina nhepâdaynly umelâ kehoem, kanra agui nhenehonly. ¹²Ize tato ara kehoem idânârâ kurâdo âwinduadyly. Kanra âjihuyby nhâdylimo; pão nhedawynlymo; koendâ kehoem iolataynlymo warâ. Koendâ kehoem âwinduapygueduomo, xinaram aguely:

—Âsegubydâdyby modo saunkuwâdaungâ, nâxiumebyra itoem —kely.

¹³Ilâpyryem pão, kanra âjihuyby warâ âsegubydâdyby xina nhetadâdyly. Doze cestu tumyke lelâ xina nhekanâdyly.

¹⁴Awârâ adyesenry Jesus anhedyly enipyry modo aguelymo:

—Âkealâ mynra, Deus itaumbry egatuim kinwânwânkylylâ mynra merâ. Roma donro takaze kehoem merâ kywymâryem kyjiene! —kelymo.

¹⁵Tywymâryem tyese kelymo tiuntuduo, mâkâ kulelâ târâpa âxi-

guely, eagonro âjiam idâly. Pymâ onro anano keba tawyly, tutuze mawânkâ.

Jesus paru wâgâ adakobâdobyry

(Mt 14.22-33; Mc 6.45-52)

¹⁶Iguandyly ume, târâ Jesus cinco pão, azagâ kanra warâgue kurâ domodo nhuantobyrydâpa xina xytâguyly. Galiléia iwaluam xina idâly.

¹⁷Jesus xina agâ nâpepyra. Pepi odaxi xina âxiedyly, paru tienkuâdoem, xidadâ Cafarnaumram tâtâhoem. Xina idâzesedyly umelâ, iama-dyly. ¹⁸Tahuleim kulâ adapezeinly ton-honre kehoem xina yan-yam; toenzepa kehoem paru adahugânily.

¹⁹Sagunudâpa âxigüeybyem, cinco, seis kilômetros awârâem xina awyly ume, paru wâgâ Jesus adakobâdyly xina nhedyly. Xina iwepiry iwaguepa saindyly. Jesus paru wâgâ adakobâdyly tientuo, toenzepa xina âseanedyly.

²⁰Warâ olâ Jesus aguely xinaram:

—Tâseanezeba itaungâ! Jesuslâ urâ! —kely.

²¹Aituo Jesus pepi odaji âxiedyly. Toenzepa xina iomazely, mâkâ tagâ awylygue. Inepa xina saindyly eyam tâtâhoam.

Kurâdo Jesus nhuin-hobyry

²²Emetybyem, Jesus tuizemo myakâwâm târâ paru emelay, xina pepi odaxi âxiedobyrydâ.

—Âdykâ Jesus? —kelymo.

—Tokalâ kulâ keankâ pepi taunlo. Jesus olâ keankâ iodaxi nâxiebyra. Eynynonro modo lelâ keankâ âxieni. Mâkâ pebalâ keankâ idâlymo. Iwerâ olâ tarâpa —kelymo.

²³Aguelymo ume, xidadâ Tiberíades-dâpa âetyby modo paru nhekuâdylymo. Tywepiry odaypa âzetywâdylymo, Jesus kurâ domodo tuantoem, “Koendonro lelâlâ âmâ, awylygue xina ipyniry

mâunduly” kehobyry iwaguepa. Xuize idâwânмомы, nypyramo olâ myakâwâm.

²⁴Jesus, xinalâ warâ târâpa awyly tientuomo, Tiberíadesdâpa âetaymby modo tywepiry odaji âxiedaynlymo, paru tienkuâdoem. Cafarnaum iduan-taji saintybyem xuize idâlymo.

Jesus ize kydawyly, pyni kyiguepa kitoem ize kydato ara

²⁵Paru ekuânibyryem, Cafarnaumram saintybyem, Jesus agâ oxiodylymo. Eyam aguelymo:

—Âmâ enra xina nhuinly, Jesus. Âdaraka xará aindyly? —kelymo.

²⁶—Kopaelâgâ pâogue âwatomo-byry wâgâ kulâ uilymo, âdaituo adyesenry modo kehoem agânhedyly awyly mâuntuhomoem inkâba. Pão agui kânhenehonly medâmo lelâlâ wâne, adâituo agânhedyly awyly mâuntuba olâ âmaemo. ²⁷Pyni inepa adainrim, inakanhe ini warâ wâgâ inkâba âpaunzedaugâ. Tâlâ ise pyni emyenro âmaemoem, âdaunloenlâ inakanhe itânry. Emakewâni modo aunloenlâ Deus agâpa tyetuneba ise. Igueduo, aunloenlâ eagâ tâitoem eyam idâzemo. Âzeon-hondâdaungâ, xirâ augueho tâlâ mitomoem. Urâ, Uguondo Kaynâpa Âetyby kelygue tâzekeim, xuduze urâ âyanmo, yeinwândylymo-ro watay. Awârâ agânhetoem kâewyly awyly nutuen-ho Pabai Deus —kely Jesus.

²⁸Aituo Jesus nhapâiguelymo:

—Âdyka Deus xina anhedyse ato awârâ amyguehobyry xina nhemakehoem, awârâ pyni emyenro? —kelymo.

²⁹Aituo Jesus in-hoguly:

—Âdaunlo âwanu mâkeba ise amânhekylymo. Yeinwândylymo kulâ Deus ize ato, urâ mâkâ ingonotyby —kely.

³⁰—Adyesenry pylâ aiekâ, Messiaslâ mawyly, xina nheinwântoem. Âdyka ise

amânhekyly, Deus Ingonotyby mawyly mâenehon-hoem? ³¹Iweâpa kydamudo Egitodâba egaseday, âji âdy peba ato einkâ adakobâdaymo, manâ myakâwândy ipynirylo. Iwenibyem Deus itaumbry awo wâgâ: “Pão kaynâpa eyanmo ingonokyly nhedawyn-homoem” —kelymo Jesusram.

³²Aituo Jesus aguely:

—Kaynâpa Deus ingonotyby manâ kehogue, kydamudo xumâmý Moisés. Pabai Deus lelâ mawânkâ pyni kuolanâni emyenro xudunri. Xirâ mâuntudyzemo kuru wato. ³³Deus, kydamudo tâwindygue niguepa itoem manâ kau odaypa tingonotobyry, ara lâpylâ mâkâ ugonodyly xará onro anaxi. Pyni ize kurâ kyiguepa kitoem, arâ lâpylâ yeinwântaungâ, aunloenlâ Deus agâ mitomoem, âdaunloenlâ eagâpa mipyra mitomoem —kely.

³⁴—Pymâ, aunlolâ awârâ amygueho xinaram xudugâ, awârâ pyni mygueho —kelymo.

³⁵—Urâlâ mawânâ mârâ pyni emyenro. Urâlâ ise yeinwânni modo aunloenlâ Deus agâ ienehonri, eagâpa ienehondânry warâ. Ynynonro modo nâsewinzedon-daymba natuandondaymba warâ ise. ³⁶Deus eon-honrugue agânhedyly mâendylymo umelâ olâ auguehobyry mâinwândyseba mawylymo. ³⁷Idânârá yeinwânniem Pabai ize ato modo, urâ xurâ lelâ. “Yam âetaungâ, aunloenlâ yagâ mitomoem” warâ auguely yeinwândyzedo modoram. Yam âetaymby modo âdaunloenlâ izepa witaymba urâ.

³⁸—Deusdâpa ani kâewyly, ize ato agânhetoem, ize wato aiese inkâba. ³⁹Pabai koendâ yeinwântaynrim modo kâendylyse awyly. Ynynonro modo tydâpa iedyly ize inkâba mâkâ. Xypyry etay, ynynonro modo kurâem kânhetondyze mâkâ, aunloenlâ eagâ

itomoem. ⁴⁰Pabai ize ato mawânâ idânârá tymery einwânni modo, aunloenlâ eagâ awyly, eagâpa nipyra. Aguehobyry awylygue ise xypyry etay kurâem kânhetondylymo —kely Jesus.

⁴¹Judeu domodo ewy nehoguebyra Jesus tywâgâlâ aguely: “Urâlâ Deus tydâpa ingonotyby pyni emyenro” kehobyry. ⁴²Aituo aguelymo:

—José imery kulâ awâkâ Jesus. Nhunwym, ise warâ tutuze kurâ. Alâ “Deusdâpa kêwyly” kely. Kewâdyly kulâ awâkâ. Nuduwâpyra awâkâ Deusdâpa âtoem! —kelymo.

⁴³Jesus aguely eyanmo:

—Inakanhe kulâ amyguelymo imowâdaungâ. ⁴⁴Âwâlâ kulâ ânguy yeinwântaymba, Pabai ugononibyry yeinwântomoem aniempyry watay. Pabai ugononibyry mawânkâ kurâdo yeinwântoem aienehoim. Xypyry etay olâ kurâem itondomoem aienehonze urâ. ⁴⁵Saguhom Deus itaumbryry aguewâni modo ewy warâ akâwândy inwenily: “Idânârá ise Deusram âzenomedâolyo, âdara einwândyly awyly wâgâ.” Idânârá Pabai nhenomedâdo idani modo, tyangahu odaji ieni modo warâ yeinwânsemo. ⁴⁶Ânguy xirâ anano modo Pabai ugueho netaymba. Urâ lelâ mâkâ eni. Eydâlâma kêwyly.

⁴⁷— I d a t a u n g â a g u e l y .
Yeinwântaynrim modo Deus agâpa nitaymbamo ise. Igueduo, Deusram idâzemo, aunloenlâ eagâ itomoem. ⁴⁸Pyni emyenro urâ. Urâlâ ise yeinwântaynrim modo aunloenlâ Deus agâ ienehoim. ⁴⁹Âji âdy peba ato einkâ tadakobâdyly ume manâ myakâwândy kydamudo ipyniry. Manâgue âduahonwânmo lelâlâ wâne, iguewânmo olâ. ⁵⁰Deusdâ âetyby einwânni modo, iguezemo lelâlâ wâne, nadaimpamo olâ ise. Idâzemo aunloenlâ Deus agâ tâitomoem. Pyni emyenro mawânkâ Deus Ingonotyby. ⁵¹Pyni

emyenrolâ urâ on-hondâzemo Deus ingonotyby. Yeinwântaynrim modo Deus agâpa tyetuneba ise. Iguelymo-ro watay, idâzemo Deusram, aunloenlâ eagâ tâitomoem. Yiguely ise, ynynonro modo aunloenlâ Deus agâ itomoem. Ynynonro modo eon-hondâniem, wodo pylâ ipyniryro-ro waunlo ara ise —kely Jesus.

⁵²Aituo idanipyry modo âjigüe aguelymo:

—Kypyniryem nitaymba ise awâkâ sodo! —kelymo.

⁵³Jesus aguely eyanmo:

—Wodo mâmpyra âmaemo, unu mâenypa âmaemo warâ-ro watay, aunloenlâ Deus agâ mitaymba ise âmaemo. ⁵⁴Wodo sâni, unu enyim warâ olâ aunloenlâ ise Deus agâ awylymo, eagâpa tyesebamo. Xypyry etay ise kurâem âiehondylymo-ro warâ. Xirâ mâuntudyzemo kuru wato —kely.

⁵⁵Jesus aguely:

—Pyni lelâlâ wodo, tânyzeim lelâlâ unu warâ. ⁵⁶Wodo sâni, unu enyim warâ watay, aunloenlâ ise yagâ awyly. Eagâlâ ise urâ; yagâlâ ise warâ. ⁵⁷Pabai ugononibyry igueypyem inkâba; aunlolâ mâkâ tâlâ awyly. Eagâ wawylygue, kadainwâpyra ise urâ; tâlâ lelâ. Wodo sâni modo lâpylâ yagâpa nipyramo, nadainwâpyramo warâ ise, tâlâ lelâ. Iguelymo-ro watay, eydâ watoam idâzemo, aunloenlâ yagâ tâitomoem. ⁵⁸Waunlo urâ pyni emyenro Deus eydâ atodâ igonotyby. Kydamudo ipynirybyry manâ emyenro keba urâ. Manâ tâinzemo lelâlâ wâne myakâwândy kydamudo, iguewâm olâ. Deus ezaypa xytâguybylâ urâ. Wodo sâni, unu enyim warâ yagâpa nâiehowâbyramo ise. Tyigueduo, idâzemo aunloenlâ Deus agâ tâitomoem —kely Jesus.

⁵⁹Cafarnaumdâ Jesus xirâ modo aguely, âtâ tâdâtâdyguyho oday tienomedâdylymo ume.

**Jesus mawânkâ aunlolâ
Deus agâ kyenehoim**

⁶⁰Awârâ tindatuo, Jesus nhapygueni modo ewy aguelymo:

—Arâ aguedo kiuntuwâbyra kurâ âdakeze aguely awyly. Kieinwântoem nuduwâpyra awârâ! —kelymo.

⁶¹Akaemo agueho ânguy negatuba lelâlâ wâne Jesusram, tonomedâdomo izepa awylymo tutuze olâ Jesus. Awylygue eyanmo aguely:

—Iwerâ yeinwântaymba âmaemo, augueho mâindadyseba midylymo warâ. ⁶²Âdaise wânkâ âmaemo, eydâ watobyryanlâ kâkuly mâentuomo?

⁶³Deus Ispiritury wâgâ mawânkâ ynnonro modo yeinwândylymo, âdalâ yagâpa nâiehoba tâtomoem. Igeduomo, Deus ezaxi idâze awylymo tutuen-honze Deus Ispiritury. Ânguy tâwâlâ kulâ âsemagueim lâpeba; ânguy tâwâlâ anientaymba Deus eydâ atoam tâtâhoem. Auguehobry einwânni, aieni modo warâ agâlâ mawânkâ Deus Ispiritury. Deus Ispiritury agueduo lelâ akaemo âze-makeoly, aunloenlâ Deus agâ tâitoem tyigueduo. ⁶⁴Alâ olâ âmaemo ewy yeinwâmpyra mawylymo —kely.

Tâinwâmpyramo awyly wâgâ Jesus aguewâm, tutuzelâ mawânkâ akaemo ewy tâinwâmpyra awyly. Ânguy tâgameim awyly xutuwâm lâpylâ.

⁶⁵Jesus aguely:

—Âmaemo idânârâ inkâba yeinwândylymo. Awylygue âyanmo aguely. Pabai, yeinwântoem aguehobry modo lelâ yeinwânni —kely.

⁶⁶Awârâ tindatuo, Jesus aguely idase nhapygueni modo ewy agui eagâpa tâisemo ani.

⁶⁷Aituo Jesus xina nhapâiguely:

—Âmaemo-ro? Mydâdyse lâpylâ âmaemo? —kely.

⁶⁸Simão Pedro in-hoguly:

—Agâpa tâidyse inkâba xina, Jesus. Âmâ lelâ âdara aunloenlâ Deus agâ xina idyly awyly wâgâ enomedâni, âdalâ eagâpa xina nipyra itoem. ⁶⁹Âmâ lelâ xina nheinwânkylly. Deus Ingonotyby mawyly, tutuze xina —kely.

⁷⁰Jesus aguely:

—Kâinduakeyby âmaemo, doze lelâ. Tokalâ âmaemo ewy olâ Diabu emary —kely.

⁷¹Judas wâgâ Jesus aguely, Simão Queriete donro imery. Jesus eynnonro lelâlâ wâne Judas, arâlâ olâ izepanro modo emaxi Jesus nhegamely nhâhomoem.

Jesus, iukonodo warâ

7 ¹Arâ adâkely ewanikeimbyryem, Galiléia eynynâ Jesus adakobâdyly. Judéia eynynâ nadakobâbyra awyly, tonlo pymâ domodo mawânkâ tyândyse. ²Âty Âtâ Wakurigueto etyguedo iwaguepa ani, kydamudo âji âdy peba ato einkâ adakobâdaymo, âtâ wakurigueto oday kulâ xykyhomobry enanâgueho. ³Aituo Jesus iukonodo eyam aguelymo:

—Tarâpa ikâ. Judeiaram idâ, xidadâ Jerusalémram, Judeiadâ matay ampyguenibyry modo amânhekyly nhetomoem. ⁴Mâkâ kurâ tâdutuodyze donro, adienkyly noentaymba, kurâ domodoram tâzehohoem. Aunlolâ inanry adyesenry kehoem amânhe-dyly; kurâ domodo enanaym pylâ aiekâ —kelymo.

Âwankuem tiendylymogue kulâ, arâ aguelymo. ⁵Iukonodo lelâlâ wâne, Jesus Messiaslâ awyly neinwâmpyramo olâ.

⁶Jesus aguely:

—Âtyam udâho oday inkâba awârâ. Âmaemo olâ âdalâ mydâlymo. ⁷Yeinwântânry modo âizemo lelâ, urâ olâ yizepamo. Anhekylymo inakai

wâgâ auguelygue, yizepa awylymo.
⁸Âmaemolâ âtyam idâwâtaungâ. “Idâ”
 mygueduomo kulâ inkâba ise âtyam
 udâly; Pabai ugonotuo ise udâly —kely.

⁹Arâ adâkebygueduo, Galileiadâlâ
 wao Jesus iweâpa kuba olâ târâ awyly.

**Jesus âtâ wakurigueto
 etyryam idâhobyry**

¹⁰Âtyam tukonodo idâpygueduo,
 Jesus idâwâm lâpylâ. Tutuzebalâ idâly,
 kurâdo nutubalâ. ¹¹Judeu domodo
 iwymâry âtydâ nhuinlymo. Tonlo
 modo nhapâiguelymo:

—Âdykâ Jesus? —kelymo.

¹²Toenzepa iwâgâ aguewâni modo.
 Aguelymo:

—Koendonro lelâlâ mâkâ —keim.

Tâlâ,

—Koendonro mâkeba mâkâ, kono-
 kuni kulâ —kewâni modo warâ.

¹³Tutuzenryenlâ Jesus wâgâ
 aguelymo, pymâdo indadyseba
 tawylmogue. Jesus wâgâ adâkeduo,
 tânagazedily tyntadylmogue.

¹⁴Âty quatro iguandyly sakadybyem
 awyly ume, Jesus idâly Deus etyam.
 Târâ taseray âtâdyguyby modo nhenom-
 edâdyly. ¹⁵Pymâdo Jesus aguely
 tindatuo âsewânilymo; warâ aguelymo:

—Kydâsenomedâdobyry ara nâse-
 nomedâdaymba awâkâ, toenzepa olâ
 enomegu! Âdaraka awâkâ enomegu?
 —kelymo.

¹⁶Aituo Jesus in-hoguly:

—Unârygue kulâ inkâba xirâ kâeno-
 medâdylymo. Deus ugononibyry,
 “Aguekâ” kehobyrylâ, augueho. ¹⁷Pabai
 ize ato aieni modo xutuzemo Deus
 “Aguekâ” kehobyry augueho awyly; yan-
 gahu oday unâry kulâ mâkeba augueho
 awyly. ¹⁸Tunâry tyangahu odano kulâ
 tagonroam egatuim tonomery wâgâ
 koendâ adâkehon-hoem kulâ aguely.
 Aunlo mâkeba olâ urâ. Unâ egatuim

konokuni keba watay, tunâry kulâ
 mâkeba agueho, tugononibyry agueho-
 byrylâ. Tugononibyry mâkâ ehoguedyze
 ato, mâkâ mâkeba. Unâ egatuin-em
 Deus ingonotyby urâ. ¹⁹Moisés myakâ-
 wândy Deus aguiendyse ato kâzewenry
 iweninri. Âmaemo olâ kâzewenry
 agueho mâinwâmpyramo. Yâze mygue-
 lymo, âdawipyralâ —kely.

²⁰Kurâ domodo aguely:

—Tuândy kulâ âmâ! Diabu agonro
 keanra âmâ, arâ amyguehoem! Ânguy
 âze kewâpyra —kelymo:

²¹—Iweâ kulâ keankâ adyesenry
 agânhedyly. Tâwâneim kua kânhedyly.
 Tâzekobyzegueho oday agânhedyly
 awylygue mâseguâdâdâmo, yagâ
 âewiâpadâmo-ro warâ. ²²Deus aguien-
 dyse ato kâzewenryem saguhoenlâ
 Moisés iweniwâm. Warâ tâzezewenry
 wâgâ iwenibyem awyly: “Iamudo
 iwelo egaseyby tokalâ semana ipy-
 gueduo ilery ety iopiry satâwâdaungâ,
 Judeu tawily nhenehon-hoem” kely.
 Moisés agâ inkâba kâzewenry tâjilery
 ety iopiry satâly adaguly, kydamudo
 agâlâ. Iamudo tokalâ semana ipy-
 gueduo, kâzewenry agueho arâ ilery ety
 iopiry mantâlymo, tâzekobyzegueho
 umelâ. ²³Iamudo ilery iopiry ety tâze-
 kobyzegueho odaylâ kehoem tatâze
 âmaemo watay, nhewentâdaundâ, tâze-
 kobyzegueho odaylâ tâwâneim kua
 kânhedylygue. ²⁴Inakanhe aini mâen-
 tuomo, inepa kâzewentâdaundâ. Âkealâ,
 âkealâba warâ awyly koendâ mâuntu-
 duomo lelâ ewentâdaungâ —kely.

**“Messiaslâka awâkâ Jesus?”
 kurâdo kehobyry**

²⁵Aituo târâ Jerusalémâ aguelymo:
 —Kywymârydo tyândyse atolâ
 awâkâ uguondo. ²⁶Etaungâ! Notoen-
 daymba awâkâ. Tarâlâ idânârâam
 aguely. Ânguy etadâze kewâpyra.

Kywymârydo nutumo keanra Deus Ingonotyby Messiaslâ awâkâ awyly. ²⁷Kurâem olâ awâkâ Messias keba. Tutuzema kurâ awâkâ âdykonlo awyly. Messias âewyly watay, MOK alelâ ise âepanâguely. Ânguy âdykonlo mâkâ awyly nutuwâbyra ise —kelymo.

²⁸Deus ety idaseray tienomedâday, kaynâ kehoem Jesus aguely:

—Koendâ kehoem utudâ, âdykonlo wawyly tutuze warâ wâne âmaemo, inanajimo. Iozepa olâ arâ âunâgumo. Unâry wâgâ kulâ inkâba xirâ onro anaxi kêwely; igonotybyem tarâ wawyly. Kewâdyly kulâ nitaymba mâkâ ugononibyry; tâinwânseim lelâlâ mâkâ agueho. Mâuntuba olâ âmaemo. ²⁹Urâ olâ tutuze ingonotybyenlâ mawânâ kêwely —kely.

³⁰Aguely tindatuo, sawâse kelymo. Ânguy olâ tâmary nhonwa niepyra, sawâto odayba awylygue. ³¹Tonlo modo ewy agui Jesus tâinwânseimo myakâwâm. Aguelymo:

—Messias âewyly-ro watay, adyenyry kehoem ise anhekyly, tâkezemo inanry. Awâkâ anhekyly takaze ânguy anientaymba. Arâ atayma Messiaslâ awâkâ-ro —kelymo.

**Fariseu domodo guarda
ingonotomobyry, Jesus
nhawâtoem**

³²Fariseu domodo, “Messiaslâ awâkâ Jesus” kely indadylymo. Aguely izepamo. Aituo kurâdo eynynâ Deus agâ aguewâni modo iwymârydo agâ aguelymo. Deus ety donro guarda modoram warâ aguelymo:

—Jesus sawâtaunda; enetaungâ xarâ-ro warâ —kelymo.

³³Arâ âturudaymo, Jesus aguely tonlo modoram:

—Âdiempa kulâ ise agâmo wawyly. Inepa ise kodopâdyly mâkâ ugononi-

byryanlâ. ³⁴Uize âmaemo, iepyra olâ ise âmaemo, udâhoram mydâpa mawlymogue —kely.

³⁵Aituo aguelymo:

—Âdyanka ise awâkâ idâly, kiempyra kitoem? Eagonro xidadâ modoam ise idâly, judeu keba modo ety anaxi enomedâzemo? —kelymo. ³⁶—Âdakezeka enra awâkâ aguely: “Uize âmaemo, iepyra olâ ise âmaemo” kely? Xina nutuba enra awârâ —kelymo.

**“Yam âetaungâ, tatuanzeim paru
enyze âeto ara” Jesus kehobyry**

³⁷Âty xypyry tohoguezeim kuru ume Jesus saudyly. Kaynâ kehoem aguely:

—Yeinwântaungâ, âmaemo kâunduly mâenmakedyze donro modo. Yam âetaungâ, tatuanzeim paru enyze âeto ara. ³⁸Xirâ Deus itaumbry awo wâgâ iweniby enanâguewâdaungâ: “Yeinwânâni modo iweloem âiehozemo, âdaunloenlâ Deus agâpa nâiehoba itomoem. Paru sawedânry ara ise iodaymo eon-hondânimobe awyly aunlolâ” —kely.

³⁹Deus Ispirityry tâinwântaynrin modoam ingonokyly wâgâ ani Jesus aguely. Xirâ modo ume Deus Ispirityry eyanmo tugonoseba ani, xirâ anaynlâ Jesus awylygue, Tunwym tynrenseim ezaxi nâtâba awylygue.

**Jesus einwânâni,
einwântânry warâ**

⁴⁰Aguely idanipyry modo aguelymo: —Âkealâ, Deus eynynâ agueinlâ awâkâ uguondo. Messias kinwânwânkylylâ awâkâ —kelymo.

⁴¹Einwântânry modo olâ aguelymo: —Messias mâkeba awâkâ. Galileiadâ kulâ mawânkâ âewyly. Mârâ eynynâ inkâba ise Messias âewyly. ⁴²“Davi ipemugu ewy ise Messias” tâkeze myakâwândy Deus lelâlâ. Iazely ise

Belémdâ, Davi iazehobyrydâ. Arâ mawânâ Deus itaumbry awo wâgâ iwenibyem awyly —kelymo.

Belémdâlâ iazepy Jesus awyly nutuba tawylmogue, arâ aguelymo. ⁴³Jesus einwânni, einwântânry idylymo. ⁴⁴Ânguy olâ myakâwâm nawâpyra. Einwântânry modo ewy Jesus tianwâdysemo ani.

**Judeu domodo iwymârydo Jesus
neinwâmpyra atomobyry**

⁴⁵Deus ety iguardary modo Jesus sawâse igonotyby modo odopâdylymo, fariseu domodo, kurâdo eynynâ Deus agâ aguewâni modo iwymârydo warâ eydâ atomoam. Aituo aguehonlymo:

—Âdaituoka Jesus mâenepyra mawyllymo? —kehonlymo.

⁴⁶Aituo in-hogulymo:

—Ânguy mâkâ agueho ara kehoem aguewâpyra —kelymo.

⁴⁷Fariseu domodo iewiâpadaynly, aguelymo:

—Mâkânra mâzenokuoaguimo lâpylâmy! ⁴⁸Kywymârydo mâkâ neinwântaymba. Xina fariseu domodo ewy tokalâ mâkâ neinwântaymba. ⁴⁹Âdaunlo modo kulâ mâkâ einwânni. Kâzewenry wâgâ nâsenomedâdaymba akaemo, xina âsenomedâdo ara. Inakanhe âiehoze akaemo Deusram —kelymo.

⁵⁰Akaemo duay tâlâ myani fariseu Nicodemos keho, kopae Jesus agâ agueze idâppy. Tataen-hodo aguely tindatuo, aguely:

⁵¹—Idânârâ kehoem kâzewenry tutuze kurâ. Koendâpa ânguylâ iguehoem aguely, eagâ aguykeba kulâ, warâ awyly tutuzelâ kurâ. Âdy anhe-tyby kiuntuba kulâ âsenagazedoem kienwentâdaymba kurâ. Xarâ kyjigâsene, tâsemaguehoem, âdara kely awyly kindatoem —kely.

⁵²—Galiléia donro modo mâkâ eynynonro ewy ara amyguely. Tutuzelâ âmâ, Galileiadâ Deus itaumbry ega-tuim âdaunloenlâ ipa awyly —kelymo.

**Pekodo isoamba kulâ
âdynanâoiby**

8 ¹[Aituo kurâ domodo tâtyam idâwâdylymo. Jesus olâ idâly iwiy Se Oliveira Ekaram. ²Kopaelâgêam pealâ Jesus odopâdyly Deus etyam. Ekadyly, tydâtyguyim modo enomedâdyly nhaguondyly. ³Nhenomedâdyly ume, fariseu domodo, Moisés inweniby enomedâni modo iwymârydo warâ Jesusram pekodo nhenewylymo. Eagonro uguondoam âdynanâoly emâ-momy. Pekodoam aguelymo:

—Tarâ ikâ idânârâ nhetodâ —kelymo.

⁴Jesusram aguelymo:

—Konomedâni, ohogüimby merâ pekodo, eagonro uguondoam âdynanâoly xina netai olâ. ⁵Imeâgâemba kehoem merâ inakanhe aitobyry. Moisés kâzewenryem inweniby wâgâ: “Tuhugue tamytâze xyâwâtaungâ pekodo isoamba kulâ âdynanâoim” kelype. Âmâ-ro, âdara tâkeze âmâ? Tâwâlâ tuhugue xina nhâly? —kelymo.

⁶Awârâ arâ nhapâiguelymo, Jesus âdalâ kulâ in-hoguly-ro watay tienwentâdomoem. “Tyâzepa awâkâ pekodo nidâ” kely-ro watay, “Kâzewenry neinwântaymba awâkâ Jesus” tâkezemo tâise. (“Xyâly lelâ awâkâ pekodo” kely-ro watay, “Nityendaymba awâkâ” tâkezemo tâise warâ.) Nhapâiguehomo nihoguba Jesus; enagozely lelâ, tâmary ewilygue onro wâgâ inwenily lelâ warâ. ⁷Mâkâ pekodo wâgâ sapâiguezezemolâ. Aituo iwykaudyly, aguely:

—Âmaemo ewy âdaunloenlâ inakanhe aitânrybe-ro watay, tâwâlâ

waunroem merâ pekodo onwa tuhu name —kely.

⁸Agueypyem âzewyondyly. Onro wâgâ inweniondyly. ⁹Jesus arâ agueduo, idânârâ tutuzemo mawânkâ Deus izepa ato aieni lelâ tawlymo. Aituo tokalâ, tokalâ warâ âxigewâdylymo, agaityom modo waunroem kuru âxiguem. Ânguy peba idyly, Jesus, pekodo alelâ âxiâim. ¹⁰Aituo Jesus iwykaudyly, nhapâiguely:

—Âdykâ âiguehoem iwentâni modo nitaimo? —kely.

¹¹—Ânguy lâpeba, Pymâ! —kely pekodo.

—Âhoem augewâpyra lâpylâ urâ. Iweâma idâ, inakanhe adâitonzeba olâ ikâ —kely Jesus.]^d

**Jesus mawânkâ âdara Deusram
kýtâly awyly xutuen-hoim**

¹²Jesus agueondyly Deus ety idaserano modoram:

—Iajinu wâne kydadakobâdo tâsagonze, myara lâpylâ ywâgâ âdara Deusram tadayndyly xutuly. Yeinwântaynrim modo Deus agâpa tye-tunebamo ise. Igueduomo, idâzemo lelâ aunloenlâ eagâ tâitomoem. Ize ato ara adâidyly xutuzemo. Iamu odaypa ise adakobâdylymo, ânwa tyajineim odakâ adakobâdylymo waunlo ara ise —kely.

¹³Fariseu domodo eyam aguely:

—Âwâgâlâ awârâ amyguely. Ânguy âkealâ amyguely awyly eon-hondâni lâpeba. Awylygue amygueho âdyem nipyra awyly —kelymo.

¹⁴Aituo Jesus aguely:

—Âkealâ ywâgâ auguely, tâinwânseim xirâ augueho. Idataungâ auguely. Tutuze urâ, âdykâba kêewyly, âdyam udâly warâ awyly. Âmaemo olâ mâuntubamo âdykâba kêewyly, âdyam

udâly warâ awyly. ¹⁵Ywâgâ koendâ mâuntuba lelâlâ wâne âmaemo, arâlâ olâ nhewentâdylymo. Ânguy ewentâze inkâba kêewyly, emakeze lakuru. ¹⁶“Inakanhe kulâ mâkâ aidyly” uguely watay olâ; âkeá lelâlâ auguely. Yagâlâ Pabai ugononibyry; auguehobyry modogue yagâ tâseinwânze mâkâ-ro warâ. ¹⁷Kâzewenry wâgâ iwenibyem: “Azagâ kurâ âkealâ aguelymo-ro watay, aguehomobyry tâzeinwân-honze” warâ iwenibyem awyly. ¹⁸Tâlâ azagâ âkealâ ywâgâ agueim, urâ, Pabai ugononibyry warâ. Awylygue xina augueho tâinwânseim lelâlâ awyly —kely.

¹⁹Akaemo aguely:

—Âdykâka Pabai mygueho? —kelymo.

Aituo Jesus in-hoguly:

—Ânguy wawyly mâuntuwâbyra âmaemo. Pabai koendâ mâuntuwâbyra âmaemo warâ. Utulymo-ro watay, Pabai tutuze lâpylâ tâise âmaemo —kely.

²⁰Jesus xirâ modo wâgâ aguely, Deus ety idaseray tienomedâdaymo. Deusram dinheru xuduypy etadâdo kaixa iwaguepa. Tâwâlâ wâne izepaom modo augueho izepa awylymo, ânguy olâ nawâpyra, sawâto odaypa awylygue.

**Xirâ anano keba tawyly
wâgâ Jesus auguehobyry**

²¹Jesus aguely:

—Idâze urâ; uize âmaemo-ro warâ. Inakanhe amitomobyry tygakezebalâ ise âiguelymo. Awylygue ise udâhoram mydâpa mawylymo —kely.

²²Aituo judeu domodo adapâiguelymo:

—Âdyanka ise awâkâ idâly, kytâba kitoem? Âdyâly ise? —kelymo.

²³Jesus aguely:

^d8.11 Idânârâ livru saguho modo wâgâ iwenibyemba xirâ.

—Taunlo onwogonrolâ âmaemo. Urâma kaynonro. Xirâ ananolâ âmaemo, urâ olâ xirâ anano keba. ²⁴Yeinwâmpyra lelâ âmaemo-ro watay, inakanhe amitomobyry tygakeduneba ise. Inakanhe amitomobyry wâgâ tâzewentâgueozelâ ise âiguelymo, URÂLÂ URÂ kelygue tâzekeim mâinwâmpyra âmaemo-ro watay —kely.

²⁵Aituo nhapâiguelymo:

—Ânguyka âmâ? —kelymo.

Aituo in-hoguly:

—Tutuzelâ âmaemo, aunlolâ inanry ywâgâ auguezesedly. ²⁶Toenzepa âwâgâmo auguehobe wâne urâ. Augueho mâinwâmpyra olâ âmaemo, Deus ize ato amânhepyra mawylimo kâuntuen-hondyze wato. Mâkâ ugononibyry olâ kewâdyly kulâ waypa. Xirâ anano modoam auguehoem aguehobyrylâ augueho —kely.

²⁷Nutubamo myani mâkâ “Ugononibyry” keduo, tunwym Deus wâgâlâ aguely awyly. ²⁸Awylygue Jesus aguely:

—Iwerâ ânguyem wawyly mâuntuwâbyra âmaemo. Yiguehoem kruz onwa yakâjibygueduomo, xutuze âmaemo, Uguondo Kaynâpa Âetyby wawyly, mâkâ URÂLÂ URÂgue tâzekeinlâ wawyly. Xutuze âmaemo, Pabai auguehoem aguehobyrylâ kâenome-dâdo awyly, yangahu oday unâry kulâ mâkeba. ²⁹Yagâlâ ugononibyry, urâ kulelâ yânwâpyra, ize ato lelâ mawânâ agânhekyly —kely.

³⁰Arâ aguely tindatuomo, agui kehoem einwânâmomy.

**Deus eynynonro wâgâ,
Diabu eynynonro wâgâ
warâ Jesus aguehobyry**

³¹Aituo Jesus aguely:

—Augueho mâinwândylymo-ro watay, yagonroem lelâlâ ise âmaemo.

³²Ânguy wawyly koendâ mâuntu-lymo-ro watay, xutuze âmaemo, aguely âkealâ awyly. Mâuntuduomo, âzemaekoze âmaemo, mâkâ âturimo emaymba —kely.

³³Aituo aguelymo:

—Abraão iweompyrylâ xina. Âdykâ ânguyam xina nâdutuoba, xina tawâseba warâ. Âdaituoka “Mâkâ âturimo emaymba âzemaekoze âmaemo” myguely? —kelymo.

³⁴—Diaburam kulâ Deus izepa ato aietaynrim modo âdutuoly. Inakanhe adâjidyly nimopamo. Diabu mawânkâ Deus izepa ato aiesezeni modo iwymâry; Satanâsgue tâzekeim lâpylâ mâkâ. Xirâ mâuntudyzemo kuru wato. ³⁵Mâkâ kurâ adanâhoymby, tâwâlâ vende âieholo eagonro emaryem. Mâkâ imery olâ, aunlolâ imeryem awyly; âdaunloenlâ tunwym xurâempa nipyra. ³⁶Deus imery urâ. Diabu emaymba imakelymo-ro watay, mâkâ mâinwântondaymba ise âmaemo. Aunlolâ inakanhe amitoem aguehobyry amânhetombyra ise âmaemo. ³⁷Abraão iweompyry lelâlâ wâne âmaemo. Arâlâ olâ, yâdyse mawylimo, inomedâdomo mâinwândyseba mawylimogue. ³⁸Pabai yam nhenehoymby inanry augueho. Amânhekylymo olâ, Diabu amânhetomoem aguehobyry kulâ —kely.

³⁹Aituo aguelymo:

—Abraão iweompyry xina. Mâkâ aitobyry arâlâ mawânâ xina aidyly —kelymo.

Aituo Jesus aguely:

—“Abraão iweompyry xina” tâkeze wâne âmaemo, Abraão aitobyry arapa olâ amidylymo. Abraão aitobyry ara amidyse âmaemo-ro watay, Deus ize ato tâise amânhekylymo. ⁴⁰Âkealâ Deus aguehobyry kâindatyby inanry âyanmo augueho. Arâlâ olâ, yâze

myguelymo. Awârâ amânhedyse matomo emyenro arientaymba akâ-wândy Abraão! ⁴¹Unwânmo Diabu aito ara kulâ amidylymo —kely.

Aituo aguelymo:

—Diabu imeom mâkeba xina! Tokalelâ xina nhunwym, Deus lelâ. Deus imeom lelâlâ xina —kelymo.

⁴²Aituo Jesus aguely:

—Deuslâ unwânmo-ro watay, ywynedâ tâise âmaemo, Deus ingonotybyenlâ mawânâ tarâ wawyly. Âwâlâ kulâ inkâba kâewyly. Deuslâ mawânkâ ugononi. ⁴³Âyanmo augueho tydase lelâlâ wâne âmaemo, inomedâdyzemo wato mâuntudyzeba olâ âmaemo. ⁴⁴Diabu imeom kulâ âmaemo; ize atolâ mawânâ amânhedyse matomo. Adagudaylâ Diabu kyârin-em awyly. Iozeno modo iduery kulâ mâkâ. Aunlolâ mâkâ kewâdyly kulâ awyly. Kewâdyly kulâ-ro watay, tâzewenrylâ mâkâ agueho. Augueondyly, konokuni kulâ mâkâ, idânârâ tâdâsenogudo modo adaguholâ mâkâ. ⁴⁵Uguewâdyly kulâ witaymba urâ, âmaemo olâ yeinwândysebamo. ⁴⁶Idânârâ âmaemo, inakanhe awipyra wawyly, tutuze âmaemo. Ânguy ienwentâni lâpeba. Awylygue augueho einwântaungâ. ⁴⁷Deus xurâ modo mawânkâ Deus agueho tâinwânsemo. Mâkâ mâinwâmpyra mawylymo, xurâ keba mawylymogue —kely.

Abraão wâgâ Jesus aguehobyry

⁴⁸Aituo tonlo modo judeu domodo eyam aguelymo:

—“Âkealâ enra Samaria donro modo emyenro kulâ âmâ kadopâbeom” xina kely —kelymo.

⁴⁹Aituo Jesus aguely:

—Kadopâbeom mâkeba urâ. Pabai ugueho tynrense urâ; âmaemo olâ yrempyramo âmaemo.

⁵⁰Won-honru wâgâ, koendonroem wawyly wâgâ warâ auguepa wâne urâ. Pabai olâ ywâgâ koendâ adâkeze.

⁵¹Idânârâ auguehobyry einwântaynrim modo niguewâpyramo ise. Xirâ mâuntudyzemo kuru wato —kely.

⁵²Arâ Jesus aguely tintaduo, judeu domodo iwymârydo, aguelymo:

—Iweâma tutuze xina, kadopâ agâ kulâ mawyly! Iweâpa myakâwândy kydamu Abraão iguely. Idânârâ saguhoem Deus eynynâ agueim modo lâpylâ iguewânmo. Warâ olâ amyguely: “Idânârâ auguehobyry einwântaynrim modo niguewâpyramo ise” myguely. ⁵³Kydamu Abraão, saguhoem Deus itaumbry egatuwânibry modo alelâ iweâpalâ myakâwândy iguelymo. Akaemo takaze tynrenseim mâkeba âmâ! Uguondo tynrenseim mawyly tâgaese wâne âmâ, âdy keba olâ âmâ —kelymo.

⁵⁴Aituo Jesus aguely:

—Ywâgâ kulâ koendâ auguely-ro watay, augueho modo âdyem nitaymba tâise. Urâ lelâ ywâgâ koendâ aguein-ro watay, ânguy auguehobyry neinwântaymba tâise. Pabai olâ ywâgâ koendâ agueim, mâkâ “Xina iDeusry” myguehomolâ. ⁵⁵Âdykâ Deus mâentaymba âmaemo, urâ olâ tâense. “Kâuntuba urâ” uguely âyanmo-ro watay, uguewâdyly kulâ tâise. Koendâ kehoem tutuze, tâinwânse warâ olâ urâ yam agueho modo. ⁵⁶Kydamu Abraão toenzepa iomazewâm, tarâ xirâ onro anaym wawyly tientuo —kely.

⁵⁷—Âwâ! Cinquenta anu peba kuru maze-ro. Iweâpa lelâlâ myakâwândy Abraão iguely, azely iraynâlâ. Abraão mâentaymba âmâ! —kelymo.

⁵⁸Aituo Jesus aguely:

—Abraão iazely iray, tâlâ wakâwâm —kely.

⁵⁹Jesus aguely tindatuomo, tyândysey idylymo. Tuhu nhanâdylymo, nhonwa tiamehomoem. Totoenze olâ ani. Aituo Deus etydâba egasely.

Jesus epy kua nhetobyry

9 ¹Alâ ani tadakobâday Jesus uguondo epyem iazeypy nhedyly.

²Aituo xina Jesus nhapâiguely:

—Konomedâni, âdaituoka awâkâ uguondo epyem iazely? Izepa tato aieniem awyly xutuwâm Deus? Nhunwyndo inakanhe aitobyry wâgâ? —xina kely.

³Aituo Jesus in-hoguly:

—Awârâ modo wâgâ inkâba. Awâkâ arâ iazely, Deus eon-honru iwâgâ âzehohoem. ⁴Tâmaryem akâwâm Deus xirâ anaxi ugonodyly. Peto oday lelâ kydâsewanily. Arâ lâpylâ Deus aguiendyse ato aguyjiene, kydâsewaniho nhuduly umelâ. Inepa mawânâ ise xurâem aguypra kito saindyly. ⁵Xirâ anaym wawyly ara, âdara Deusram tâdâtâly awyly wâgâ konomedâdâ urâ; âdyam kytâly awyly kientoem iajimanâni emyenro urâ —kely.

⁶Arâ aguenripyryem, Jesus KUITÚ kely onro onwa. Onro tâdakugue

nhepizeândyly. Aienibyryem epy enu onwa PYRY PYRY nhedyly. ⁷Aguely: —Idâ, Siloé donro paru etaryam âzemelagoguera —kely.

(“Mâkâ igonotyby” keze Siloé kely.)

Epy idâly âzemelagogueze. Odopâdyly, tâense lelâ, Jesus kua nhetybyem. ⁸Ety iwaguepa tâtuneim modo mâkâ epyemba awyly nhedylymo. Saguhom dinheru nhekadyly enipyry modo lâpylâ koendâ tâense awyly nhedylymo. Aituo âseguâdâdylymo, aguelymo:

—ÂH! Mâkâ epy ekadybyem, sakani modoam dinheru ekanibyrylâ awâkâ —kelymo.

⁹—Mâkâlâ —kewâdylymo.

—Mâkâ mâkeba. Emyenro kulâ awâkâ —kelymo.

Mâkâ olâ warâ aguely:

—Mâkâlâ urâ, epyem iazeypylâ —kely.

¹⁰Aituo nhapâiguelymo:

—Âdaraka amidyly kua mitoem? —kelymo.

¹¹Aituo in-hoguly:

—Mâkâ uguondo Jesus keho enra ikila ienu onwa PYRY PYRY ieni. “Idâ, Siloé donro paru etaryam âzemelagoguera” keanry-ro warâ. Aituo enra



(João 9.1-12)

udâly. Kâzemelagogueagui. Iwerâ tâense urâ —kely.

¹²—Âdykâka mâkâ uguondo? —kelymo.

—Kâuntuba aze —kely.

Fariseu domodo epyem iazepy kua ietyby nhapâiguehomobyry

¹³⁻¹⁴Tâzekobyzegueho oday Jesus epy kua nhedyly. Aituo mâkâ kua ietyby fariseu domodoram adaholy.

¹⁵Fariseu domodoram adapâigueoly: —Âdaraka kua midyly? —kelymo.

—Mâkâ uguondo kua yenipyry onro enra ienu onwa PYRY PYRY nhekyly. Parugue kâzemelagoguehoem agueanry. Âzemelagogueybyenlâ enra kâendyly-ro warâ —kely.

¹⁶Fariseu domodo ewy aguely mâkânra:

—Mâkâ kua âenipyry, tâzekobyzegueho oday mâkâ aidyly. Arâ atayma Deus ingonotyby mâkeba mâkâ uguondo-ro; adyesenry mawânkâ anientai tâzekobyzegueho oday —kelymo.

Tâlâ olâ fariseu domodo ewy wakeim:

—Deusram aguehomba adyesenry anhetoen-ro watay, Deus eon-honru tienehon-hoem adienkyly anientaymba tâise —keim.

Jesus Messias awyly einwânni, einwântânry tâisemo ani.

¹⁷Aituo eyam agueondylymo:

—“Epyemba yetai mâkâ” mygueanse. Âdara mâkâ wâgâ âunâry? —kelymo.

—Ienanaji, Deus eynynâ agueinlâ mâkâ —kely.

¹⁸Pymâ domodo mâkâ aguely neinwâmpyramo. Aituo aguelymo:

—Myguewâdyly kulâ. Epyem inkâba ani azely —kelymo.

Awylygue sodo modo ingâsedylymo.

¹⁹Sodo modo saintuo, nhapâiguelymo:

—Âmerymoka awâkâ, epyem iazepy myguehomo? Âdaituo pylâka iwerâ nhedyly? —kelymo.

²⁰Aituo in-hogulymo:

—Xina imerylâ awâkâ. Tutuze xina epyem iazepy awyly. ²¹Âdara kua itobyry olâ xina nutuba. Ânguy kua ieni awyly xina nutuba lâgâlâ warâ. Xutuybyem mawânkâ. Awâkâlâ sapâiguewâdaungâ. Awâkâlâ ise âyanmo egatuim —kelymo.

²²Arâ sodo modo aguely olâ mârâ âtâ tâdâtâdygyho odaya tâzegaseonlymo xytaze, “Jesuslâ Messias” kelymo-ro watay. “Deus Ingonotyby Jesus awyly einwânni-ro watay, âtâ tâdâtâdygyho odaxi negawâmpyra ise” tâkeze akâwâm pymâ domodo. ²³Awylygue mawânkâ: “Xutuybyem awâkâ. Awâkâlâ sapâiguewâdaungâ” kelymo.

²⁴Aituo mâkâ uguondo kua ietyby ingâsenehondylymo. Aguelymo eyam:

—Amyguely idaselâ awâkâ Deus. Awylygue âkeá lelâlâ xinaram aguekâ. Tutuze xina, Deus izepa ato aieni awâkâ kua âenipyry awyly —kelymo.

²⁵Aituo in-hoguly:

—Deus izepa ato adyese, aniempyra warâ awyly kâuntuwâbyra urâ. Kâuntuly epybyryem wawyly, iwerâ tâense urâ, mâkâ kua nhetybyem —kely.

²⁶Aituo nhapâigueondylymo:

—Âdaraka enra aidyly? Âdaraka enra epyemba âedyly? —kelymo.

²⁷Aituo uguondo in-hoguly:

—Azagâ lelâ âyanmo augueaki, yeinwâmpyra olâ âmaemo. Auguehobyry kompâzedyly-ro watay, mâinwâmpyra mawylymo, tutuze urâ. Mâkâ kua yenipyry mâinwândysemo lâpylâ âmaemo? —kely.

²⁸Aituo mâkâ agâ toenzepa kehoem iewiâpadylymo, aguelymo:

—Âmâlâ mâkâ eynynonro, xina mâkeba! Moisés inweniby lelâ xina

nheinwânkyly. ²⁹Deuslâ, Moisés kydamudo nhenomedâdoem agueim awyly, tutuze xina. Âdy Jesus wâgâ xina nutuwâbyra. Ânguy aguehoem igononi awyly xina nutuwâbyra warâ —kelymo.

³⁰Aituo mâkâ uguondo aguely:

—Âwâ! Kua nhetybyem wawyly tâenselâ âmaemo. Toenzepa kâseguâdâdyly, Deus ingonotybylâ mâkâ awyly mâuntuba mawylymogue!

³¹Deus tynynonro keba modo nhekadyby nudupa awyly, tutuzelâ kurâ, izepa ato aieni nhekadyby nuduwâpyra. Tynynonro modo nhekadyby lelâ anheklyly —kely. ³²—Kaudyly umelâ ânguy epyenlâ egaseyby kua tyese kely tydatuneba. Ânguy awâkâ uguondo ara aieni lâpeba. ³³Iwerâ olâ Jesus kua yetai. Deus keba igononi-ro watay, kua yetaymba tâise —kely uguondo.

³⁴—Epyem azely Deus izepa ato aienilâ mawylygue. Awylygue xinaram arâ kehoem adâkezeba ikâ —kelymo.

Aituo, âtâ tâdâtâdyguyho odaypa nhegaseândylymo.

Jesus agueho tyeinwândysebaom modo

³⁵Âtâ tâdâtâdyguyho odaypa uguondo egaseândobyry xutuwânmy Jesus. Awylygue nhuinly. Tientuo, nhapâiguely:

—Mâkâ Uguondo Kaynâpa Âetyby tâinwânse âmâ? —kely.

³⁶Aituo uguondo aguely:

—Kâinwândyse urâ. Ânguy awyly yam aguekâ, ânguy amygueho awyly kâuntuhoem —kely.

³⁷—Tâenselâ âmâ! Eagâlâ amyguely! Urâlâ Uguondo Kaynâpa Âetyby —kely Jesus.

³⁸Jesus aguely idanipyryem, âzeguhoam idyly enado, tynrentoem, aguely: —Pymâ, âinwântâ urâ —kely.

³⁹Jesus aguely:

—Xirâ anaxi kâewyly, ânguy yeinwânni, yeinwântânry warâ awyly âdutihomoem. Epy modo wâne tyajine awyly nutuba myara Deus xurâ kebaom modo, nutuba awylymogue. Yeinwântaynrim modo olâ Deus xutuzemo, epybyryem kua ietybymoem-ro waunlo ara —kely.

⁴⁰Fariseu domodo ewy eydâ iwaguepalâ. Aituo aguely indadylymo.

—“Epy ara” mygueduo, xinaranlâ enra amyguely? —kelymo.

⁴¹Aituo Jesus in-hoguly:


—“Xina Deus nutuwâbyra, tiuntudyze olâ xina” myguelymo-ro watay, Deus tygakeze tâise izepa ato amânhetomobyry. Tâwâlâ kulâ olâ, “Koendâ Deus tutuze xina” myguelymo, yeinwâmpyra kulâ. Arâma inakanhe amitomobyry tygakezeba awyly tânehonze awârâ. Deus xurâem, epy emyenro kulâ âmaemo —kely Jesus.

Kanero sodo koendonro wâgâ Jesus nhegatuhobyry

10 ¹Jesus aguely:

—Idatungâ auguely. Kanero sodo kura odaxi pyanta oze egawândyly. Tâmagazeinma tâzegawânto ozepe egawândyly, sahodâdobyry nhakaguyly. ²Kanero sodo tâzegawânto oze egawânni. ³Egawântoem pyanta tâzenahugueoze. Ezedy wâgâ sodo tâguy ingâsedaynly. Todo itanru tydase kanero. Kura odaypa nheta-guwêdyly. Poji nhaguhomoem nhadyly. ⁴Waunroem idâly, eguydo nhapygue-ro warâ, todo itanru tydase tawylymogue. ⁵Tiuntudânry kulâ niampyguedaymba. Itanru âkeloem awylygue, tâwenkeze lelâ —kely Jesus.

⁶Kanero todo nhutuho ara, “Yeinwânni modo utuly” keze ani Jesus aguely. Kanero wâgâ kulelâba aguely awyly, nutubamo olâ-ro warâ.



(João 10.1-6)

**Deus eydâ atoam
tâzegawântolâ Jesus**

7 Aituo Jesus aguely:

—Kura iwyantary emyenro urâ. Pyanta oze kaneru domodo tâtary odaypa egasely poji aguze, egawântondyly tâxidâdomoem warâ. Arâ lâpylâ ywâgâ lelâ Deusram tâdâtâhoem wawyly. Xirâ mâuntudyzemo kuru wato. 8 Xirâ onro anaxi kâewyly iraynâ, toenzepa akâwâm “Deus Ingonotyby urâ” kewâni modo. Kewâdylymo kulâ olâ-ro warâ. Kaneru emagazeni emyenro kulâ akâwâm akaemo kewâdyly kulâ waunlo modo. Ynynonro modo olâ akâwâm aguelymo niwantaguebyramo. 9 Deus eydâ atoam tâzegawântolâ urâ. Tâsemaguehoem wâne kaneru kura odaxi tâgawânse myara ynynonro modo kâenmakely. Kaneru sodo tâguy poji anaym awyly ume tânuagaenzelâ myara lâpylâ ynynonro modo kâendyly. 10 Kaneru domodo emagazeze, inwenkeze, xyâze warâ kulâ tâmagazeim âewyly. Urâ olâ ynynonro modo emakeze kâewyly, igueduomo Deus agâ aunloenlâ itoem lakuru.

Kaneru sodo koendonro

11—Kaneru sodo koendonro emyenro urâ. Koendâ tâguy nhedyly;

emakezemo tâgueze warâ. 12-13 Tâlâ olâ dinheru tienmakehoem kulâ kaneru eni, sodo keba olâ mâkâ. Auwa âepanâguely watay, todokeze lelâ. Aituo auwa kaneru nhawâdyly, ipemugudo adapâeguyly. 14-15 Mâkâ kaneru odo koendonro emyenro urâ. Utudâ Pabai; Pabai tutuze urâ warâ. Ynynonro modo tutuze lâpylâ urâ, kaneru odo koendonro tâguydo nhutuho ara. On-hondybyem urâ, ynynonro modoem yiguehoem. 16 Tâinkâ lelâba ynynonro modobe awyly. Utuzemo, yeinwânsemo warâ. Tokalâ âjjiam lelâ ise ynynonro modo kâindâtyguyly, kâentomoem, kaneru odo koendonro, tientoanlâ tâguy indâtyguyho ara.

17—Toenzepa Pabai ywynedyly, yeinwânni modo emakeze iguein-em wawylygue. Yigueduo, kurâem itonze urâ. 18 Ynynonro modo emakezelâ ise yiguely, awidyse wawylyguelâ. Aypa-ro watay, ânguy yâwâpyra tâise. “Igueze âmâ, kurâem itonze âmâ warâ” Pabai kehobyry aralâ ise awidyly —kely.

19 Awârâ tindatuo, judeu domodo nâseinwâmbyra idylymo Jesus wâgâ, aguelymo:

20—Kadopâbe itybyem awâkâ! Awylygue âindâ kulâ awyly! Aguely kâjiiwantaguedaundâ —kelymo.

Tâlâ olâ warâ aguwâni modo:

²¹—Kadopâ agonro arâ aguewâpyra, epy kua nietaymba warâ! —kewâni modo.

**Judeu domodo Jesus
izepa itomobyry**

²²Azagâ nunâ sakabygueduo, kopâ ihuguely adaguly ume, âty “Deus Ety Koendâ Ietobyry Enanâgueho” saindyly. ²³Deus ety ivarandarydâ Jesus adakobâdyly, Salomão intânehoymbydâ. ²⁴Târâ atay, eydâ âtâdyguyby modo aguely:

—Xina kâzenokudâ. Deus Ingonotybylâ âmâ? Mâkâ keba? Koendâ aguekâ, xina nhutuhoem —kelymo.

²⁵Aituo Jesus in-hoguly:

—Deus Ingonotybylâ urâ, ugue. Yeinwâmpyra olâ mataunaguyndre. Pabai eon-honrugue adyesenry modo ajiedâ, mâkâ ingonotybylâ wawyly kânehohoem. Agânhekyly modo mâkâlâ ugononi awyly xutuen-hoim. ²⁶Ynynonro keba mawylmogue olâ Deus Ingonotyby wawyly mâinwâmpyra mawylmo. ²⁷Ynynonro modo ytanru tydase; idânârâ utudâmo warâ. Kaneru todo itanru tindatuo, eyam tâtâze myara ynynonro tawylygue, augehobyry anhedylmo. ²⁸Ynynonro modo aunloenlâ Deus agonroem ienehonze urâ. Igeduomo eagâmolâ ise Deus. Typygueim keba ise eagâ awylmo. Iemakoaymo waunlo ara kehoem ise; ânguy iemaymba nhemakelyemba kehoem. ²⁹Pabai won-honru nhuduypy, idânârâ takaze kehoem imâem awyly; ânguy mâkâ emaymba nhemakelyem inkâba. ³⁰Tokalelâ xina Pabai agâ —kely Jesus.

³¹Jesus aguely tindatuo, iopano modo tuhu nhanâtondylymo Jesus tyân-homoem. ³²Aituo Jesus eyanmo aguely:

—Inumo angataylâ keankâ koendonro modo agânhedyly, Pabai “Aiekâ” keho-

byry ara. Âdaunlo agânhekyly wâgâka tuhugue yâdyse mawylmo? —kely.

³³In-hogulymo:

—Koendonro amânhedylygue inkâba xina âdyse awyly, Deus mâunâguedylygue. Xina emyenro kulâ âmâ, uguondo, Deus agâ âzekiba ise kerim. Awylygue xina tuhugue âdyse awyly —kelymo.

³⁴Aituo Jesus eyanmo agueondyly:

—Warâ Deus itaumbry awo wâgâ iwenibyem awyly: “deuslâ âmaemo” kely Deus eyanmo. ³⁵Âkealâ Deus itaumbry awo wâgâ iweniby aguely awyly, tutuze kurâ. Deuslâ akaemo deusgue ezetâni awyly, tutuze kurâ, saguhoem kuru iwâgâ aguewâtyby modo. ³⁶Deuslâ xirâ onro anaxi ugononi, aguehobyry aiese. “Deus imery urâ” ugeduo kulâ, “Deus nhunâguedyly awâkâ” myguelymo.

³⁷Pabai “Aiekâ” kehobyry agânhepyra urâ-ro watay, âdy wâgâ yeinwântaymba tâise âmaemo. ³⁸Aguelygue kulâ yeinwâmpyra âmaemo-ro watay, agânhekyly mâentuomolâ einwântaungâ. Pabai Deus agâlâ wawyly, yagâlâ Pabai Deus awyly warâ —kely.

³⁹Aguely tindatuomo tyanwâdyse idylymo. Âsemaguewâm lelâ olâ.

⁴⁰Aituo Jesus târâpa âxiguely. Paru Jordão kuyam idâondyly, João kurâdo batiza nhetobyryam. ⁴¹Toenzepa myani xuiwâni modo aguely:

—Merâ uguondo adyesenry modo anhedily ara, âdy aniempyra wâne ani João. Âkealâ olâ mykeankâ merâ uguondo wâgâ aguely —kelymo.

⁴²Agui tonlo modo Jesus tâinwânsemo myakâwâm.

Lázaro iguehobyry

11 ¹Tâlâ ani uguondo, Lázaro keho, Betânia donro, Maria, Marta warâ iwiry. Tâwâne myani mâkâ. ²(Mâkâ Maria, Pymâ Jesus ihuru

onwa uriza nhapâdyly, tyangahudugue in-hugoguely itybylâ mâkâ.) ³Paru Jordão kuyâ Jesus awyly ume, Lázaro eaundudo kurâ ingonodylymo Jesusram:

—“Pymâ, toenzepa enra ataen-ho mâinwynegyuly ewânu!” kera.

⁴Aguely tindatuo, Jesus aguely:

—Tutuze urâ, Lázaro ewânu toenzepa awyly. Tâwânugue igueze, igueypyem lelâ nâtâzezebyra olâ ise. Mâkâ aidyly tientuo, toenzepa ise aguelymo: “Koendonro, ton-honreim warâ awâkâ Deus. Koendonro, ton-honreim warâ lâpylâ imery” kezemo. Aituo ise urâ, Pabai Deus warâ xina âdyren-honly —kely.

⁵Toenzepa Jesus inwynegyuly mykâinane Maria, Marta, Lázaro warâ.

⁶Toenzepa Lázaro ewânu kely tindatuo, myarâ idâze nadahulebyra ani; azagâ emedyly takaze wao mârâ âjidâ.

⁷Aituo xinaram aguely:

—Judéia yan-yam kydodopâne —kely.

⁸Xina olâ warâ aguely:

—Konomedâni, iweâ kulâ keankâ kypemugudo, judeu domodo, tuhugue âze kelymo. Myarâ kydodopâbyra koendâ kydawyly —xina kely.

⁹⁻¹⁰Aituo Jesus xinaram aguely:

—Odopâdonze urâ. Kopaelâgêmbaba xixi iatygu doze horas ara lelâ. Peto oday adakobâni modo nâjihodaigâ-daymba, xixi wâgâ. Kopae adakobâni modo olâ tâjihodaigâze, iamu oday tâtâho nepyra tawylygue —kely.

¹¹Aituo Jesus xinaram agueondyly:

—Xykyly kulâ mâkâ kataen-ho Lázaro. Xuagueânse olâ urâ —kely.

¹²—Pymâ, xykyly kulâ watayma, koendâ ise lelâ-ro —xina kely.

¹³“Igueypyem Lázaro” keze olâ ani Jesus aguely. Xina nutuba olâ âdakeze aguely awyly. Lázaro xykyly kulâ-ro waunlo ara, xina enanaji. ¹⁴Aituo koendâ xina nhutuhoem Jesus aguely:

—Lázaro nigue. Ipa kuru nidâ. ¹⁵Lázaro iguely iraynâ udâpa wawyly keankâ, won-honru mâentomoem. Âkealâ kuru yeinwântuomo, toenzepa ise womaru. Inoro, âguedy kyzeta —kely.

¹⁶Aituo Tomé, Azagonropyry kelygue tâzekeim, xinaram aguely:

—Inoro lâpylâ Jesus nhâduomo eagâlâ kyiguehoem —kely.

Jesus igueypy modo kurâem ietoni

¹⁷⁻¹⁸Aituo xina Betânia iwaguepa saindyly. Jerusalémdâ iwague kuruba mârâ âji, trêš kilômetros awârâem. Âguedy eaundudopyry etyam xina saindyly iraynâ, uguondo saindyly xinaram agueze:

—Ipa Lázaro nigue. Eguepybyry tuhu imâsedo odaji xina nhetadâdobyry quatro iguandyly idyly iwerâ —kely.

¹⁹Toenzepa eaundudopyry itynrumo. Toenzepa ipemugudo idâly, âkelo kurâ domodo warâ etubanâzemo, iwiryimo iguehobyry tiuntuduo. ²⁰Jesus tâtyam saindyly egary tindatuo myani Marta iose idâly, Maria olâ âtâdâlâ. ²¹Aituo Marta Jesusram aguely:

—Tarâlâ âmâ-ro watay, wi niguewâpyra tâise keankâ! ²²Igueypyem lelâlâ wâne, tutuze olâ urâ, Deusram mâenkaduo amyguehobyry adyese awyly —kely.

²³Aituo Jesus eyam aguely:

—Igueypyem lelâ idâzesedyly nitaymba ise âwiry. Kurâem itonze lelâ —kely.

²⁴—Xypyry etay kurâem itondyly, tutuze urâ —kely Marta.

²⁵Aituo Jesus aguely:

—Iguewâtyby modo kurâem ietoni urâ, aunloenlâ typyguenryem itomoem. Tâwâlâ ise yeinwânni modo iguely. ²⁶Yagâpa nitaymbamo ise

yeinwânni modo. Deusram ise, tyigueduo, idâlymo aunloenlâ eagâ tâitomoem, nigueontaymbamo ise. Tâinwânse âmâ? —kely Jesus.

²⁷—Idânârâ amygehobyry modo tâinwânse urâ. Deus, “Xirâ onro anaxi igonose urâ” kehobyrylâ mawyly tâinwânse urâ. Deus imery lelâlâ mawyly tâinwânse urâ warâ —kely Marta.

Jesus eogumatobyry

²⁸Agueypyem Marta idâly tywidyam agueze. Tydawere aguely, ânguy nidapyra itoem.

—Idy, Jesus naintai. Âgâsedily-ro warâ —kely.

²⁹Awârâ tindatuo myani Maria inepa kehoem saudyly. Jesus agâ oxioze idâly. ³⁰Etymoam kuru Jesus naimpyralâ, Marta agâ xina oxiodobyrydâlâ. ³¹Târâ âtâ oday Maria etubanâze idâypy modope myani. Mâkâ saudyly, tâmaegoze kehoem egasely tientuo, tâgasezemo lâpylâ myani. Aituo nhapygue idâlymo,

—Âguedy etadâdobyryam keanra idâly ohogüenze —tâkewâduomo.

³²Jesus eydâ atoam saintybyem, Maria âzeguhoam idyly enado. Aitybyem eyam aguely:

—Tarâlâ âmâ-ro watay, wi nigewâpyra tâise keankâ! —kely.

³³Aituo Jesus, Maria eogunru nhedyly; eagonro modo eogunru nhedyly lâpylâ warâ. Aituo Jesus toenzepa itywandily, tuoday âsewânily warâ.

³⁴Aituo nhapâiguelymo:

—Âdykâka keankâ Lázaro eguepybyry mâentadâdilymo? —kely.

—Egârâ, Pymâ —kelymo.

³⁵Jesus eogumadyly.

³⁶Aituo tonlo modo aguely:

—Lázaro tywyneze lelâlâ galâ awâkâ Jesus! —kelymo.

³⁷Tâlâ olâ wakenri:

—Epy kua niedâ awâkâ. Ton-honreba olâ keankâ Lázaro niguepa itoem aiese —kerim.

Jesus Lázaro kurâem nhetondobyry

³⁸Jesus idâly Lázaro eguepybyry etadâdobyryam, tâtagueim tuhugue tânahugueinram. Toenzepa kehoem itywandily. ³⁹Aituo aguely:

—Awârâ tuhu etywâdaungâ! —kely.

Aituo âguedy eaundupyry Marta aguely Jesusram:

—Alâ nidâ! Tywângue awâkâ! Etadâdobyry quatro iguandyly idyly iwerâ —kely.

⁴⁰Aituo Jesus aguely:

—“Yeinwântâ lelâlâ âmâ-ro watay, Deus eon-honru ese âmâ” ugehobyry mâenanâguebaka âmâ? —kely.

⁴¹Aituo mârâ tuhu imâsedo nhetylymo. Jesus kayam MYK idyly, aguely:

—Pabai, tuomare urâ, âyam auguely tydase mawylygue. ⁴²Ydatâlâ mawyly tutuze urâ, tâwâlâ lelâlâ wâne yangahu oday kulâ unâgu. Ago olâ iwerâ aguely, merâ kurâ domodo auguely indatoem, âmâlâ ugononi awyly nheinwântomoem warâ —kely Jesus.

⁴³Arâ adâkebygueduo adaenkely:

—Lázaro, igasegâ kuohoram! —kely.

⁴⁴Aituo Lázaro kurâem itondily, egasely. Ituwyn-hobyry aralâ, ixinary, ihuru, ewâry, emary alelâ. Panugue emyan-huymbyem awyly. Aituo Jesus aguely:

—Awârâ ituwyn-hobyry etywâdaungâ, adakobâdoem —kely.

Jesus xyâly wâgâ aguehomobyry

(Mt 26.1-5; Mc 14.1-2; Lc 22.1-2)

⁴⁵Jesus Lázaro kurâem nhetonduo, judeu domodo Maria etubanâze idâwâtyby modo ewy nheinwândily lâpylâ. ⁴⁶Tâlâ olâ myakâwâm fariseu domodoram aitobyry egatuze idâim.



(João 11.38-44)

47 Aituo fariseu domodo, kurâdo eynynâ Deus agâ aguewâni modo iwymârydo, judeu domodo iwymârydo warâ âtâdyguylymo. Âjigie aguelymo:

—Âdakiendylyka awâkâ Jesus? Adyesenry modo kehoem awâkâ anhekyly. Kurâ domodo aidyly tohoguezemo-ro warâ. 48 Alâ aguie-nehonzedyly-ro watay, idânârâ kurâ domodo awâkâ einwânsemo lâpylâ. Aituo ise kywymâry Roma donro modo kagâ iewiâpadaynlymo. Kagâ âseguebyze âesemo, kainzemo, Deus ety sakalaguezemo warâ —kelymo.

49 Ilâem Caifás myakâwâm kurâdo eynynâ Deus agâ aguewâni modo iwymâry kuru. Aituo myani aguely:

—Âdy mâuntuwâbyra âmaemo! 50 Jesus kydyâen-honre, kydadainhopa kitoem! Tokalâ iguelylâ ise koendonro, idânârâ kyiguepa kitoem —kely.

51 Âdatâkely awyly nutuwâbyra myani mâkâ. Kurâdo eynynâ Deus agâ aguewâni modo iwymâry lâwâne mâkâ ilâem,

Jesus izetonro keba olâ myakâwâm. Alâ wâne, Deus nhutuen-honly, Jesus, judeu domodoem iguely awyly. Tyangahu odano kulâ mâkeba myani mâkâ agueho, Deus nhutuen-hoymbylâ. 52 Kurâ judeu domodoem kulelâ inkâba Jesus iguely, idânârâ kurâdo onro anano modoem. Mâkâ iguely, idânârâ tâinwânni modo tâinkonro lelâba, mâkâ nheinwânto-moem, tokaleom ara lelâ itoem.

53 Ilâ umelâ myani judeu domodo iwymârydo Jesus xyâhoem aguelymo. 54 Awylygue Jesus kurâdo tâentoem kehoem nadakobâbyra awyly. Judeiadâpa âxiguely. Âtâ anary Efraim kehoam idâly; âji âdy peba ato iwaguepa myani mârâ âji. Xina agâlâ akâwâm târâ awyly.

55 Iwaguepa akâwâm Páscoa ety-guedo. Toenzepa poji anaym tâtyuneim modo Jerusalémram idâly âty iraynâ. Kâzewenry ara aguidyly, kydokoguely wao warâ kydzetyguedoem. Tâzetyguedoem ohonze myani idâlymo.

⁵⁶⁻⁵⁷Fariseu domodo, kurâdo eynynâ Deus agâ aguewâni modo iwymârydo warâ, “Jesus âdykâ awyly mâuntulymo-ro watay, xina xurutaungâ, xina nhawânehon-hoem” kehomobyry wâgâ, myani ohonze idâppy modo Jesus nhuinlymo. Âjigüe adapâiguelymo:
—Âdara inanajimo? Âese wânkâ mâkâ âtyam? —kelymo.

**Maria Jesus ihuru onwa uriza
nhapâdobyry**

(Mt 26.6-13; Mc 14.3-9)

12 ¹Seis iguandyly Páscoa etygue-
doem awyly ume, Jesus agâ xina idâly Betanianra, Lázaro etyram, igueypyem awyly ume kurâem nheton-
dyby. ²Xina saindyly ani. Kopae Jesus ipyniry anhedylymo. Marta pyni epâni. Lázarope lâpylâ Jesus agâ mesa wâgâ âwinduase. ³Xina âwinduadyly ume Maria uriza etary meio litru tâmânreim tâmaxi nhedyly. Nady nardo iwindy ekurugue aityby ani mârâ uriza. Âjigueto myani mârâ, âdy agâ itugândyby keba. Awylygue toenzepa ewâendyly. Jesus ihuru onwa uriza nhapâdyly. Aitybyem tyangahudugue in-hugoguely. Toenzepa âtâ oday nhârânzely. ⁴Judas Queriotte donro ani Maria aidyly nehoguebyra. (Jesus eynonro modo ewy izepaom modo emaxi egamenribyrylâ awâkâ Judas.) Aituo Judas aguely:

⁵—Toenze tâwânseim keba awârâ uriza! Awâkâ nhumeguuly! Awârâ uriza vende iedyly-ro watay, âdy pebaom modoram tâise ebyrypyry xuduly^e —kely.

⁶Âdy pebaom modo tintyendylygue inkâba ani arâ aguely, tâmagazeim tawylygue. Dinheru Jesusram xudupy etary eni ani mâkâ. Turâem tâtyze olâ mârâ odaji ietyby ewy.

⁷Aituo Jesus xinaram aguely:
—Arâ adâkezeba itaungâ Maria wâgâ. Kâjiwypazenehonwâdaundâ. Yigueduo ieguepybyry onwa tiampâdoem keankâ merâ pekodo xirâ nhekanâdyly. Niwânwâmpyra olâ, awylygue iweâlâ wonwa nhapâdyly. ⁸Aunlolâ ise âdy pebaom modope awyly. Urâ olâ ise âdiempa kulâ agâmo wawyly —kely Jesus.

Lázaro xyâly kehomobyry

⁹Agui kurâdo Jesus Betaniadâ kely indadylymo myani. Aituo myarâ idâlymo; Jesus ese kulelâba olâ idâlymo, Lázaro ese lâpylâ, mâkâ Jesus eon-honrugue kurâem itondyby.

¹⁰⁻¹¹Aituo, kurâdo eynynâ Deus agâ aguewâni modo iwymârydo âjigüe aguelymo:

—Lázaro kydyâen-honre lâpylâ warâ. Mâkâ kurâem itondyby tientuo, toenzepa kurâdo Jesus nheinwândylymo, kienomedâdomo neinwâmpyra idylymo. Âdara pylâka ise xyâhoem aguiendyly? —kelymo.

Jesus Jerusalémram saintobyry
(Mt 21.1-11; Mc 11.1-11; Lc 19.28-40)

¹²Kopaelâgâem Jerusalémram Páscoa etygueze idâwâtyby modo, Jesus saindyly kely indadylymo. ¹³Toenzepa myani iomarumo, saindyly tiuntuo. Wakuri sary nhatawâdylymo; xidadâ odaypa egaselymo, tuomare kehoem Jesus iose.

—Hosana Deusram! —kelymo. (“Tohoguezeim Deus” keze aguely.)

Tohoguezeim kuru awâkâ Deus
eon-honru enehonze
âeni!

Koendâ lelâ ise Deus israelita
domodo iwymâryem ini agâ
—kely kurâ domodo.

^e 12.5 Tokalâ anu ara kehoem ewanopyry ewâendyly ara myani mârâ uriza ewâendyly ilâem.

¹⁴Aituo Jesus jumentinhu nhawâ-dyly. Nhonwa âkuly. Iwâgâ idâly. Deus itaumbry iweniby agueho ara aidyly:

¹⁵“Âmaemo Jerusalém donro modo tyanepa itaungâ. Etaungâ. Âwymârymo saindyly.

Pymâ ton-honreim kawaru wâgâ sainto ara inkâba ise âewyly;

jumentinhu wâgâ ise saindyly!”

kely myakâwândy iweniby.

¹⁶Jesus agâ tataby tâense, tydase warâ ani xina awârâ modo aidyly; âdakeze aguely awyly xina nutuba olâ. Igueypyem, Jesus kurâem itom-bygueduo, Deus eydâ atoam odopâduo warâ lelâlâ ani xina nhenanâguely, aise Deus kehobry ara aituo. ¹⁷⁻¹⁸Toenzepa kurâdo Jesus iose idâwâdylymo, xidadâ

odaxi sainse idâly ume. Awârâ iraynâ, Lázaro igueypyem awyly ume kurâem nietondâ kely idamâmomy. “Lázaro, awâtârâba igasegâ” keduo aitobry egatuly nimopamo myani enipyry modo. ¹⁹Jesus wâgâ koendâ kurâ domodo aguely tindatuo, fariseu domodo âjigüe aguelymo:

—“Jesus kêzeinwântaundâ” kykely neinwântaymbamo. Etaungâ! Idânârâ eagâ idâlymo —kelymo.

Gregu domodo ewy Jesus agâ agueze idâhomobry

²⁰Gregu ewy idâppybe myakâwâm Jerusalémram âty aiese idâwâtyby modo duay. Judeu kebamo wâne, alâ olâ Deus nhyrendylymo. ²¹Yataen-ho Filipe, Galiléia eynonro, Betsaidadâ tâtyreim iose myakâwâm idâlymo. Aituo aguelymo Filiperam:



(João 12.12-19)

—Jesus agâ adâkedyze xina —kelymo.
²²Aituo myani Filipe, Andréram aguely.

—Gregüem aguewâni modo ewy Jesus agâ adâkedyze —kely.

Aituo azakâlâ Jesus agâ agueze idâlymo, Filipe, André alelâ.

—Judeu keba modo ewy agâ adâkedyze —kelymo.

²³Jesus aguely:

—Âdinkâba, tâwâlâ nâedâmo. Iwaguepa, won-honru, koendâ wawyly warâ idânârâ kurâdo nheto. ²⁴Idataungâ auguely. Nady ewy tâtâzeba watay, agui nitaymba, tokalâ kulâ. Ondaxi etâduo olâ, tyazeze, ago tâise, tâwiseze, ewyem tâise warâ. Arâ ewy agui idyly —kely.

{“Yiguely, kurâem witondyly wipygueduo, toenzepa kurâ domodo yeinwânsemo” keze myakâwâm Jesus arâ aguely.}

²⁵Aituo Jesus aguely:

—“Ize wato aralâ ise awidyly. Tâwâlâ Deus nidâ” myguelymo-ro watay, âigueduomo, Deus agâ inkâba ise âmaemo. Eydâ atoam mydâwâpyra ise âmaemo. “Deus ize ato ara lelâ ise awidyly, ize wato ara kulâba, tâwâlâ ise kâsenagazedily, yiguely warâ” myguelymo watay olâ, Deus eydâ atoam idâze âmaemo, aunloenlâ. ²⁶Tywymâryem yizetonro modo, yeinwântaungâ. Auguely idataungâ warâ. Eydâ watodâ lâpylâ ise âmaemo. Pabai Deus koendâ ise yeinwânni modo wâgâ aguely —kely.

Jesus tyiguely wâgâ aguehobyry

²⁷Aituo Jesus aguely:

—Takalague urâ iwerâ. Inepa kâzenagazeoly awyly, tutuze urâ. “Kâsenagazedo amaymba yekâ” keze urâ Pabairam? Arâ auguepa ise aze! Xirâ onro anaxi igueze âetybylâ urâ. ²⁸“Koendonro typygueim keba warâ

on-honru enehongâ” keze olâ urâ Pabairam —kely.

Aituo kaynâ tâjitanru aguely:

—Koendonro typygueim keba warâ won-honru senen-ho. Kânehondyly ise-ro warâ —kely.

²⁹Atonlo modo tâjitanru kau odaypa âeni indadyly. Aituo akaemo modo ewy aguely:

—Kopâ awârâ agueim! —kelymo.

Eagonro modo warâ agueim:

—Kopâ keba agueim. Anju eagâ agueim —kelymo.

³⁰Warâ olâ Jesus aguely:

—Kopâ keba, anju keba warâ agueim. Urâem inkâba Pabai târâ kaynâ aguely âmaemoenlâ. ³¹Inepa kehoem Deus agueze xirâ onro anaym yeinwântânry modoram: “Âmaemo tâwentâzeim inakanhe amidylymogue” kely ise. Inepa ise Deus, Diabu pymâem ato xirâ anaym nhainly. Adiendyse tato anientaymba ise Diabu. ³²Kruz wâgâ sakâjibyem kadaunâhonduo, eon-honru sainze urâ. Idânârâ ynynonro modo igâseze urâ, yeinwântomoem —kely Jesus.

³³Adâkezelâ ani Jesus tyiguely iraynâ, âdara tyiguely awyly wâgâ.

³⁴Atonlobyry modo aguelymo:

—Niguwêpyra ise Messias, tâkezema kâzewenry iweniby wâgâ. Aunloenlâ ise awâkâ Deus Ingonotyby, tâkeze warâ. “Urâ Uguondo Kaynâpa Âetyby yiguehoem kruz onwa âiehoze urâ” mygueaki olâ. Messiaslâ âmâ-ro watay, âdaituo pylâka “Igueze urâ” myguely? —kelymo.

³⁵Aituo Jesus in-hoguly:

—Kydadakobâdo tâense wâne kydaze peto oday, myara ise Deus ize ato ara adâjidyly inomedâdomobyry mâuntulymo. Yeinwântaungâ, yeinwântomo nhuduly umelâ. Âdiempa kulâ ise agâmo wawyly. Yeinwântaungâ, iamu odaxi âsenagazeze mydâpa mitomoem. Iamu oday adakobâni modo wâne âdyam tâtâly

nepyra, myara ise awâkâ yeinwântânry modo tâsenagazedoam tâtâly nutubamo awyly. ³⁶Agâmo wataylâ, aguely einwântaungâ. Arâ ise peto oday adakobâni ara mawlymo —kely.

**Toenzepa judeu domodo ewy
Jesus neinwâmpyra atobyry**

Agueypyem Jesus târâpa âxiguely, kurâd tâempyra itoem. ³⁷Jesus aidyly tâensemo lelâlâ wâne myakâwâm, arâlâ olâ agui judeu domodo neinwâmpyra awylymo. ³⁸Saguhuem Deus wâgâ agueypy Isaías aguehobyry ara kehoem aidyly:

“Deus, agui kurâdoram xina
âtaumbyry negatu,
aguipa kulâ olâ keankâ xina
aguehobyry einwânni.
Tâensemo lelâlâ wâne toenzepa
on-honrugue amânhytyby,
aguipa kulâ olâ âinwânni
modo”

kely iweniwâm Isaías.

³⁹Deus izepa tawylymogue neinwâmpyra awylymo. Saguhuem Isaías inwenihobyry ara iwerâ aidyly:

⁴⁰“Deuslâ mawânkâ tienkyly
modo nutuba itomoem
aienehonrim,
nhangahumo nhuanwanâdyly
waunlo ara.

Warâ neinwâmpyra awylymo,
Deus ton-honru tânehonzelâ
wâne,

Tytaumbyry nhegatuem-hoymby
nidadâmolâ wâne warâ.

Tâinwânsemo wâne watay,
tâsemaguezemo tâise”

kely Isaías.

⁴¹Deus, Jesus wâgâ aitaynrim modo nhenehonduo, mâkâ arâ inwenily. Awylygue arâ Jesus wâgâ inwenily.

⁴²Agui myani judeu iwymârydo Jesus einwânni modo, ânguyram

negatubamo olâ myakâwâm. Fariseu domodo tâdâtâdyguyhoam tâkaunâbyra awyly nhytaguylimo. ⁴³Kurâ domodo kulâ tohoguedyze atomo, Deus keba tohogueniem ize atomo.

Jesus kâmakeze âetobyry

⁴⁴Ton-honre kehoem Jesus aguely: —Urâ kulelâ inkâba yeinwânni modo nheinwânkyly, mâkâ ugononibiry lâpylâ warâ. ⁴⁵Utuwâni modo ugononibiry tutuzemo lâpylâ. ⁴⁶Urâ iajimanâni emyenro xirâ onro anaxi kâewyly, yeinwânni modo Deus itaumbyry nhutihomoem. Kâewyly ani, yeinwânni modo iamu odaypa iese. ⁴⁷Ânguy ewentâze inkâba xirâ onro anaxi kâewyly. Xirâ onro anano modo emakeze kâewyly, enagazezemo inkâba. ⁴⁸Augueho tindadyseba neinwâmpyra waunlo olâ xypyry etay, tâdâsenagazedoam igonose Deus.

⁴⁹—Unâry wâgâ kulâ inkâba awidyly. Pabailâ ugononi, awitoem, auguehoem warâ. ⁵⁰Deus aguehobyry ara lelâ amidylymo-ro watay, eagâpa mitaymba ise âmaemo. Âigueduomo, idâze âmaemo aunloenlâ eagâ mitomoem. Tutuze urâ, xirâ âkealâ awyly; Pabai “Aguekâ” kehobyrylâ xirâ augueho —kely Jesus.

**Jesus, tynynonro modo
in-hugoguehobyry**

13 ¹Tokalâ iguandyly kulelâ, Páscoa etyry adaguhoem. Tutuze myani Jesus tyigueho saindyly awyly, xirâ onro anaymba tâito, tunwynram todopâdo. Toenzepa xina inwynedyly tânehonze kâinane, tyigueho odaxi kehoem.

²Kopae Jesus agâ xina âwinduadyly ani. Awârâ iraynâ, Diabu, Judas Queriote donro, Simão imery, nhangahu odaji xunâry nhedyly, Jesus tyândyse donro modoram

nhegamehoem. ³Idânârâ adienkyly modo adientoem Tunwym ton-honru tuduze awyly, tutuze akâwâm Jesus. Deusdâpa tâewyly, eyam todopâdyly warâ, tutuze myani. ⁴Xina âwinduadyly umelâ Jesus saudyly. Tâty BOH waunlo nhetyly. Ilâpygueduo toalha nhanâdyly, âzepagâjily. ⁵Adâipygueduo, paru bacia odaji XU nhedyly. Tokalâ, tokalâ warâ xina ihuru ingokely. Ilâpygueduo, toalhague xina in-hugoguwâdyly. ⁶Simão Pedroam saintuo, mâkâ tuhuru igokedyzeba, âdykâ pymâ ânguy ihuru ingokely nepyra tawylygue. Aituo Jesusram aguely:

—Urâem tâwaneim mâkeba âmâ, Pymâ. Awylygue uhuru mâingokedyzeba wawyly —kely.

⁷Aituo Jesus eyam aguely:

—Iwerâ mâuntuba wâne âmâ âdaituo arâ awidyly awyly. Xutuze olâ âmâ —kely.

⁸—Uhuru mâingokewâbyra ise âmâ —kely Pedro.

Aituo Jesus eyam aguely:

—Âhuru kâingokeba urâ-ro watay, ynynonro mâkeba ise âmâ —kely.

⁹Jesus agueduo, Pedro aguely:

—Pymâ, arâ atayma, uhuru lelâba igokegâ-ro, iemary, yangahu alelâ-ro! —kely.

¹⁰Aituo Jesus aguely:

—Kipygueduo, idânârâ kodo tywykuneba, kuhuru lelâ tugokezeim, itybyem kaimpygueduo. Deus inakanhe matomobyry nhygakeduo, iweâ kulâ ityby ara âmaemo. Idânârâ tywykuneba wâne âmaemo; tokalâ olâ tywykeim Deus xurâem —kely Jesus.



(João 13.3-10)

/13.5 Tâwaneinhe sanâtyby modo myani adakobâni modo ihuru etary ekâjigweim, etyim, ihuru igokeim warâ.

¹¹ Tutuze myakâwâm Jesus, ânguy tuduery emaxi tyâhoem tâgamenri awyly. Awylygue “Idânârâ tywykuneba wâne âmaemo; tokalelâ olâ tywykeim” kely, Judas agueho.

¹² Xina ihuru ingokebygueduo, Jesus tâty BOH waunlo nhetondyly. Mesa onwa ekadondyly. Xinaram aguely:

—Âdaituo âhugoguelymo mâuntuba mawylymo. ¹³ “Xina iwymâry”, tâkeze, “xina enomedâni” tâkeze warâ âmaemo yam. Âkealâ amyguelymo. ¹⁴ Âwymârymo lelâlâ urâ, inomedânimo lelâlâ warâ, âhurumo olâ xigokeagui, tagonro emawyadâni wâne myara. Agonromo ihugoguwêdaungâ lâpylâ, âsemawyadâni mawylymo mânehon-homoem. ¹⁵ Aetomobyry ara amitomoem, âsemawyadâdaungâ, imawyadâdomobyry ara. ¹⁶ Idataungâ aguely. Tâzetary, tywymâry takaze kehoem tynrentuneba; unâ sani, igononibyry takaze kehoem tynrentuneba. ¹⁷ Âmaemoma midataimo aguely. Awidyly metaimo warâ. Âjigue mâsemawyadâduomo, koendâ kehoem ise Deus agâmo.

¹⁸—Âmaemo kâinduakeyby modo âtudâmo urâ. Tutuze urâ, tokalâ âmaemo ewy agâ Deus koendâpa awyly. Deus itaumbry iweniby ara ise aidyly: “Uduery ise yagâ âwinduani” kely iweniby. ¹⁹ Agâieholly wâgâ xirâ aguely, yizepano modo emaxi kâze-gameoly iraynâ, “Aise” ugehobyry aidyly-ro watay, URÂLÂ URÂ kelygue tâzekeim wawyly mâinwântomoem. ²⁰ Kâingonotaymby modo koendâ edaenkunri, urâlâ nhedaenkuly waunlo ara lelâ. Koendâ iedaenkunri, mâkâ ugononibyrylâ koendâ nhedaenkuly. Xirâ mâuntudyzemo kuru wato—kely.

Tâgamenri wâgâ Jesus aguehobyry

(Mt 26.17-25; Mc 14.12-21;

Lc 22.7-13,21-23)

²¹ Aguepyem, toenzepa kehoem Jesus adahulily. Xinaram aguely:

—Idataungâ wao. Tokalâ âmaemo ewy ise yâdysedo modo emaxi iegamerim—kely.

²² Aituo xina âzedyly. Toenzepa xina âseguâdâdyly, ânguy agueho xina nutuba tawylygue. ²³ Urâ Jesus toenzepa inwynegyuly iwaguepa ani iopay ekadybyem wawyly. ²⁴ Simão Pedro PUK PUK idyly, ânguy wâgâ Jesus aguely awyly auguehoem.

²⁵ Aituo ago Jesus iopaji udâly, kampâiguehoem:

—Pymâ, ânguyka ise âdysedonro modo emaxi igrimeim?—uguely.

²⁶ Jesus in-hoguly:

—Mâkâ pão ikuiby kâunduhobyry—kely.

Aituo pão SAGAI ietyby nhanâdyly, inkuily prato odanogue, Judasram nhuduly, Simão Queriote donro imeryram.

²⁷ Judas pão nhemakely. Ilâenlâ Satanás emaxi idyly, Satanás “Aiekâ” kehobyry anhetoem. Aituo Jesus eyam aguely:

—Amânhedyse mato inepa aiekâ—kely.

²⁸ Xina mesa wogonro modo nutuwâbyra akâwâm âdaituo Jesus arâ aguely awyly. ²⁹ Judas dinheru etary eni awylygue ani xina ewy tyan-gahu oday aguely:

Tâlâ pylâ wakeim modo:

—Jesus gâlâ keanra Judas pyni nhanâdyse âtyem warâ?—keim.

Eagonro modo aguely:

—Âdy pebaom modoram âdylâ nhuduen-honly lâgâlâ keanra Jesus—warâ kely.

³⁰Pão emakeimbyryem, inepa kehoem Judas idâly. Iamu odaylâ egasely, kopae awylygue.

**Koendâ lelâ âjigie itaungâ,
âpynedaungâ warâ**

³¹Judas âxiguebygueduo Jesus xinaram aguely:

—Iwaguepa urâ Uguondo Kaynâpa Âetyby yigueho. Yigueday ise won-honru, koendâ wawyly, Deus koendâ awyly, eon-honru warâ kênehonly. ³²Deus koendâ awyly, eon-honru warâ enehonze urâ. Alâpylâ awâkâ, koendâ wawyly, won-honru warâ enehonze. Inepa ise awârâ aidyly. ³³Tâjiunwym tymery inwynedo ara lâpylâ âwynedylymo. Âdiempa kulâ ise agâmo wawyly. Udâpygueduo, uize âmaemo. Judeu domodo iwymârydoam uguemy myara olâ âyanmo aguely: “Udâhobyryam mydâpa olâ ise âmaemo.” ³⁴Iwelo tâzezewenry ise xirâ: “Mâkâ agâ, mâkâ agâ warâ âpynedaungâ, âwynedylymo ara.” ³⁵Mâpynedylymo-ro watay, idânârâ kurâdo xutuze ynyonro mawylymo —kely.

**Jesus Pedroram, “Azagâ tokalâ
warâ ‘Kâuntuwâbyra urâ awâkâ’**

keze âmâ” kehobyry

(Mt 26.31-35; Mc 14.27-31;

Lc 22.31-34)

³⁶Aituo ani Simão Pedro Jesus nhapâiguely:

—Âdyanka ise mydâly, Pymâ? —kely.

Aituo Jesus in-hoguly:

—Iwerâma ise âmâ udâhobyryam mydâpa. Iweâkuba ise mydâly —kely.

³⁷Pedro nhapâigueondyly:

—Âdaituoka iwerâ mydâhoram, udâpa wawyly? Kâmayno amaymba imakeze iguein-em kâdutyly! —kely.

³⁸Aituo Jesus eyam aguely:

—Âkeaka? Xirâ enanâguegâ. Xirâ kopae, aukuma igâtudyly iraynâ, azagâ tokalâ warâ ise “Jesus kâuntuwâbyra urâ” myguely —kely.

Jesus ânwa Kunwyn-am tâdâtâho

14 ¹Aituo Jesus xinaram aguely: —Tytyremba, tâseguâdâzeba warâ itaungâ. Deus einwântaungâ, yeinwântaungâ lâpylâ warâ. ²Pabai eydâ atodâ toenzepa âtâ modo mâxi-dâdomoem. Ijidylo nhonse udâly. Aypa-ro watay, augewâpyra tâise urâ. ³Ijidylo nhonse idâppyem, odopâze urâ, nhesemo, yagâ eydâ watoam mydâhomoem. ⁴Tutuze âmaemo ânwa eydâ watoam kani —kely.

⁵Aituo Tomé aguely:

—Xina nutuwâbyra âdyam mydâly awyly, Pymâ. Tutuzeinhe inkâba awârâ ânwa âyam tâdâtâho —kely.

⁶Aituo Jesus aguely:

—Ânwa Pabairam tâdâtâholâ urâ. Yagâ lelâ âdy iozeno awyly âdu-tuoly. Ywâgâ lelâ Deus eydâ atoam taidindyly. Yeinwânni modo lelâ ise Pabairam idâim. Yeinwâmpyra âmaemo-ro watay, Pabairam aintaymba âmaemo. Yeinwântuomo lelâ eyam aindylymo. ⁷Iwerâ utudâ âmaemo. Pabai xutuze lâpylâ âmaemo. Ietâ, utudâ warâ mawylymogue, Pabailâ mâuntulylo, mâenkylylo warâ —kely.

⁸Aituo Filipe aguely Jesusram:

—Pymâ, Kunwym Deus enehongâ. Awârâ kulâ xina nhekaguly, tuomazehoem —kely.

⁹Aituo Jesus aguely:

—Filipe, iweâpa lelâlâ wâne agâmo wawyly. Ânguy wawyly mâuntuba lelâ waunlo ara olâ âmâ! Ieni modo, Pabai tâensemo lâpylâ. Awylygue ietâ kulâ, “Pabai mygueho enehongâ” tâkezeba ikâ. ¹⁰Pabai agâ tokalâ wawyly; yagâ

tokalâ Pabai awyly warâ tâinwânse wânkâ âmâ, Filipe? —kely.

Aituo Jesus xinaram aguely:

—Yangahu odano kulâ mâkeba xirâ augueho, Pabai “Aguékâ” keho-byrylâ. “Aiekâ” kehobyrylâ agânhekyly warâ. ¹¹Auguely einwântaungâ. Einwântaungâ Pabai agâ tokalelâ wawyly. Auguely wâgâ yeinwândyseba mataymo, Pabai Deus eon-honrugue agânhetaymby modo mâentybymo wâgâlâ yeinwântaungâ. ¹²Idataungâ auguely. Idânârâ yeinwânni modo agânhetaymby modo aiese. Yara adyesenry modo anhetoem agueypyem urâ, adyesenry ton-honreim lelâlâ. Inepa ise Pabairam udâly. Urâ lelâlâ agânheto nuduompyrama ise. ¹³Agânhetoem mâenkadybymo aiese urâ, iezedy wâgâ idânârâ kehoem agânhetoem amyguehomobyry. Pabai ton-honreim, koendonro warâ awyly kâenehohoem ise awidyly. ¹⁴Idânârâ iezedy wâgâ mâenkadybymo aiese urâ —kely Jesus.

“Deus Ispiritury igonose urâ” Jesus kehobyry

¹⁵Aituo Jesus aguely:

—Ywynedâ mataymo, auguehobyry lelâ aietaungâ. ¹⁶Pabairam ekaze urâ, âurunimo ingonotoem. Odokewâ-byramo ise; alâ ise agâmo awyly. Deus Ispiriturylâ ise mâkâ. Mâkâ ise Deus wâgâ âkealâ kuru agueim. ¹⁷Deus eynynâbaom modo agâ inkâba Deus Ispiritury. Nutuwâbyramo netaymbamo warâ ise. Âmaemo olâ xutuze. Alâ mawânkâ agâmo awyly.

¹⁸—Âxigueze wâne urâ, omopamo olâ ise urâ. Agâmo witoem odopâze urâ. ¹⁹Inepa ise Deus eynynâbaom modo iepyra idylymo. Âmaemo olâ iese. Igueypyem kurâem witondobyry wâgâ ise Deus agâpa mâseagongueba mawylymo; igueypyem, yagâlâ ise

âmaemo. ²⁰Kurâem witonduo ise mâuntulymo, Pabai agâpa wipyra wawyly. Yagâpa mipyra mawylymo, agâpamo wipyra wawyly warâ mâuntulymo.

²¹—Yeinwânni modo, auguehobyry idani modo warâ ywynedâ tawyly tânehonzemo. Ywyneni tywyneze Pabai. Iwynezemo lâpylâ urâ, koendâ utuhomoem aiese urâ —kely.

²²Aituo Judas, Jesus nhapâiguely, Queriete donro keba olâ, eagonro:

—Âadaituoka ise xinaram kulelâ mâenehonly; Deus eynynâbaom modo pylâ nepyramo-ro warâ awyly? —kely.

²³Aituo Jesus in-hoguly:

—Ywyneni modo auguehobyry lelâ ise anhekylymo; Pabai iwynezemo lâpylâ. Eagâmolâ ise xina-ro warâ. ²⁴Ywynedânry modo auguehobyry takazemo lelâ. Urâ kulâ mâkeba xirâ mâindakylymo agueim, Pabai aguehobyryenlâ xirâ auguely.

²⁵—Agâmo wawyly umelâ xirâ auguely. ²⁶Âxigueze urâ. Âurunimo âyanmo âese olâ. Deus Ispiritury ise mâkâ, Deus ingonotyby ietaybyaji agâmo itoem. Idânârâ âyanmo auguehobyry enanâgueze, inomedâzemo warâ auguehobyry modo mâuntuohomoem.

²⁷—Yara madahuliba âesemo. Xirâ onro anano modo toenzepa ise adahulilymo, eanumo warâ. Âmaemo olâ tadahulizeba itaungâ, tyanepa warâ. ²⁸“Idâze wâne urâ, odopâze olâ urâ” uguely midataimolâ. Toenzepa awârâ mâindatuomo madahulilymo. Tadahulizeba itaungâ. Urâem koendâ lelâ aidyse mataymo, tâjityenzeba itaungâ; tuomare itaungâ, Pabai ugononibyryam kodopâdyly awylygue. Yakadâ ton-honreim kuru mâkâ lelâ, unâ sodo ton-honreim kuru, egatuim takaze. ²⁹Pabairam udâly iraynâ

xirâ auguely âyanmo. Udâduo ise, auguehobyry âkealâ awyly mâinwândylymo. ³⁰Agâmo alâ auguezesedyly witaymba ise urâ. Deus eynynâbaom modo iwymâry Diabu saindyly mawânkâ. Ton-honreba olâ ise mâkâ yagâ. ³¹Idânârâ, Pabai “Aiekâ” keho-byry lelâ agânhekyly, Pabai tywyneze lelâlâ wawyly, eynynâbaom modo nheinwântomoem.

—Autaungâ. Inoro tarâpa —kely ani Jesus.

Uva ipery emyenro awâkâ Jesus

15 ¹Jesus xinaram aguely: —Uva ipery emyenro urâ. Pabai pylâ uva eni emyenro-ro warâ. Se tywindyen-ro watay, iwatary modo niguwâpyra, arâ lâpylâ urâ, nynonro modo niguepa itoem aienehonrim wawyly. ²Deus aguehobyry adienydebaom modoma uva iwatary ewisedânry emyenro. Uva iwatary ewisedânry eni tatâwâze myara, ise Pabai tydatânry modo tygue nhedyly. Uva iwatary ewisenri watayma eni tâense, tuonse warâ. Inakai modo lelâ nhatâwâgyuly, iwatary toenzepa ewiseondoem. Arâ lâpylâ Pabai, tynynonro modo odaypa izepa tato nhetyly, ize tato lelâ anhetomoem. ³Pabai inakanhe amitomo nhygakely ani, inomedâdomobyry mâinwântomobyry wâgâ. ⁴Yeinwânsezedaungâ lelâ, yagâpa mâiehowâbyra ise âmaemo; agâpamo wipyra ise urâ warâ. Uva iwatary wâne ipery wâgâ atay lelâ ewisely myara lâpylâ âmaemo, yeinwântuomo lelâ Deus ize ato ara amidylymo.

⁵—Uva ipery emyenro urâ, uva iwatary emyenro âmaemo-ro warâ. Ipery wâgâ wâne uva iwatary koendâ kehoem PE warâ awyly, myara ise yagâpa itânry modo koendâ lelâ Deus ize ato ara aidyly. Urâ peba kulâ,

mâkâ ize ato ara amipyra âmaemo. ⁶Uva sodo iwatary satârimbyryem, âpa ezaypa nhamely. Aituo iwatary modo iladyly. Ilâpygueduo, indâtygyuly, nhaduândyly. Awyara ise, yagâpanro modo Deus iopayba iedyly. Petomâ onwanxi ise samely, mârâ uva iwatary ewisedânry iaduânto ara.

⁷—Yagâpa mipyra âmaemo, âyanmo auguehobyry mâinwânsezedylymo lelâ watay, emakeze lelâ âmaemo idânârâ Pabairam mâenkadybymo. ⁸Koendonro amânhedysemo wato amânhedilymo watay, uva iwatary tâwiseim emyenro ise âmaemo. Deus koendâ awyly, eon-honru warâ enehonze âmaemo amânhekylymo wâgâ. Arâ ise ynynonro kuru mawylymo mânehonlymo. ⁹Pabai ywynedyly ara lâpylâ âwynedylymo. Auguehobyry ara lelâ aitaungâ, âwynedâmo wawylygue. ¹⁰Pabai agânhedysese ato agânhepyra witaymba urâ. Awylygue kadahuliba wawyly, ywynedâ awyly tutuze urâ. Arâ lâpylâ, “Aietaungâ” ugueho mâinmopa âmaemo-ro watay, madahuliwâbyra ise âmaemo, âwyne-dâmo wawyly enanâgueze âmaemo.

¹¹—Madahulidydzemo inkâba urâ, awylygue ârudilymo, tuomare lelâ mitomoem. ¹²Xirâ auguehobyry ara aitaungâ: “Agonromo agâ âpynedaungâ; koendâ mâzetomo ara lâpylâ agonromo agâ koendâ âzetaungâ.” ¹³Mâkâ tataen-ho emakeze iguerim mawânkâ tataen-ho iwyneni kuru. ¹⁴Auguehobyry amânhedilymo watay, yataen-ho âmaemo. ¹⁵“Yataen-ho” uguely âyanmo; “iemary” uguely mâkeba. Awylygue agâmo unâgu ywâgâ aini wâgâ. Pymâ tywâgâ aguewâpyra tâmarydoam. Âyanmo olâ auguely, idânârâ Pabai “Aguekâne” keho-byry.

¹⁶—Âmaemo mâkeba keankâ atâen-homoem witoem uduakeim;

urâlâ keankâ âduakenrimo, Deus ize ato amânhetomoem, yeinwândyly mâinmopa mitomoem. Arâ ise uva iwatary tâwiseim ara mawlylmo, ewily inakanhe itânry. Ywâgâ mâenkadylmo-ro watay, idânârâ mâenkadybymo xuduze lelâ Pabai. ¹⁷Awylygue, xirâ auguely: “Agonromo agâ âpynedaungâ; koendâ mâzetomo ara lâpylâ agonromo agâ koendâ âzetaungâ.”

**Jesus nheinwândylymogue
eynyonro modo âzenagazeoze**

¹⁸Jesus xinaram aguely:

—Ynynâbaom modo âizepamo watay, enanâguewâdaungâ, âizepamo idyly iraynâ yizepa atomobyry. ¹⁹Deus eynynâbaom modo eynynâlâ âmaemo-ro watayma tâise âwynedylymo. Saguhoem Deus eynynâba wâne ani âmaemo, alâ olâ âduakelymo urâ xurâem mitomoem. Awylygue iwerâ Deus eynynâbaom modo anhekyly amânhedyseba mawlylmo. Awylygue âizepamo awylymo, inagazedylmo warâ.

²⁰—Auguehobyry enanâguewâdaungâ. Tâzemary, tywymâry takaze kehoem tynrentuneba. Pymâ eto ara lâpylâ ise emary modo âzeholy. Ienagazeni modo inagazezemo lâpylâ. Kâunrutomobyry anhedylmo-ro watay, mâunrutomo aiesemo lâpylâ. ²¹Mâzenagazeolmo ise, ynyonroem mawlylmogue. Mâkâ ugononibyry nutubamo mawânkâ. ²²Xirâ onro anaxi kâewyly, Deus wâgâ agueze. Tindatuo, neinwântaymbamo ani. Kâepyra urâ, eyanmo auguepa warâ watay, tâwâlâ tâise aguelymo: “Âdykâ Deus itaumbryry xina nidataymba. Tâzagazeduneba xina, tindatânry kulâ neinwâmpyra tawlylygue” kelymo tâise. Auguely tydase, agânhekyly tâense warâ akaemo, yeinwâmpyramo olâ; xypyry etay Deus enagazezemo.

²³—Yizepanro modo, Pabailâ izepa atomo lâpylâ. ²⁴Enanaynmolâ adyenyry modo kehoem agânhedyly. Idânârâ olâ yeinwâmpyramo. Xirâ adyenyry modo agânhepyra urâ-ro watay, “Tâwentâguezeinhe mawlylmo” aguewâpyra tâise Deus. Akaemo iwerâ tâwentâguezeim, agânhetyby tâensemolâ mawânkâ, yeinwâmpyramo olâ. Yize inkâba akaemo, Pabai izepamo lâpylâ warâ. ²⁵“Warâ ise aidyly” tâkezelâ Deus. Iwenibyem itaumbryry awo wâgâ: “Âdaituoba kulâ yizepa awylylmo” kely iwenibybe.

²⁶—Âurunimo âese, Deus Ispiritury keho, Deus eydâpalâ âeni. Deus wâgâ âkealonro ise inomedâdomo. Pabai-dâpalâ ise âyanmo kâingonodyly, ywâgâ agueze lâpylâ mâkâ. ²⁷Xirâ onro anaym iewanu kanguly umelâ yagâ mawlylmo. Awylygue ise ywâgâ mâindatybymo, mâentybymo warâ mâengatulymo —kely Jesus.

16 ¹Jesus xinaram aguely: —“Ynyonro modo, ynynâbaom modoram âzenagazeoze” tâkeze urâ. Aidyly-ro watay, âtywambyramo, yeinwândyly mâinmopamo warâ mitomoem olâ auguely. ²Âtâ tâdâtâdyguyho odaypa igaseânzemo, akaemo âhomo sainse. Âlymo-ro watay, Deus ize ato aralâ adâidyly waunlo ara ise enanajimo. Iozepa kulâ olâ arâ âpaunzedylmo. ³Arâ aidylymo olâ ise, utuba, Pabai nutuba warâ tawlylmogue. ⁴Aidyly iraylâ olâ xirâ âyanmo auguely, mâzenagazeoduomo, madapâendyba mitomoem. “Kyam Jesus aguehobyrylâ xirâ aini” keze âmaemo —kely.

Deus Ispiritury ewano

Jesus aguely:

—Yeinwâmpygueduomo, âdara mâzenagazeolmo awyly wâgâ auguepa ani urâ, agâmolâ wawylygue. ⁵Inepa

olâ ise udâly, mâkâ ugononibyryam. Âmaemo ewy olâ yapâigueba: “Âdyanka ise mydâly?” myguepamo. ⁶Toenzepa âtynrumo, “Âydâpamo widyly” uguely mâindatuomo. Tâseguâdâzeba itaungâ.

⁷—Idataungâ aguely. Udâly lakuru âmaemoem koendonro. Udâpa urâ-ro watay, Ârunimo nâetaymba ise. Udâduo olâ, âyanmo igonose urâ. ⁸Deus Ispiritury âetuo, agueze mâkâ ynyndâbaom modoram: “Wamyguelymo: “Tutuze xina, Deus ize ato, izepa ato warâ. Tutuze xina, koendonro, koendonro keba warâ. Tutuze xina, Deus ânguy nigonopyra awyly tâdâsenagazedoam âsenagazedoem’ myguelymo. Iozepa olâ amyguelymo” kely ise eyanmo.

⁹—“Tutuze xina, Deus ize ato, izepa ato warâ” kelymo. Iozepa kulâ aguelymo, yeinwâmpyramo mawânkâ. ¹⁰“Koendonro, koendâpaom warâ tutuze xina” kelymo. Iozepa kulâ aguelymo. Pabairam idâze urâ; ietombyra ise âmaemo-ro warâ. Myarâ kodopâduo ise koendonro lelâ wawyly mâuntulymo. Ietombyra ise âmaemo-ro warâ. ¹¹“Tutuze xina, Deus ânguy nigonopyra awyly tâdâsenagazedoam âsenagazedoem” kelymo. Iozepa kulâ aguelymo lâpylâ. Saguhoenlâ Deuslâ agueim: “Urâ xurâ keba modo iwymâry aunlolâ ise infernudâ âsenagazedily” keim. “Ynyndâbaom modo lâpylâ aunlolâ infernudâ Deus enagazenehonze” keim lâpylâ.

¹²—Tâlâ urâ toenzepa âyanmo agueho, mâuntuhomoem nudupa olâ, toenzepa mawânrâ iwerâ âtynrumo. ¹³Deus Ispiritury âetuo olâ, âyanmo xutuen-honze, idânârâ âkealonro Deus mâuntudyzemo ato. Âdy aini awyly wâgâ ise mâkâ aguely. Tyangahu odano kulâ mâkeba ise mâkâ agueho.

Mâkâ agueho olâ ise Kunwym Deus tyam aguehobyrylâ. ¹⁴Auguehobyry, âyanmo enanâguehonze mâkâ. Arâ ise mâkâ, koendâ wawyly, won-honru warâ nhutuen-honly. ¹⁵Idânârâ agueho modo, Pabai aguehobyrylâ. Deus Ispiritury aguely idase, âyanmo egatuze-ro warâ —kely.

Tâjitynru, tojiomaru warâ

¹⁶Jesus xinaram aguely:

—Iweâ lelâlâ ise iepyra midylymo. Inepa olâ ise, ietondylymo —kely.

¹⁷Xina âjigie aguely:

—Âdakeze aguely awyly kiuntuwâbyra kurâ, “Iweâ lelâlâ ise iepyra midylymo. Inepa olâ ise ietondylymo” keduo. Wakeanry lâpylâ: “Iepyra mawylymo ise, Pabairam udâly awylygue” keanry. ¹⁸Âdakezeka “Inepa olâ ise, ietondylymo” kely? Kiuntuwâbyra kurâ awârâ —xina kely.

¹⁹Agueho koendâ xina nutuba awyly, tutuzelâ olâ Jesus. Awylygue aguely:

—Idataungâ aguely. Adâkeonze urâ warâ. “Iweâ lelâlâ iepyra ise âmaemo. Inepa olâ ise ietondylymo.” Xirâ kebaka agonromo agâ mada-pâiguehomo? ²⁰Toenzepa âjityenze, eogumase warâ âmaemo. Ynyndâbaom modo iomamunumo ume, tytyre ise âmaemo; omarumoem ise olâ awârâ. ²¹Tymery egaseday, pekodo tuomaru-neba ewânugue. Iamudo iazepygueduo olâ toenzepa tuomazeze, tymegue mawânkâ. ²²Arâ ise âtynrumo aunlo-enlâ nipyra awyly. Tytyre âmaemo iwerâ, “Iweâ lelâlâ ise iepyra midylymo” ugeduo, nhetonzemo olâ urâ. Aituo ise toenzepa omarumo. Ânguy tuomareba ânehonwâbyramo ise.

²³—Ârunimo âetuo, inomedâzemo mâkâ. Agâmopa lelâlâ wâne ise urâ, mâkâ olâ ise agâmolâ. Tâwâlâ mapâiguelymo mâuntudânrymo wâgâ.

Idataungâ auguely. Iezedy wâgâ Pabai uguehoam mâenkadylymo-ro watay, xuduze mâkâ âyanmo. ²⁴“Jesus ezedy wâgâ xina nhekadyly” myguepa lelâ olâ âmaemo Deus agâ. Ekadaungâ. Mâenkadybymo emakeze âmaemo, toenzepa omaromoem. Xirâ mâuntu-dyzemo kuru wato —kely.

Jesus eon-honru, Diabu eon-honru takazeno kuru

²⁵Jesus aguely:

—Tutuzenryem xirâ unâ kêngatuly, âdaunlo Deus awyly wâgâ inomedâdomoem. Tutuzeinhelâ inomedâdomo sainse olâ. Mâindakylymoenlâ mawânâ ise âyanmo Pabai wâgâ auguely. ²⁶Mârâ ume, Deus agâ amyguedaymo, “Xina xirâ nhekadyly Jesus ezedy wâgâ” keze âmaemo. Âmaemoem auguezesedyly witaymba ise urâ. Âmaemolâma ise eagâ agueim. ²⁷Pabai âwynedâmo awylygue, koendonro xuduze mâkâ âmaemoem. Ywynedylymogue, Deusdâpa kêwely tâinwânse mawylymogue warâ âwyne-dylymo. ²⁸Xirâ anxî kêtoem, Deus ingonotyby urâ. Inepa ise tarâpa widyly. Pabairam ise udâly —kely Jesus.

²⁹Aituo xina aguely:

—Iweâma tutuzeinhelâ amyguely. Amyguedyse mato moempyra âmâ. ³⁰Idânârâ tutuze mawyly, tutuze xina. Xina apâiguely iraynâlâ, tutuze âmâ, xina adâkedyze ato. Awylygue Deuslâ ogononi awyly xina nhutuly —xina kely.

³¹Jesus aguely:

—Deus ingonotyby wawyly tâinwânse lelâlâ wâne âmaemo, arâlâ olâ koendâ yeinwâmpyra mawylymo. ³²Inepa ise wodokelymo. Adapâeguywâze âmaemo, itymoam, itymoam ise âmaemo. Urâ kulelâ ise yânlymo. Urâ kulelâba olâ ise urâ, Pabai yagâlâ awylygue. ³³Xirâ modo wâgâ auguely

aidyly iraynâlâ, âtywambyra mitomoem. Yeinwântâ mawylymogue, koendâ lelâ itaungâ, tâseguâdâzeba. Xirâ anaym mawylymo ara ton-honre ise âmaemoem; âsenagazeze âmaemo. Tâegane olâ itaungâ. Won-honruma yynâbaom modo iwymâry Diabu eon-honru takazeno kuru —kely Jesus.

Jesus Tunwym agâ aguehobyry

17 ¹Aguenripyryem, Jesus kauram MYK idyly. Deus agâ aguely:

—Pabai, amyguehobyry arâlâ ise inepa yiguely. Âmery wawylygue, enehongâ koendonro wawyly, won-honru warâ. Arâ awidyly, koendonroem mawyly, on-honru warâ kêenehohoem lâpylâ. ²Idânârâ iwymâryem witoem amyguewâm. Kâenkylly lelâ asaemo. Âmâlâ lâpylâ asaemo nynonroem ienehonrimo. Awylygue ise yynonro modo agâpa kânhenhomba wawyly; igueduomo, aunloenlâ agâ nidâmo. ³Akaemo aunloenlâ agâ itaynrim modo, idânârâ koendâ kehoem âtudâmo, âmâ lelâ Deus tokaleom mawyly. Utudâ lâpylâ asaemo, Jesus Cristo mâingonotyby wawyly. Kagâpa tyetuneba ise asaemo; igueduomo, idâzemo aunloenlâ kagâ itomoem.

⁴—Koendonro mawyly, on-honru warâ senen-ho, xirâ anaym wawyly ara. Âwanu aiese ugonotobyry sewanike warâ. ⁵Pabai, târâ agâ wawyly ume, tâdyren-honze akâwândy urâ, onro peba awyly ume. Tâwâlâ kâdyren-hondonji, izay watay kâdyren-hon-hobyry ara.

⁶—Pabai, yynonroem mânhehonorwâdyby modoram ânguy mawyly senen-ho. Âmâ xurâ lâpylâ asaemo. Âmâlâ yynonroem ienehoinmo. Amygueho tâinwânse asaemo. ⁷Tutuze asaemo, idânârâ agânhetaymby modo, won-honru mâunduypyguelâ

agânhetaynly awyly. ⁸Unâ eyanmo kâengatuhoem amygehobyry segatu. Auguehobyry neinwândâmo. Eydâ matodâlâ mâingonotybyenlâ kâewyly awyly, tutuze asaemo.

⁹—Pabai, âyam kâenkadyly, koendâ asaemo mâentoem. Yeinwântânry modo mâentoem kâenkadaymba urâ. Ynynonro modo olâ koendâ egâ. Âynynonro lâpylâ mawânkâ asaemo. ¹⁰Idânârâ ynynonro modo, âynynonro lâpylâ. Idânârâ âynynonro modo, ynynonro lâpylâ. Adâkeday, adientay warâ tânehonzemo, koendonro wawyly, ton-honre wawyly warâ.

¹¹—Inepa ise udâly eydâ matoam. Xirâ anaymba ise urâ; asaemo olâ ise tarâlâ, yeinwântânry modo duaymo ise-ro warâ. Pabai, koendonro lelâlâ âmâ; inakanhe amitaymba âmâ. Toenzepa ton-honreim lâpylâ âmâ, on-honrugue awitoem yam amygue. Asaemo ynynonro modo egâ on-honrugue, tokaleom ara lelâ itomoem, urâ, âmâ warâ tokaleoem kydawyly ara. ¹²Ijipyay, xirâ anaym eagâmo watay, on-honrugue tâensemo keankâ urâ. Asaemo ewy tokalâ kulâ keankâ ynynâba ini. Âunâry awo wâgâ iweniby aralâ keankâ aidyly, aise kehobyry aralâ.

¹³—Inepa ise eydâ matoam udâly. Tarâ xirâ anaym wawyly ara, ynynonro modo xurâem agâ auguely, nâjityemybra itomoem, tytyremba wato ara, imâem kehoem iomarumo nidâ. ¹⁴Eyanmo kâengatuhoem amygehobyry segatu. Tâinwânse asaemo. Ynynâbaom modo adientyse ato, adientyse inkâba asaemo, ynynâbaom modo anhekyly, agânhedeyseba wato ara lâpylâ. Awylygue, ynynâbaom modo izepa idylymo.

¹⁵—Pabai, ynynâbaom modo duaypa mâentyhomoem kâenka-

daymba urâ. Diaburam nâdynanâoba itomoem xuahurumoem ikâ wao, uguely olâ. ¹⁶Ynynâbaom modo adientyse ato agânhedeyse inkâba urâ, arâ lâpylâ asaemo adientysebamo awyly. ¹⁷Amygehobyry ara lelâ anidâmo; idânârâ amygueho âkealâ mawânârâ. ¹⁸Âynynâbaom modo duaxi ugonotobyry ara, arâ lâpylâ asaemo kâingonodyly ynynâbaom modo duaxi. ¹⁹Âyam kâtuly, idânârâ agânhedeyse mato agânhetoem, kâenmakehomoem. Arâ awidyly âmâ xurâem itomoem, ize mato anhetomoem warâ.

²⁰—Asaemo lelâba mâentoem kâenkadyly. Asaemo ywâgâ aguely tindatuo yeinwânni modo olâ egâ lâpylâ. ²¹Pabai, kâenkadyly, idânârâ yeinwânni modo tokaleom ara lelâ itomoem. Tokaleom ara kagâ itomoem kâenkadyly, yagâ mawyly ara, agâ wawyly ara warâ nidâmo. Tokaleoem nidâmo, yeinwântânry modo âmâlâ ugononi awyly nhutuhomoem. ²²Ton-honre witoem, koendonroem witoem warâ amygehobyry ara lâpylâ eyanmo auguely, eon-honromoem, koendonroem itomoem warâ. Arâ awidyly, tokaleom ara lelâ itomoem, yagâ tokaleom mawyly ara, agâ wawyly ara warâ. ²³Augueondyly, Pabai. Tokaleom waunlo ara eagâmo wawyly; tokaleon-ro waunlo ara yagâ mawyly. Aituo tokaleom ara lelâ kagâ awylymo. Arâ tientuo, ynynâbaom modo xutuzemo, âmâ ugononi awyly, ywynedo ara lâpylâ mâinwynedylymo warâ.

²⁴—Pabai, âdykâ watodâlâ, yagâ ize urâ ynynonroem mânhenehonwâdyby modo. Kytanrugue kulâ onro kiungudyly iray ywynemâ. Ywynedylygue, koendonroem, ton-honreinhe warâ witoem amyguewâm. Urâ xurâ modo won-honru, koendâ wawyly warâ

nhedysemo urâ. ²⁵Pabai, âdykâ inakanhe amitaymba âmâ. Yeinwântânry modo âutuwâbyra. Urâ olâ âtudâ. Akaemo yeinwântoem amânhe-nehoymbry modo tutuzemo âmâ ugononi awyly. ²⁶Akaemoam âtuen-ho, alâ ise awisezedily, âdara tagonro agâ tâpyne-dily nhutuhomoem, wywnedâ âmâ ara, urâlâ eagâmo witoem, nhutuhomoem warâ —kely Jesus tunwym Deusram.

**Jesus nhawâtomobyry,
nhemakâjihomobyry warâ**
(Mt 26.47-56; Mc 14.43-50;
Lc 22.47-53)

18 ¹Deus agâ agueypyem, Jesus xina agâ idâly. Xina xytâ-gyly; paru egatudo Cedrom xina nhekuâdily; xina salokuly. Xina idâly toenzepa se modope atoam. ²Judas, Jesus iduery modo emaxi egamenri-byry, tutuze lâpylâ ani mârâ âji Se Oliveira Eka. Tâtâzezema kâinane xina myarâ Jesus agâ. ³Târâ awyly tutuze tawylygue, Judas idâly Se Oliveira Ekaram sodadu pymâ romano ingonotyby modo agâ. Fariseu domodo, kurâdo eynynâ Deus agâ aguewâni modo iwymârydo warâ, Deus ety iguardary modo ingonodylymo Judas agâ. Espada, se, esagon-ho, tyatygueim warâgue tâmatunemo lelâ. ⁴Tutuzelâ Jesus idânârâ âdy aini awyly. Eagâmo oxioze idâly. Nhapâiguelymo:

—Ânguyka mâwinlymo? —kely.

⁵—Jesus Nazaré donro —kelymo.

—Mâkâ mâwinlymolâ urâ! —kely Jesus.

Eagâmolâ akâwâm Judas, Jesus egamenribyry. ⁶“Mâkâ mâwinlymolâ urâ” Jesus keduo, âjihujigulylymo, onro onwa ihuguewâdilylymo. ⁷Ihugueybyem, sautuomo, Jesus agueondily:

—Ânguyka mâwinlymo? —keondily.

—Jesus Nazaré donro —keondilymo.

⁸—“Mâkâlâ urâ” ugueanselâma. Urâ mâwinlymo atay, asaemo yagonro modo tâwâlâ nâtâmo —kely.

⁹Deus agâ adâkeday, “Tâensemo urâ. Tokalelâ olâ keankâ yagâpa ini” tâkehobyry wâgâ. Guarda domodoram nhekadyly tynynonro modo nawâpyra itomoem.

¹⁰Simão Pedro tyspadary nhetyly ety odayba, kurâdo eynynâ Deus agâ aguewâni modo iwymâry kuru ety oday tâwaneim Malco keho iwantary aho eynynonro nhatâly. ¹¹Aituo Jesus aguely Pedroam:

—Adâiseba ikâ. Âdahoru ekanâgâ. Pabai aguehobyry ara âsenagazeze urâ. Tâwâlâ lelâlâ wâne tâdâsenagazedily eon-honru, tânyzeim tudureim kâenyly-ro waunlo ara kehoem —kely.

Jesus Anás enado satobyry

¹²Ilâpygueduo, sodadu domodo iwymâry, sodadu domodo warâ Jesus nhawâdilylymo, nhemakâjilylymo. Deus ety iguardary domodo eagâmo adâise-mento lâpylâ ani. ¹³Wauyroem kuru nhadylylymo Anás etyram, Caifás imeindamunra. Mârâ ume kurâdo eynynâ Deus agâ aguewâni modo iwymâry kuru Caifás. ¹⁴Caifâslâ awârâ iraynâ judeu domodo iwymârydoam agueim: “Tokalâ iguelylâ ise koendonro, idânârâ kyiguedupa kitoem” keim.

**Pedro, “Jesus kâuntuwâbyra urâ”
kehobyry**

(Mt 26.69-70; Mc 14.66-68;
Lc 22.54-57)

¹⁵Simão Pedro, urâ warâ xina idâly Jesus sani modo nhapygue âgânâ. Tâdutuoze ani urâ, kurâdo eynynâ Deus agâ aguewâni modo iwymâryam.



(João 18.1-11)

Awylygue kâzekaunâoly lelâ âtâ idase-
raji Jesus nhapygue. ¹⁶Pedro olâ
kuoholâ tâxiânze, pyanta iwaguepa.
Pedro yagâ negawâmpyra awyly
kâentuo, iegasely, auguely pekodo agâ,
pyanta taseraji tâzegawânto enahun-
gueim agâ:

—Tâwâlâ yataen-ho negawândâ
—uguely.

Augueduo pekodo pyanta
nhenahunguely, Pedro egawântoem.

¹⁷Aituo pekodo eyam aguely:

—Awâkâ uguondo eynynro modo
ewylâ âmâ —kely.

Adâkehonduo:

—Mâkâ mâkeba urâ! Kâuntuwâbyra
urâ awâkâ! —kely Pedro.

¹⁸Kopae igâwynugue târâ tâwa-
nuneim modo, guarda domodo warâ
taseray peto emanânimobyryem.
XYDYK, XYDYK warâ peto tânâmize
awylymo, tâuntomoem. Pedro âundyly
lâpylâ eagâmo.

**Jesus, kurâdo eynynâ Deus agâ
aguewâni modo iwymârybyry
enado aguehobyry**

(Mt 26.57-68; Mc 14.53-65;

Lc 22.54,66-71)

¹⁹Anâs Deus agâ aguewâni modo
iwymârybyry Jesusram aguely:

—Akaemo agonropyry modo wâgâ
aguekâ yam. Ânguyka akaemo? Âdyka
keankâ mâenomedâdomo? —kely.

²⁰Jesus in-hoguly:

—Totoenzeba keankâ auguezese-
dily. Âtâ tâdâtâdyguyho modo oday,
Deus etydâ idânârâ kurâdo âtâ-
dyguyho oday warâ kâenomedâdaymo,
toense kulâ inkâba keankâ auguely.

²¹Ydataynrinbyry modo tutuzemo âdy
kâenomedâdomobyry awyly. Akaemo
sapâiguegâ, urâ mâkeba —kely.

²²Arâ Jesus agueduo, Deus ety
iguardary ewy eydâ iwaguepaom
inwapagainly, aguely warâ:

—Arâ adâkezeba ikâ kurâdo eynynâ Deus agâ aguewâni modo iwymârybyryam! —kely Jesusram.

²³—Iozepa augueaki watay, iozepa auguehobyry aguekâ. Iozelâ augueaki watay olâ, âdaituoba kulâ ywapa-gainhagui —kely Jesus.

²⁴Awârâpygueduo, Anás aguely guarda domodoram:

—Caifásram Jesus sataungâ, kurâdo eynynâ Deus agâ aguewâni modo iwymâry kuruam —kely.

Aituo Caifásram Jesus nhadylymo, emakâjibyenlâ.

**Pedro, “Jesus kâuntuwâbyra urâ”
keontobyry**

(Mt 26.71-75; Mc 14.69-72;
Lc 22.58-62)

²⁵Târâlâ Pedro, peto opay âundyly. Aituo aguehonly:

—Awâkâ uguondo eynynonro modo ewylâ âmâ —kehonly.

—Mâkâ mâkeba urâ! Kâuntuwâbyra urâ awâkâ! —kely Pedro.

²⁶Caifás etydâ tâwaneim ewy Pedro nhedyly, aguely. (Pedro iwantary nhatâyby ipemugu ani mâkâ.)

—Nhentai waunlo ara olâ Jesus agâ Se Oliveira Ekadâ —kely.

²⁷—Mâkâ mâkeba urâ! Kâuntuwâbyra urâ awâkâ! —keondyly Pedro.

Pedro aguely umelâ, aukuma igâtudyly.

Pilatosram Jesus satobyry

(Mt 27.1-2,11-14;
Mc 15.1-5; Lc 23.1-5)

²⁸Caifás ety dombryyem Jesus nhadylymo Pilatos ety imâsedo idaseraji, pymâ Romadâpa ingonotyby etyram emedyly wâgâ. Judeu domodo iwymâry Pilatos ety odaji tâgawândysebamo, judeu keba awylygue. Aguelymo:

—Kâzewenry ara, judeu keba modo ety odaji kâgawântaymba kurâ. Kâgawândyly-ro watay, tywykeim ara kulâ ise Deus kâendyly. Aituo ise xirâ kopae Páscoa kientyguebyra kurâ —kelymo.

²⁹Aituo Pilatos ety odaji akaemo tâgawândyseba awylygue, Pilatoslâ ega-serim, eagâmo oxioze. Eyanmo aguely:

—Âdara nidâka awâkâ uguondo, ienado mâenwentâguedomoem? —kely.

³⁰—Inakanhe aitobyry wâgâ merâ ewentâdyly. Inakanhe anipyra-ro watay, xarâ xina nenetaymba tâise. Xina ezewenry neinwântaymba merâ —kelymo.

³¹—Âwymârymoanlâ sataungâ. Izewenrymo ara anipyra-ro watay, akaemolâ nenagazeneho —kely Pilatos.

Aituo judeu domodo iwymârydo aguely:

—Xinama ânguy nyâen-homba. Âmaemo Roma donropyry modo lelâ aieniem aguehoymby —kelymo.

³²Judeu domodolâ xyâen-hoin-ro watay, kruz wâgâ inkâba tâise iguely, romano domodo lelâ mawânkâ ewentâdyby modo kruz wâgâ takâjize xyâen-honrim. Arâ aidyly olâ Jesus “Warâ ise yiguely” kehobyry adahowandoem.

³³Pilatos tâty odaji egawântondyly. Sodadu domodoram aguely:

—Xarâ Jesus enetaungâ —kely.

Âtâ odaji Jesus nhadylymo. Târâ Pilatos aguely:

—Judeu domodo iwymâry kuruka âmâ? —kely.

³⁴Jesus in-hoguly:

—Awârâ yapâigueho angahu odanolâ awârâ? Eagonro modo awârâ ywâgâ âyam agueim? —kely.

³⁵Aituo Pilatos aguely:

—Judeu mâkeba urâ. Yangahu oday inkâba xirâ unâry âtugudyly. Âpemugudolâ, kurâdo eynynâ

Deus agâ aguewâni modo iwymârydolâ warâ inwentâni. Âdara midâka, akaemo iwentâdoem? —kely.

³⁶Aituo Jesus in-hoguly:

—Pymâ lelâlâ wâne urâ, xirâ anaymba olâ pymâem wawyly. Xirâ anano pymâlâ urâ-ro watay, ynyonro modo tâjitoguyzemo tâise, iemakehomoem, ienwentâgueni judeu domodo emaxi kâzegameomba witoem —kely Jesus.

³⁷Jesus aguely tindatuo, Pilatos aguely:

—Pymâ kuru âmâ? —kely.

Jesus in-hoguly.

—Pymâlâ urâ, amygueho aralâ. Xirâ onro anaynlâ yazely. Unâ iozeno egatuze keankâ kâewyly. Idânârâ unâ iozeno tindadysedo modo koendâ tydasemo, tutuzemo warâ augueho —kely.

³⁸Aituo Pilatos aguely:

—Âdyka unâ iozeno mygueho? —kely.

“Nigue lelâ awâkâ Jesus” Pilatos kehobyry

(Mt 27.15-31; Mc 15.6-20; Lc 23.13-25)

Egaseybyem Pilatos agueondyly Jesus ewentâni modoram:

—Ienanaji, merâ iguehoem! —kely.

³⁹—Izewenkemo alâ inanry Páscoa mâentyguedylymo ume etadâdyby ewy tokalâ kâentaguehonly, âdaunlo uguondo mâinduakeybymolâ. Âwymârymo Jesus âdara kânhenehonlyka ize matomo? Kâinmoen-hondyzeka âmaemo? —kely.

⁴⁰Aituo idânârâ in-hogulymo:

—Alâ awâkâ nidâ! Barrabás etaguehongâ! —kelymo.

Tâmagazeim, kyâim warâ myakâwâm Barrabás.

19 ¹Ilâpyryem myani tonlo Roma donro sodadu domodoram Pilatos aguely:

—Jesus sapioguwâdaungâ xikotygue —kely.

²Agueduo, sodadu domodo Jesus nhapiogulymo. Ilâpyryem Jesus âwanquem nhedylymo. Tyguyreim koroaem xygatyby myakâwâm Jesus nhangahu onwa nhekylymo, pymâ domodo nhangahu wogonro ara. Âtâ BOH waunlo tapabileingue nhetydâdylymo, pymâdo âzetydâdo ara, âwankuem tientomoem. ³Iopaji saindylymo.

—Tynrenseim âmâ, judeu domodo iwymâry kuru! —kelymo, âwankuem nhedylymo.

Tywapagainzemo myakâwâm.

⁴Pilatos egaseondyly. Kurâdoram aguely:

—Idataungâ auguely! Jesus enehondonze urâ xarâ, xyâhoem urâem âdygue ewentâdo lâpeba mâkâ awyly mâuntuhoem —kely.

⁵Aituo sodadu domodo Jesus nhenetondylymo, âtâ BOH waunlo tapabileingue etydâdybyem, koroa tyguyreim xygatyby nhangahu wâgâ warâ.

Pilatos aguely:

—Etaungâ awâkâ uguondo! —kely.

⁶Aituo kurâdo eynynâ Deus agâ aguewâni modo iwymârydo, Deus ety iguardary modo warâ Jesus tientuom, adaenkelymo:

—Kruz wâgâ nigue! Kruz onwa sakâjien-hongâ, iguehoem! —kelymo.

Aituo Pilatos aguely:

—Âmaemolâ sataungâ, kruz onwa sakâjiwâdaungâ warâ, iguehoem. Urâenma awâkâ âdanipyra —kely.

⁷Târâ âtâdyguywâdyby modo aguelymo:

—Tâwâlâ awâkâ nigue! Uguondo kulâ awâkâ, “Deus agâ âzekibaom urâ” nygue olâ. “Deus imery urâ” nygue lâpylâ warâ. Xina ezewenryem, Deus ara tâidysedonro xyâly lelâ —kelymo.

⁸“ ‘Deus imery urâ’ nygue Jesus” kely tindatuo lakuru Pilatos,

xyâen-honze âseanedily kuru. ⁹Tâty odaxi egawântondyly, Jesus târâlâ awylygue, nhapâiguely:

—Âdykonloka âmâ? —kely.

Nihoguba olâ Jesus.

¹⁰Aituo Pilatos aguely:

—Uhogugâ! Tarâ Jerusalémdâ pymâ kuru wawyly enanâgugâ. Ize urâ-ro watay, omoen-hondâ urâ, kruz wâgâ âehondâ urâ warâ —kely.

¹¹—Deus amânhedyse ato lelâ yagâ amânhekyly. Deus aguepa kulâ, âdy yagâ amânhetaymba âmâ. Yâen-honly-ro watay, inakanhe kulâ awârâ, tutuzelâma âmâ, âdara wipyra wawyly yiguehoem. Âsenagazeze âmâ ayenehon-hombyry wâgâ. Mâkâ âyam iegamerimbyry olâ ise akadâ kehoem kuru âsenagazeni —kely Jesus.

¹²Jesus aguely tindatuo, Pilatos aguely:

—Omoen-hoze urâ —kely.

Judeu domodo târâ âtâdyguywâ-dyby aguelymo:

—“Pymâ ton-honreim urâ” keanry Jesus. Romadâ kywymâry kuru toenzepa tyewiâpaze, tâjipyay pymâ kuruem ise kewâni modo agâ. Awâkâ uguondo mâimoen-honly-ro watay, pymâ Roma donro agâ iewiâpaze —kelymo.

¹³Aguelymo tindatuo, Pilatos ekadyly tâwentâze, tâwentâzeba warâ awyly agueho mure onwa. Hebraiku-em, “Gabatâ” awârâ âji ezedy: “Tadakobâdo tuhugue xygatyby” keze aguely. ¹⁴Kuotataji iseaji Páscoa etyguedo iray akâwâm awârâ aidyly, âtyem todohondyly ume. Tonlo modoram Pilatos aguely:

—Etaungâ! Anra tarâ âwymârymo kuru! —kely.

¹⁵Akaemo olâ adaenkelymo lelâ:

—Kruz wâgâ nigue! Kruz onwa sakâjien-hongâ, iguehoem! —kelymo.

Aituo Pilatos eyanmo aguely:

—Âwymârymo kâyâen-hondyzeka âmaemo? —kely.

Kurâdo eynynâ Deus agâ aguewâni modo iwymârydo olâ warâ in-hogulymo:

—Xina iwymâry mâkeba awâkâ!

César lelâ pymâ kuru, Roma donro pymâ ton-honreim! —kelymo.

¹⁶Aituo Pilatos, Jesus nhagamely sodadu domodoram. Kruz onwa Jesus sakâjize nhadylymo, iguehoem.

Jesus kruz wâgâ iguehoem sakâjihobry

(Mt 27.32-44; Mc 15.21-32;

Lc 23.26-43)

¹⁷Kruz takâjiho tanâse Jesus idâly âji Calvário kehoram. (“Gólgota” keze aguely hebraiku-em.)

¹⁸Myarâ saintybyem Jesus nhakâjilymo kruz onwa. Azagâ uguondo kyârimpyry nhakâjilymo lâpylâ, tokalâ aho eynynâ, eagonro pâem eynynâ warâ. ¹⁹Tâbua wâgâ iweniehonwânmy Pilatos: JESUS NAZARÉ DONRO MERÂ, JUDEU DOMODO IWY-MÂRY KURU kely akâwâm mârâ wâgâ iweniby azagâ tokalâ warâ itanwe: hebraiku-em, latín-em, gregüem warâ. Kruz wâgâ Jesus nhangawaym sodadu domodoram nhakâjien-honly.

²⁰Agui judeu domodo mârâ tâbua wâgâ iweniby tytainzemo myakâwâm. Xidadâ iwaguepalâ mârâ âji Jesus nhakâjihomobry awylygue, toenzepa sakadaynlymo-ro warâ. ²¹Kurâdo eynynâ Deus agâ aguewâni modo iwymârydo aguelymo Pilatosram:

—“Judeu domodo iwymâry kuru” kely keba tâise mâinwenien-honly. “‘Judeu domodo iwymâry kuru urâ’ nygue merâ” kely tâise mâinwenien-honly —kelymo.

²²Pilatos aguely:

—Kâinwenien-hoymby, iwenibyenlâ ise! —kely.

²³Kruz onwa Jesus tiankâjibygeduo, quatro sodadu domodo Jesus ety iwogompyry nhanâdylymo, nhepajiwâdylymo lelá. Ilâpyryem, ety iwogonro BOH waunlo takâjizenry nhanâdylymo. ²⁴Aituo âjigue aguelymo:

—Ety BOH waunlo kiaunguepa kine. Dadu kydyanre, mâkâ tyzortygueim ise âtâ BOH waunlo sodo —kelymo.

Aituo arâ aidylymo. Saguhoenlâ myakâwândy Deus itaumbry awo wâgâ iwenibyem awyly: “Mâkâem, mâkâem warâ iety wogonropyry nepajiwâdâmo. Ânguy ietybyry BOH waunlo sodoem ini awyly tiuntuhomoem dadu namemo” warâ iwenibyem awyly. Arâ aituo iwenihobyry ara kehoem aidyly.

²⁵Kruzdâ iwaguepalâ akâwâm quatro pekodo modo: Maria, Jesus ise; Maria iwary; Maria (Magdala donro); Maria (Cleopas iwydy) warâ. ²⁶On-yam MYK itybyem Jesus tyze nhedyly, iedyly warâ, urâ toenzepa inwynegyly. Aituo aguely tyzeram:

—Âmerylâ-ro waunlo ara ise awâkâ João nhedyly —kely.

²⁷Aguely lâpylâ yam:

—Awâkâlâ yze. Egâ, âzelâ mâenkyly-ro waunlo ara lelá —kely.

Agueduo, yze aralâ mâkâ kâendyly-ro warâ Jesus ize awyly. Ilâpyryem ietyram kandyly kâentoem.


Jesus iguehobyry

(Mt 27.45-56; Mc 15.33-41;
Lc 23.44-49)

²⁸Ilâpygeduo tutuze myakâwâm Jesus kâmakehoem aiese tâetobyry âwanikely awyly. Saguhoenlâ Deus itaumbry awo wâgâ iweniby aguehobyry ara aidyly aitoem aguely:

—Tatuanze urâ! —kely.

²⁹Tâlâ akâwâm vinhu nhewan-tybygue etary tummykeim. Mârâ ikaji



(João 19.17-27)

esponja inkuilymo. Se hissopo wâgâ ekâjibyem, Jesus itaryam nhalokuândylymo, nhugakâin-hoem. ³⁰Mârâ xugakâinrimbyryem, aguely.

—Iweâma alâ aiese kâetobyry!

Arâ aguely kâmakehoem aiese tâetobyry âdypygueândyly awylygue. Agueypyem, enagozely, iguely lelá.

Lançague Jesus eledydâ ihoguyhobyry

³¹Aituo judeu domodo iwymârydu Pilatosram idâlymo, aguelymo:

—Kruz modo onwa sakâjiwâdyby izepa enra xina târâ awyly xirâ kopae, kopaelâgâ warâ. Sodadu domodoram ixinarymo xukawânehongâ, inepa iguehomoem, eguepymobyry niguampyrâlâ etyhoem —kelymo eyam.

Tâzekobyzegueho adagulylâ mawânâ tynrenseim lelâlâ ani mârâ

tâzekobyzegueho-ro warâ, Páscoa ety-guedo awylygue. Inakanhe mawân-râ taise âty tynrenseim ume kehoem âguedy sakâjibyem awyly. Awylygue târâpa enâtâguyly, sadyly warâ ize awylymo. ³²Aituo nhekadybymo ara Pilatos anhenehonly. Sodadu domodo idâly. Jesus eapay kruz wâgâ sakâjiwâdyby modo ixinary nhukawâdylymo, mârâ ewânugue inepa iguehomoem. ³³Jesus iopaji saintybyem olâ, igueypyem awyly nhedylymo. Awylygue ixinary nukagâbyra awylymo. ³⁴Sodadu domodo ewy olâ akâwâm eledydâ Jesus tuhoguyze tylançarygue. Inepa kehoem iunu paru agonro ihuguely.

³⁵Urâ Jesus kruz wâgâ iguely eni-pyrylâ xirâ egatuim. Urâ kâentyby lelâlâ xirâ kâengatuly, mâinwânto-moem lâpylâ. Âkealâ xirâ kâinwenily. Kâinweniby ara kehoem akâwâm aidyly. ³⁶Warâ myakâwândy saguhoenlâ iwenibyem awyly Deus itaumbry awo wâgâ: “Ibry ewy âdaunloenlâ tukagâduneba ise” warâ iwenibyem awyly. Aralâ akâwâm aidyly-ro warâ. ³⁷Arâ lâpylâ Deus itaumbry awo wâgâ iwenibyem awyly: “Esemo mâkâ lançague tin-honguybymo” warâ iwenibyem awyly. Awârâ aituo saguhoenlâ Deus inwenien-hoymby ara kehoem aidyly.

Jesus eguepybyry tuhu imâsedo tâtagueim odaji nhetadâdomobry

(Mt 27.57-61; Mc 15.42-47; Lc 23.50-56)

³⁸Aituo myakâwâm José Arimatéia donro Pilatosram idâly agueze:

—Jesus nigueaki, Pymâ. Kruz wâgâpa kâyntâguyândyze olâ urâ, tuhu imâsedo tâtagueim odaji kâenkanâdoem. Tâwâlâ kâyntâguyândyly? —kely.

—Tâwâlâ —Pilatos keduo, José idâly myakâwâm.

Jesus einwânni lelâlâ myakâwâm José, ânguyram negatuba olâ-ro warâ, pymâdo tyntadylygue. Aituo myakâwâm José, Jesus eguepybyry kruz wâgâpa nhytâguyândyly, nhaleholo-ro warâ. ³⁹Nicodemos kopae Jesus agâ agueze idâypy, José agâ idâwâm lâpylâmy. Toenzepa myakâwâm Nicodemos aloés, mirra warâ nhadyly, trinta e cinco kilos lelâ, mârâ edunu tyân-rângueim âguedy onwa tientoem, inepa eguepybyry niwânzepa itoem. ⁴⁰Jesus eguepybyry nhadylymo, intuwynlymo, panu Nicodemos nhatyby tyân-rângueimpe tientybygue; kâzewenry awârâ, kâguepybyry kiontoem.

⁴¹Kruz wâgâ Jesus iguehobry iwa-guepa, tâlâ myakâwâm âji toenzepa se imâsedo modo etâdyby, jardim keho. Mârâ jardindâ tâlâ myakâwâm tâtagueim iwelo esagueyby tuhu imâsedo oday ânguy iguepy tâtadâzeba myarâ, iweloem awylygue. ⁴²Iwaguepalâ myani mârâ jardim, Calvariodâ. Awylygue José, Nicodemos warâ Jesus eguepybyry myarâ nhetadâdylymo, tâzekobyzegueho adagulylâ awylygue.

Jesus kurâem itondobry

(Mt 28.1-8; Mc 16.1-8; Lc 24.1-12)

20 ¹Domingo, pealâ koendâ nemepyra awyly umelâ myani Maria Magdala donro Jesus eguepybyry etadâdobryram idâly. Saintybyem, tâzegawânto enahun-ho tuhu ejikeybyem awyly nhedyly. ²Aituo tâgase kehoem xinaram idâly. Toenzepa urâ Jesus inwyneguyly, Pedro warâ xina eydâ atoam idâly. Mâkâ xinaram aguely:

—Kywymâry Jesus eguepybyrymy etadâdobryrdâba netymo. Âdyam nhetomobry tutuzeba-ro warâ —kely.

³Aituo Pedro, urâ warâ âguedy etadâdobyryam xina idâly. ⁴Xina egatudyly. Pedro takaze olâ akâwâm iegaky awylygue waunroenlâ yaindyly. ⁵Today kâentoem kâzewyly; panu linhuguetu kâendyly, iegawâmpyra olâ akâwâm urâ.

⁶Yaimpygueduo akâwâm Pedro saindyly, egawândyly aelâ. Târâpa Jesus eguepybyry. Panu âguedy ituwyn-hobyry lelâ nhekyly. ⁷Panu apiduby Jesus nhangahu wogonropyry lelâ warâ nhekyly. Mârâ Jesus ituwyn-hobyry modo duaypa nhangawyn-hobyry, âikâlâ. ⁸Urâ, waunroem saintyby, tâtagueim odaji iegawândyly lâpylâ, âguedy etadâdobyryam. Âguedy târâpa awyly kâentuo, kâinwândyly Jesus kurâem itondobyry. ⁹Iwenibyem Deus itaumbryry awo wâgâ, Messias igueypyem kurâem itonze, kely. Tâenselâ, tydâselâ warâ lelâlâ wâne xina. Arâlâ

olâ xina awârâ nutuba lelâ awyly. ¹⁰Koendâ kehoem enuagaenibyryem, tâtyam xina odopâdyly.

**Jesus Maria Magdala donroram
âepanâguehobyry**

(Mt 28.9-10; Mc 16.9-11)

¹¹Âguedy etadâdobyry kuoholâ myakâwâm Maria Magdala donro ohogüendyly. Tuogunru umelâ, âzewyly, IU idyly. ¹²Azagâ anju nhedyly, âtâ tapekeingue âzetydâdybyem, Jesus eguepybyry etadâdobyrydâ ekadybymoem; târâpa itybyem olâ Jesus eguepybyry. Tokalâ ekadybyem awyly nhangahu ejidyrydâ, eagonro ekadybyem awyly ihuru ejidyrydâ warâ. ¹³Anju domodo pekodo nhapâiguelymo:

—Âdaituoka ogunru? —kelymo.

Aituo pekodo in-hoguly:

—Ywymâry eguepybyry nadâmomy. Âdyam nhetomobyry kâuntuba olâ urâ-ro warâ —kely.



(João 20.1-10)

¹⁴Awârâ agueypyem, MYRYK idyly. XYDYK warâ uguondo nhedyly. Jesuslâ myakâwâm; nutuba olâ mâkâem awyly. ¹⁵Aituo Jesus aguely: —Âdaituoka ogunru? Ânguyka mâwinly? —kely.

Mârâ âji enilâ-ro waunlo ara mâkâ enanaji. Awylygue in-hoguly:

—Âmâlâ eguepybyry tarâpa etyin-ro watay, âdyam mânhetobyry yam aguekâ. Urâ ise eagonro âjiam sanehoim —kely pekodo.

¹⁶—Maria! —kely Jesus eyam.

Tâzedy wâgâ tygâseduo, Jesus lelâlâ awyly nhutuly, aguely:

—Rabôni! —kely. (Hebraiku-em, “Ywymâry” keze awârâ aguely.)

¹⁷Jesus aguely:

—Yawâdâ. Pabairam kodopâdaymba lelâ urâ. Ynynonro modoram idâ, akaemo konodo ara kehoem kâinwynegyuly modoram. Warâ eyanmo aguekâ: “‘Pabairam ise kodopâdyly, mâkâ Pabai mygüehomo, âDeusrymo warâam’ keanry Jesus” kera eyanmo —kely.

¹⁸Aituo Maria Magdala donro xina eydâ atoram idâly; xinaram aguely:

—Kywymâry Jesus kurâem itondybyem setai —kely.

Tyam Jesus aguehobyry xinaram nhegatuly.

**Jesus tynynonro modoram
âpanâguehobyry**

(Mt 28.16-20; Mc 16.14-18;
Lc 24.36-49)

¹⁹Mârâ domingo, kopaelâ, âjigüe âtâdygybyem xina Jesus eynynonro modo. Pymâdo tawânehonly tytaze akâwâm xina. Awylygue pyanta modo koendâ kehoem enahunwâdybyem awyly. Pyanta enahuybyem ozelâ Jesus egawândyly; âpanâguely xina ontay kehoem. Xinaram aguely:

—Tâseguâdâzeba itaungâ, tyanepa warâ —kely.

²⁰Ilâpyryem xinaram tâmary kruz onwa takâjihobyry nhenehonly; sodadu lançague tuhoguyhobyry nhenehonly warâ. Emarydâ, eledydâ warâ xyâhobyry tientuo, tutuze akâwâm xina, Jesus lelâlâ mâkâ awyly. Awylygue toenzepa akâwâm xina ohomaendyly.

²¹Aituo Jesus agueondyly:

—Tâseguâdâzeba itaungâ, tyanepa warâ. Pabai ugonotobyry ara lâpylâ ogonodylymo, unâry mâengatuhoem —kely.

²²Ilâpyryem xina onwa ÂBU kely, aguely:

—Tâwâlâ Deus Ispiritury âyanmo nâedâ. ²³Deus izepa ato aienibryry modoam, “Deusram ekaze urâ, inakanhe amitomobyry nhygakehoem” mygueduomo, Deus xygakeze lelâ. “Inakanhe amitomobyry Deus nygakeba itoem ekaze urâ” mygueduomo olâ, Deus nygakeba ise —kely xinaram.

Jesus Toméram aguehobyry

²⁴Xinaram Jesus âpanâgueday, xina agâ inkâba akâwâm Tomé; xina eataen-ho Jesus eynynonro lâpylâ mâkâ. “Azagonropyry” kely lâpylâ mâkâ ezedy. ²⁵Ilâpygueduo, saimpygueduo, eyam xina aguely:

—Kywymâry Jesus kurâem itondybyem xina netai —xina kely.

Xina neinwâmpyra olâ mâkâ.

—Mâkâ kurâem itondybyem awyly kâinwântaymba urâ. Kâinwândyly ise, pregugue emarydâ sakâjihobyry kâendyly, iemarygue MÂ’ kânhedyly, sodadu tylançarygue eledydâ in-hoguyhobyry iemarygue MÂN kânhedyly warâ watay lelâ ise kâinwândyly —kely.

²⁶Tokalâ semana sakanibryryem xina âtâdygyondyly târâ, pyanta modo enahunwâdybyem kadiadugue. Ilâ

ume Tomé târâlâ xina agâ. Pyanta enahuyumby ozelâ Jesus egawândyly xina ontaji lelâ. Idânârâ xinaram aguely:

—Tâseguâdâzeba itaungâ, tyanepa warâ —kely.

²⁷Ilâpyryem Toméram aguely:

—Egâ iemary ihoguyhobyry; imary nhonwa iekâ. Iwâry saunâkâ, ieledydâ ihoguyhobyry onwa imary iekâ. Mâinwâmpyra mawyly imogâ. Kurâem itondybyem wawyly einwânkâ —kely.

²⁸Aituo Tomé eyam aguely:

—Ywymâry, yDeusry warâ âmâlâ! —kely.

²⁹—Kurâem itondybyem wawyly mâinwândyly, ietuo kulâ, tuomare âmâ-ro warâ. Tuomareim kuru olâ ise iepyralâ yeinwânni modo! —kely Jesus.

Âdaituo João, Jesus wâgâ inwenily awyly xutuho

³⁰Xina eynynonro modo tâense akâwâm toenzepa lelâlâ ton-honrugue anhetyby. Xirâ pape wâgâ kâinwenipa olâ urâ idânârâ kehoem adyesenry modo Jesus anhetyby. ³¹Xirâ pape kâinwenily olâ, Jesus tâinwânsezelâ mitomoem, Deus Ingonotyby Messias awyly mâuntuhomoem. Deus imery awâkâ Jesus. Tâinwânse âmaemo-ro watay, aunlolâ ise agâmo awyly. Âguelymo watay, Deusram idâze âmaemo, aunloenlâ eagâ mitomoem.

Jesus âepanâguehobyry sete lelâ tynynonro modoram

21 ¹Awârâpygueduo, Jesus âepanâguely tynynonro modoram. Saimu imâsedo Tiberiâdes emelay xina awyly ume Jesus âepanâgueondyly xinaram. (“Saimu Galiléia” kelygue lâpylâ mârâ ezeku.) Aityby ise âyanmo kêngatuly. ²Xina sete lelâ âjigüe târâ xina awyly: Simão Pedro, Tomé (Azagonropyry kelygue

tâzekeim), Natanael (Caná, Galiléia eynynonro), urâ João, paigo Tiago, azagâ xina eataen-ho lâpylâ warâ.

³Aituo Simão Pedro aguely xinaram: —Pepi oday kanra saweze ise udâly —kely.

—Agâ kanra saweze idâze lâpylâ xina —xina kely.

Aituo idânârâ xina idâly sailu emelaji. Pepi odaji xina âxiedyly. Emedyly ara kehoem âedâ paikaji samezeseze xina awyly, ânguy niwympa olâ. ⁴Emedyly wâgâ, paru emelay uguondo xina nhedyly. Jesuslâ akâwâm mâkâ, xina nutuba olâ. ⁵Aituo Jesus ago kehoem aguely xinaram:

—Âdara kanra maweakimo? Agui maweakimo? —kely.

Xina in-hoguly:

—Ânguy xina nawewâpyra enra! —xina kely.

⁶Xinaram aguely:

—Pepi eahoru yan-yam âedâ samewâdaungâ. Toenzepa sawâse âmaemo —kely.

Aituo xina âedâ nhamely. Inepa kehoem kanra modo inwynly. Toenzepa awylygue, pepi odaji epâguely xina nemaemba akâwâm. ⁷Aituo urâ João, Jesus toenzepa inwyneguly, Pedroram aguely:

—Kywymâry Jesus mâkâ! —uguely.

Simão Pedro aguely tindatuo, tâty BOH waunlo nhetondyly, kanra tianwâtoem tientyby. Paikaji adamely. Sagunuram idâly tywâre, inepa Jesusram taintoem. ⁸Pepi oze xina idâly, tykâgueze, âedâ kanrague tummyke tâpâgueze, cem metros awârâem kulâ saintoem sagunu onwa. ⁹Pepi odayba âzetybyem, peto ehoru kanra pylâ nhangatay âjihuly-ro warâ xina nhedyly. Pâobe lâpylâ akâwâm peto opay. ¹⁰Aituo xinaram Jesus aguely:

—Awâkâ kanra manwâtybymo ewy âenetaungâ —kely.

¹¹Aituo Simão Pedro pepi odaji âxiedyly. Âedâ sagunu wâgâ nhuxidyly. Tумыке kehoem mârâ âedâ, cento e cinquenta três kanra imâsedo modogue, nadatâwâbyra olâ mârâ âedâ.

¹²—Âwinduataungârâ —kely Jesus.

Jesuslâ awyly tutuzelâ akâwâm xina, tywypaze olâ akâwâm xina, mâkâlâ awyly tiuntuhoem eyam agueze. ¹³Aituo Jesus iopaji xina saindyly. Pão nhanâdyly. Xina ara nhepajiwâdyly. Xina ara lâpylâ kanra âjihuyby nhepajiwâdyly.

¹⁴Jesus kurâem itondybyem, azagâ tokalâ warâ âepanâguely idyly akâwâm xina tynynonro modoram.

Jesus Pedroam aguehobyry

¹⁵Xina âwinduapygueduo, Jesus Simão Pedro nhapâiguely:

—Simão, João Betsaida donro imery, toenzepa lelâlâ ywynedâ âmâ âdydo imeom takaze kehoem? —kely.

Aituo Pedro in-hoguly:

—Tutuzelâ âmâ, toenzepa âize wawyly —kely.

—Arâ atayma ywâgâ aguekâne iwelo yeinwânni modoram. Tâguy ovelha imery nheto ara egâmo —kely Jesus.

¹⁶Aituo Jesus agueondyly:

—Simão, toenzepa lelâlâka ywynedyly? —kely.

—Tutuzelâ âmâ, toenzepa âize wawyly —kely Pedro.

—Arâ atayma ywâgâ aguekâne yeinwânni modoram. Ovelha eni ovelha nheto ara lâpylâ egâmo —keondyly Jesus.

¹⁷Jesus agueondyly, saguhoem adâkehobyry araba:

—Simão, toenzepa yize mawyly? —kely.

Awârâ tindatuo, Pedro itywandily, in-hoguly:

—Idânârâ xuturinlâ âmâ; toenzepa âizetonro wawyly tutuzelâ âmâ —kely.

Aituo Jesus agueondyly:

—Arâ atayma ywâgâ aguekâne yeinwânni modoram. Ovelha eni, ovelha nheto ara egâmo —kely Jesus.

¹⁸—Salokuzenomoem mawyly ume, ton-honre ani âmâ, ize matobyryam mydâhoem. Xirâ âyam augueho olâ ise âkealâ. Agaityoem mituo âzemakâjioze âmâ. Mydâdyseba matoam ise madaholy —kely Jesus.

¹⁹Awârâ arâ adâkeday, Jesus nhutuen-honry, âdara Pedro iguely awyly. Arâ Pedro tyigueho odaji kehoem Deus nheinwântobyry wâgâ ise Deus âzehogueoly Pedro eon-honru nhuduhobyry wâgâ.

Aituo Jesus Pedroram aguely:

—Ynynonroenlâne ikâ —kely.

Jesus João agâ aguehobyry

²⁰Pedro ikaynâ akâwâm urâ, urâ toenzepa Jesus inwynegyly. Kopae Páscoa ume xina âwinduatay, urâlâ akâwâm Jesus eatado ekani; urâlâ, “Ânguyka ise igamenri âehondyzedo modo emaxi?” kerim.

Âdara tyiguely awyly wâgâ Jesus aguely idanipyryem, Pedro MYRYK idyly. Tykaynâ iedyly. ²¹Jesus nhapâiguely:

—Âdyka ise João agâ aini? —kely Pedro.

²²Jesus in-hoguly:

—Awârâ wâgâ tâtynanâzeba ikâ. “Kodopâdo odaji niguepa nidâ” uguely watay, mâuntuly mâkeba awârâ. Yeinwânsezedyly wâgâ lelâ âtynanâgâ —kely Jesus.

²³Awlylygue âjigue Jesus einwânni modo aguelymo: “Kodopâdo odaji niguwâpyra ise João’ nygue Jesus”

kelymo. “Âiguwâpyra ise âmâ”
 kewâpyra akâwâm Jesus ywâgâ.
 Warâ ani aguely: “ ‘Kodopâdo odaji
 niguepa nidâ’ uguely watay, awârâ
 modo wâgâ tâtynanâzeba ikâ” kely
 Pedroram.

²⁴Kâentyby, kâindatyby warâ xirâ
 kâinwenily Jesus eynynonrolâ urâ
 João toenzepa inwyneguly. Idânârâ
 yataen-ho modo tutuzemo âkealâ xirâ
 pape wâgâ kâinwenily awyly.

Iwenihobyry xypyry

²⁵Tâlâ wâne xirâ pape wâgâ
 kâinwenily. Tâlâ olâ toenzepa âdydo
 imeom modo Jesus anhetaymby.
 Idânârâ kehoem anhetyby, agueho-
 byry warâ iwenily watay, toenzepa
 lelâlâ tâise livrupe awyly! Idânârâ
 onro anaym pape iwenily ejidy lâpeba
 tâise.

João